

近代中國史料叢刊續編第二十五輯  
沈雲龍主編

宣統己酉大政記

擷華書局編

第十至十二冊

文藻出版社  
有限公司  
印行

宣統元年二月二十五日第十册

己酉大政記

馬百大奴譜

宣統元年二月二十五日續刊

# 已酉大政記卷七目錄

諭旨

由二月十九日  
起至二十三日

紀事 二十三則

摺 奏

第六卷目錄遺

禮部奏

德宗景皇帝梓宮奉移

西陵請次同役當差一題合併聲明

吏部奏請推廣部屬簽分辦法

民政部奏奉移要差派遣消防隊沿途守護請撥款項

郵傳部會奏 皇太后前詣 西陵請豫定登車尖站處所

禮部會奏 孝欽顯皇后四滿月禮事宜 二件

又會奏 德宗景皇帝四滿月禮事宜 二件

禮部奏 監國攝政王祇領 冊寶日期

禮部會奏遵議御史仲壽奏請嚴定 朝賀行禮章程

甘學士請貫通憲政禮學法律三館

江督端奏已故革職湖北巡撫曾鈺懇請開復原官 附曾鈺原摺一件

文 獻

國際法新草案

憲政編查館電諮議局選舉異府縣人變通辦法

萬國禁煙會決定議案

粵督札行藩司明定華洋產業接抵辦法文

東三省總督札提法司營口海防撫民通判改直隸廳文

粵督函諭報館慎載關係邦交之事

抵言

說氣球

詳記連山灣新港形勢

德國裁減駐兵說

譯海

英國藍皮書爲中國禁烟事 續前

譯電 一頁

附錄

大清律例講義

鼎新時未老  
振給波賊物

己酉大政記卷七

諭旨一

監國攝政王鈐章

宣統元年二月十九日內閣奉

上諭廣州漢軍副都統莊健奏因病懇請開缺一摺莊健者准其開缺回京當差欽此

軍機大臣署名奕劻世續張之洞鹿傳霖那桐

監國攝政王鈐章

旨春祿著調補廣州漢軍副都統所遺廂黃旗蒙古副都統著廣綺補授欽此

軍機大臣署名奕劻世續張之洞鹿傳霖那桐

交旨

二月十九日

監國攝政王鈐章

軍機大臣欽奉

諭旨郵傳部左叅議李稷勳奏弊竇亟宜廓清新政亟  
待修舉請及時整飭以求實效一摺著會議政務處  
議奏欽此

軍機大臣署名奕劻世續張之洞鹿傳霖那桐  
二月二十日

觀見 本日已刻德國使臣雷克司等在 養心殿

交旨

二月二十日

監國攝政王鈐章

軍機大臣欽奉

諭旨民政部奏

德宗景皇帝梓宮奉移

西陵梁格莊暫安沿途支搭蘆殿估計實需錢糧數目請

由度支部給發一摺著依議又片奏

西陵梁格莊行宮內外支搭平抬餞橋等項擬派員前往

勘估等語知道了欽此

軍機大臣署名奕劻世續張之洞鹿傳霖那桐

殿



監國攝政王鈐章

軍機大臣欽奉

諭旨憲政編查館奏遵辦統計政要撥發民政財政入手編訂表式酌舉例要開單呈覽一摺著依議欽此

軍機大臣署名奕劻世續張之洞鹿傳霖那桐  
監國攝政王鈐章

軍機大臣欽奉

諭旨法部奏交審要案節目繁重謹陳訊供情形請飭信勤就近確切詳查迅速咨部一摺著依議欽此  
軍機大臣署名奕劻世續張之洞鹿傳霖那桐

假

監國攝政王鈐章

二月二十二日內閣奉

上諭河南南汝光道員缺著于滄瀾補授欽此

軍機大臣署名奕劻世續張之洞鹿傳霖那桐

假

交旨

二月二十二日

監國攝政王鈐章

軍機大臣欽奉

諭旨三月十二日

德宗景皇帝梓宮奉移梁格莊

行宮暫安是日

觀德殿梓宮前由

監國攝政王代詣奠酒行禮欽此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉

諭旨

德宗景皇帝梓宮奉移梁格莊

行宮暫安沿途行朝奠禮夕奠禮著派禮親王世鐸恭

代暫安次日行饗奠禮著派睿親王魁斌恭代欽此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉

諭旨此次查驗詢問保薦人才著仍派榮慶梁敦彥瑞  
良巖修愈廉三欽此

軍機大臣署名奕劻世續張之洞鹿傳霖那桐  
交旨

二月二十三日

監國攝政王鈐章

軍機大臣欽奉

諭旨都察院代遞廣東京官禮部簿正沈宗疇等以已  
革江西試用知府黎廷輔等被叅冤抑懇恩開復原  
官銜翎呈一件著照所請該部知道欽此

軍機大臣署名奕劻世續張之洞鹿傳霖那桐

殿

己酉大政記卷七

紀事二

電飭選送士紳入資政院○政府日前電致各省督撫在通省士紳內選舉曾學法政公正素著者咨送來京以便充任資政院顧問員云

攝政王之宗旨宣明○聞昨日學部值日 攝政王特召見榮中堂嚴寶兩侍郎面諭之曰近自李灼華封奏交議後竟有數人漸以復科舉等說進者致令外間輿論頗疑予持守舊宗旨且更有以書臧相叩問者實則彼等皆未明予意予曩遊歷歐洲早有所見確知中國當變法圖強何至仍持守舊之旨故於此後八年籌備立憲各項予一意如期辦到決不容稍事敷衍延滯予茲特將予之宗旨宣明汝等宜善體此意將所交各件從速議覆可也大哉王言可以師而興矣

各省均祿辦法○聞政府王大臣近日接議各省督撫等均祿辦法擬將各該督撫所有雜款及奉薪均一律裁撤另訂章程分爲甲乙丙三等發給養廉以資一律而清財政  
議設西藏銀行○大清銀行總監督張伯訥以西藏國法紛雜且外國紙幣羌帖輸入甚



其大要如左 一 飭農工商部設立華烟公司 二 派員監督製造烟料務求精美  
三 進口紙烟重定加稅 四 學生軍人禁用 五 無論官商子弟凡年至十八  
歲以上者方准吸用刻已議有端倪

補助鹽務要政○度支部澤尙書與樞府會議擬奏設鹽務處請簡鹽政大臣凡各省產  
鹽銷鹽整頓釐稅稽核鹽員各要政均歸該處總轄其一切體制仿照稅務處規模辦理  
以重鹽政而資統一各王大臣均已認可云

學堂不准再設速成班○學部榮尙書與各樞臣提議以各學堂之速成一班爲日無多  
幾同虛設亟宜整頓擬飭各省嗣後設立學堂不准再仿速成年限辦法可收教育之實  
效而期造就人材云

學部注重畢業生年限程度○現聞學部咨行各省以科舉停罷學堂即取才之階其畢  
業年限程度至關緊要乃近來各處畢業咨部所請之案多不相符或分數不照章計算  
或列等不循序核定或畢業人數與學堂開學年月及到堂時期與學司彙詳之表冊及  
學堂逕寄之表冊種種不符淆亂紛歧不勝枚舉本部照章指駁未便稍事通融惟恐各



員紳學生未悉其詳或以爲有意從刻頓減熱誠而學生向學之心因之阻喪流弊所及窒礙諸多亟應由該學司平時於學生程度資格教員管理任事勤惰悉心考察遇有學生畢業卽確切查明各該生年限分數程度是否悉合定章不合卽行指駁不得輕率詳請致滋貽悞如此辦理庶可免缺略歧悞之弊亟應切實辦理以重學務云

提倡實業○學部榮相國以本部奏定章程於每省各府應行設立實業學堂一區現在未經設立者甚多殊失 朝廷提倡實業之主意已飭司員等將本部增訂兩等工業學堂章程課程及實業學堂畢業獎勵章程頒行各省從速設立以資提倡而重實業

陸軍部咨辦輯制圖之內容○陸軍部以本部現據開辦輯制圖所有各省所屬廳州縣等村戶口等項亟應調查以資參考應擬表式刷印咨送各省飭由該廳州縣遵照表列各項酌派紳董詳查限文到一年內彙送本部勿延等情茲將該表章程抄錄如下 地理調查辦法 一此表以城市村鎮爲經方向里數戶口附記五項爲緯每村一行挨次排列如附記一項字數過多一行不能寫完卽在第二行應列村鎮名自移入第二行第二行仍不敷用再在第三行接寫將第三行應列村鎮移入第四行餘類推 二此表中

應查事項可酌派該縣紳董分投詳確考查造表由該管地方覆核再彙董填內其承辦紳董姓名職銜亦分別填入並連同該紳等原表一併呈由該省督撫咨部備核 三表中離城里數可據俗稱填姓勿庸實測但實測亦無不可惟應注明實測二字以示區別 四戶口兩項均應切實查明不准沿用向來所查數目敷衍填姓 五此表共十頁如不敷用可照式與格接連填寫以足用爲正 六該州縣所轄區域繪詳圖一紙將村鎮名目分別填注附入表後 七此表第一頁第一行地理調查表等字之上應填某州縣等字其下錄承辦官職名如表式 八此表冊面地理調查等字之上應填注某省及府廳州縣等字云云

中國現編成之陸軍○據陸軍部科長某君云中國陸軍雖經陸軍部奏定共練三十六鎮限期編成然現視各省編成軍者尙不及定數之半茲將各省已成協鎮表錄於後俾軍界中人一覽

浙畿(直隸部轄者)第一第三第五第六四鎮 北洋(直隸省)第二第四兩鎮 又編一協 江甯第九鎮一鎮 湖北第八鎮一鎮 福建一鎮 東三省第一第二兩混成

協又吉林新編一協共三協 江北第十三協一協 萊州混成協一協 河南第二十  
九協一協 安徽暫編一協 湖南第二十五協一協 江西暫編一協 四川新編一  
協 山西新編一協 陝西新編一協 甘肅新編一協 浙江新編一協 廣東新成  
一協 以上共九鎮十四協此外雲南現雖粗編一鎮然尙未就緒故略之  
自來水公司預算成本表○京師自來水有限公司呈遞農工商部該公司預算開辦成  
本需款數目表內容略分五大綱 一外洋機器材料計行化銀九十八萬兩 二中國  
工程材料計行化銀三十八萬兩 三蓄水圩並辦公房舍計行化銀五萬兩 四地價  
計行化銀六千兩 五薪工雜費以二年計算需行化銀五萬兩以上五共需銀一百四  
十六萬六千兩  
編配太湖水師之計畫○江督端方帥因整頓海軍之際擬將太湖水師五營一哨師船  
一百二十號改編爲第一二三四五營每哨勻配船廿一艘各加長龍一號先鋒一號  
計每營師船二十三號五營共一百十五號仍餘師船五號作爲該水師親兵隊官薪餉  
船隻以有餘補不足並無增損刻已一律改編成軍矣

預備夜戰之動作○江南第九鎮徐統制近准教練處移文竊查軍事學術以精進爲主日間戰鬥尙易著力惟夜戰之動作非講求有素斷不能率意從事查東西各國自利用火器以來於夜戰一事尤極究心故能應變出奇所向無敵茲查江南軍隊成立已久其目兵於學術兩科大致亦漸臻完備而夜戰之要務尙未練習純熟似此缺點彌繁至重用特移請通飭各標營如關於夜戰之步兵斥候步兵前哨配置及密集射擊全標行軍宿營時之警急集合凡五則亟應從事講求以期精熟庶請練於平時不至叢脞於臨事敝處擬於本月望左右分派專員前往各標營考查以規程度相應備文移請貴統制迅飭各標營先期演習以備屆時考查等因統制准移後當即轉飭各標營遵照辦理

奉屬石棉出現○奉天東邊一帶如臨輯寬通懷岫六州縣近來有石棉出現是物質軟如絲色白如雪絨長一二三寸不等產於懸崖巨石中土人入山樵採往往偶一得之聞此物用火一燒即見紅色出火則變烏色再用水洗又成灰色土人有用以織成腰帶者光亮如絲頗可耐久據丹國人云輪船火帆布即是石棉所作近日安東街市有懷仁縣土人携石棉十數斤求售竟被德商每斤出十三元金票購去並云下次如有此物仍可

來此照買查德國化學家前以松樹用化學製成細棉其屬精潔作爲木棉之助今得石棉常較松棉更佳故該商不惜重貲購買其將用此以備化學研究之料乎願我國實業家宜留意於此勿棄利於外人也

### 國際

俄人無禮○哈爾濱俄人設立自治會限令華商按照新章納捐東三省總督徐欽帥以爲有傷國體電告外部請與俄使交涉撤銷前議遷延不決現博克圖埠俄人於二月初三日將華商各店封閉昂昂溪商埠於同日午后有俄人巴厘司率帶俄兵將華商匾額毀壞各華商門首均派俄兵持槍看守不准往來運貨並將舊街慶順棧櫃房貨房客房釘封商人無地棲息車站華客皆露宿街上衆情激昂當封鎖商店時有鐵路局交涉委員與巴厘司磋商巴厘司不理旋因華商有強悍者自行開門巴厘司謂劉委員從中主持擬將劉羈押經劉據理辯爭幸免於辱巴厘司限令各埠華商限七日若不照新章納費當將人貨一齊驅出車站以外故日內人情非常激昂云

俄人阻撓江省增兵○齊齊哈爾函云江撫去臘爲呼蘭與吉林交界處鶻匪滋擾兵力

單薄不敷分紮擬再招新兵以資彈壓乃俄員外交官廓米薩爾以添招兵勇須先商准俄員應允不得逾額限制極嚴此次增兵礙難允准云故前月江撫已電致外部請向駐京俄使理論轉飭通融辦理

德人擬在青島鼓鑄銀幣○德人在青島租界及濟南濰縣等處分設德華銀行以爲金融機關近更發行銀元鈔幣流通於沿鐵路一帶不下數十萬元即郵政局亦兼行使該銀行鈔幣華商不知幣制爲國權所在非常歡迎之價倘較現銀略高以無須較論成色其携帶甚便沿鐵路皆可兌換也刻聞德人以膠濟鐵路日形發達決意在青島鼓鑄銀幣以便流通諸事大致布置停妥西六月以前當即有新銀幣出現膠濟鐵路搭客運貨章程購頭二等車票須用銀元三等車票則用銅元近年銅元日賤故車票屢次漲價貨車票則收銀元該公司現定新章自西六月一號起三等車票亦改收銀元制錢銅元概不收納此章一經實行於商以似有未便蓋東省銀元尙不甚多以銅元兌換銀元必多折耗各錢莊現尙不兌換銀元惟有小資本營業之人在市場設短几收買價值殊低昂無定云

催結佛山輪船命案要電○昨日旅滬粵人會議爲粵省佛山輪船洋人踢斃華客一案決議照催。致外務部電云廣東英商佛山輪船夥伴葡人踢斃華人命案疊經督憲張照會葡領訊辦延宕不理冤沉莫雪國體凌夷各屬效尤國民生命何堪設想伏乞大部主持雪冤平憤中國幸甚致粵商自治會電云佛山輪船命案葡領延不公訊初九集議廣肇醫院衆情憤激乞合力籲請督憲嚴催訊結大局幸甚

查列粵省交涉案件○粵省近因地方日益開通交涉案件加多現聞已由大吏將去歲所辦特別交涉事件遵照部章逐行詳查按列彙同覆報所查全年交涉要案內有關於國際交涉事件如西江捕權鑄造銀毫卸運軍火某艦測繪範圍岡澳界前灣漁船及地鈔交涉汕頭設釐關界港粵海界某輪轉犯會禁私帶鴉片某輪人命黃岡教堂等事件皆是又關於交涉事件如三水溝地建池江門購地建造某輪撞沉戲船某輪離沉渡船等案件另外常案數起又關於欽州邊防交涉事件共十餘起及特派專員赴越交涉提犯各案數起均行專開詳列云

己酉大政記卷七

摺奏三

吏部奏請推廣部屬簽分辦法摺

奏爲申明前奏仍請推廣部屬簽分事竊查向來各部院衙門司員筆帖式等官除特旨指定部分人員外其餘均由臣部掣簽分發惟外務部建部後雖亦用郎中員外郎主事司務等項名目因其承總理衙門之舊與軍機章京一例從無分發之說商部繼之先亦由各衙門司員內保送考試而其後一皆改爲奏調光緒三十二年十月間臣部以釐定官制恐添改各部紛紛援照新例於分發人員殊多窒礙奏請將新舊衙門但經設有學館學堂者均准一律發往隨同學習當經奉旨依議欽此嗣據民政部農工商部先後覆奏未能遵辦因之其餘新設衙門亦均未遵置議三十三年舉貢廷試蒙恩錄用部屬復經臣部以此項人員係出曠典且皆學有專長奏准量予變通其時並外務部大理院亦均分發有案而此外仍各暫如其舊現在綜計各項簽支滿郎中少工部一簽滿員外郎主



事少工部太僕寺一簽筆帖式少配之簽尤多漢員正途出身者略如滿郎中異途者祇分度支陸軍法部等三部至滿漢司務則除吏禮二部外餘部額缺均經裁撤其隨時照例呈請分發之員若

特用若

恩廕若勞

績議敘等項人數本未少減並捐納移獎裁缺改用人員亦均未經用竣若長此不變不獨臣等數部擁擠日甚勢將無可位置即其中志趣向上者亦未嘗無留意新政之材用遠所長尤覺可惜臣等再四籌思現在內外用人大半猶循舊制即如部屬補缺後截取保送以及

簡任地方於警察獄

訟學務並一切富強實業無一不需兼辦是其進身之始即不必過分畛域轉致異時臨民不免乏才之患至各該衙門創建已久規模日闢為經久計似畜及樹木更自不厭多途擬請嗣後尋常分發除外務部仍毋庸配簽外其餘無論滿漢異途出身人員准添配民政部農工商部郵傳部等簽正途出身人員再添配學部一簽其大理院衙門無論何項出身均一律掣分即按照該院所設塔品及舉貢改用之法按品改用筆帖式司務二項亦應就已設各級錄事書記等官衙門分別發往與大理院改用司員之法一律辦

理此外實係訪有專門學業堪備調用者仍聽其隨時調用應扣奏留者各按例定奏留限期嚴行甄別未奏留以前俱不准其補署各缺人地實不相宜者仍咨回臣部酌量改掣如此辦理計有數便一疏通壅滯二廣勵材能三畫一體制四稍杜奔競臣等一再申請經硯之愚實在於此如蒙 俞允應由臣部通行各衙門一體遵照所有臣等申明前奏仍請推廣部屬簽分緣由謹繕摺具陳是否有當伏乞 皇上聖鑒訓示謹 奏宣統元年二月十二日奉 旨依議欽此

民政部奏奉移要差派遣消防隊沿途守護請撥款項摺

奏爲奉移要差派遣消防隊沿途守護請撥款項以資辦公恭摺仰祈

聖鑒事竊於光緒三十四年十二月二十一日內閣奉 上諭明年三

月十二日兼祧 皇考德宗景皇帝梓宮奉移 山陵暫安所有

應行典禮並一切事宜著各該衙門及直隸總督敬謹預備欽此欽遵到部

臣等竊維奉移要差關係甚重沿途恭備 蓋殿現擬分派消防隊携

帶激筒按站守護以昭慎重惟據該隊稟稱此項要差應輪派兩中隊隨同

前往所有本隊用款如置辦行軍帳房長兵靴鞋車輛馬匹川資等項加以  
本隊消防器具牛多舊敝亟須添置頭號西洋新式激筒兩架合計以上各  
項力求搏節須銀五萬兩方足敷用等語臣等詳加查核尙屬實情擬請  
飭下度支部撥給銀五萬兩一俟差竣卽飭該隊專案據實報銷臣等爲  
慎重要差起見是否有當謹恭摺具奏伏乞 皇上聖鑒謹 奏宣統  
元年二月初三日奉 旨依議欽此

郵傳部會奏

皇太后前詣

西陵請豫定登車尖站處所

摺

奏爲會奏請

旨事宣統元年正月初七日奉

上諭三月十二日

大行皇帝梓宮奉移

西陵暫安所有經由道路著各該衙門及

直隸總督敬謹預備是日

皇太后恭送

梓宮禮畢於十三日

啓鑾乘坐火車行抵梁格莊

行宮駐蹕勿庸另備

蹕路十四日恭

謁各

陵十五日恭迎

大行皇帝梓宮禮成十六日仍乘火車

迴鑾其沿途地方一切應辦事宜務從簡省所需經費著楊士驥核實撥節

辦理准其作正開銷絲毫不准攤派民間以免擾累欽此由禮部恭錄通行  
欽遵辦理在案臣等遵卽會同敬謹籌辦

皇太后前詣

西陵

御車及車內應用等件當經郵傳部飭令京漢鐵路局恭備至登車  
處所現在京張一路業與京漢接軌屆時如由西直門登車較爲近便又車  
抵高碑店折而西入新易枝路中途應否以高碑店爲尖站例由直隸督臣  
敬謹預備均應奏明請 旨遵行其 扈從 妃 嬪王大臣應俟奉

旨派定後再由郵傳部按照人數勻排車輛次序開單奏明並將是日  
登車時刻先期請 旨辦理外所有本年三月十三日 皇太后前

詣 西陵應預定登車尖站處所緣由理合恭摺具陳伏乞 皇上

聖鑒訓示再此摺係由郵傳部主稿會同內務府具奏合併聲明謹 奏宣

統元年二月初八日奉 旨已錄

禮部會奏 孝欽顯皇后四滿月禮事宜摺

奏爲奏 聞事恭照二月二十二日 孝欽顯皇后几筵前行四滿

月酌致祭據欽天監選擇得巳時吉是日 法駕鹵簿全設衆皆齊集

此祭用金銀鏢二萬錠紙錢一萬張連飯桌十一張燒黃酒五瓶羊五隻其果桌豫先送入安設之處交領侍衛內大臣派出領班侍衛帶領入內所有紙鏢桌張羊酒沽桌臺盞燎牀鋪襪蓋襪涼棚等項交各該衙門敬謹預備其禮節由禮部另行恭進爲此謹 奏宣統元年二月十三日奉 旨知道了欽此

禮部奏

孝欽顯皇后四滿月禮節摺

奏爲恭進禮節事恭照二月二十二日已時

孝欽顯皇后几筵前行

四滿月禮致祭是日內務府設幕於燎所具楮幣官校陳

儀駕內監陳

冠服簾於供牀恭辦喪禮

王大臣內務府大臣等率執事官陳果筵於

几筵前列饌筵於階下

兩旁列羊酒於幕內王公百官各辨位集族屆時禮部堂官奏請

皇上

詣

几筵前東立西向舉哀衆咸舉哀尙茶跪進茶衆皆跪

皇

上舉茶奠於案行一拜禮衆隨行禮尙茶徹茶次尙膳進膳揭巾幕

皇

上親上食畢執事官進奠几

皇上於几前跪衆皆跪奉爵大臣跪進

爵 皇上祭酒三爵每祭一拜興衆隨叩興  
監恭請 冠服謹宮殿監侍二人前引由中門出 皇上豫出

几筵殿左門

冠服至跪候過興還翼室

冠服由中門出前引

大臣十員前引齊集之王公大臣官員等按翼排立俱跪候過興皆退避齊  
集之福晉命婦等咸出隨行至紙堆處俟 冠服恭安於燎牀畢

派出奠酒之福晉夫人於燎所跪衆皆跪女官遞酒杯祭酒三爵每祭行一  
叩禮衆隨行禮跪哭哀止興各退爲此謹具 奏 開宣統元年二月十

三日奉 旨知道了欽此

禮部會奏

德宗景皇帝四滿月禮事宜摺

奏爲奏 聞事恭照二月二十一日

德宗景皇帝几筵前行四滿

月禮致祭據欽天監選擇得巳時吉是日

法駕鹵簿全設衆皆齊集

此祭用金銀鏤二萬錠紙錢一萬張連飯桌十一張燒黃酒五瓶羊五隻其  
果桌預先送入安設之處交領侍衛內大臣派出領班侍衛帶領入 內所

有紙鏤桌張羊酒坵桌臺盞燎牀鋪祇蓋祇涼棚等項交各該衙門敬謹豫

備其禮節由禮部另行恭進爲此謹 奏宣統元年二月十三日奉  
旨知道了欽此

禮部奏

德宗景皇帝四滿月禮節摺

奏爲恭進禮節事恭照二月二十一日已時

德宗景皇帝几筵前行

四滿月禮致祭是日內務府設幕於

殯宮二門外之西置奠几陳燎

牀於燎所具楮幣官校陳

法駕鹵簿內監陳

冠服僅於供牀

恭辦喪禮王大臣內務府大臣等率執事官陳果筵於

几筵前列饌

筵於階下兩旁列羊酒於幕內王公百官等各辨位渠候屆時禮部堂官奏

請 皇上詣

几筵前東立西向舉哀衆咸舉哀尙茶跪進茶衆皆

跪 皇上舉茶奠於案行一禮拜衆隨行禮尙茶徹茶次尙膳進膳揭巾

罍 皇上親上食畢執事官進奠几

皇上於几前跪衆皆跪奉爵大

臣進爵

皇上祭酒二爵每祭一拜興衆隨叩興

皇上復位立乃徹

饌內監恭請

冠服僅宮殿監侍二人前引由中門出

皇上豫

出 几筵殿左門

冠服至跪候過興還宮

冠服至階下

前引大臣十員前引由中門出齊集之王公大臣官員等按翼排立俱跪候過興隨行至紙堆處俟

冠服恭安於燎牀

派出奠酒之王公祭

酒三爵禮部堂官遞酒杯每祭行一叩禮衆皆隨行禮舉哀畢各退爲此謹

奏宣統元年二月十三日奉

旨知道了欽此

禮部奏 監國攝政王祇領

冊寶日期摺

奏爲請

旨事查光緒三十四年十一月二十日內閣各部院等衙門會

議奏准

監國攝政王典禮崇隆應請

諭旨擇期派員告祭

太

廟並由 攝政王於

孝欽顯皇后几筵前祇領

監國攝政王

冊寶當經臣部奏准製造金

冊金寶在案今

冊寶將次製

造完竣劄行欽天監選擇舉行祇領祇告吉期去後茲據該監選擇得本月

二十七日巳初時

監國攝政王詣

孝欽顯皇后几筵前祇領

冊寶吉是日巳正時詣

德宗景皇帝几筵前祇告受

命吉

等因到部所有

遣官告祭

太廟中殿

後殿由臣部奏

派告祭

太廟中殿

後殿祝文及

觀德殿祇告受



命祭文由翰林院撰擬其祗領祗告禮節由臣部屆期另行具奏爲此  
謹 奏宣統元年二月十五日奉 旨依議欽此

禮部會奏遵議御史俾壽奏請嚴定 朝賀行禮章程摺

奏爲請

旨事光緒三十四年十二月初七日軍機大臣欽奉

諭旨

御史俾壽奏嗣後遇有祭祀及朝賀大典擬請嚴訂陪祀及行禮各章程一  
摺著該衙門議奏欽此欽遵鈔出到部禮部查乾隆五十四年奉 上

諭向來遇陞殿行禮都察院堂官俱在殿上西邊站立而丹墀下儀仗前分  
上中下三段共設糾儀御史六員不足周覽管攝今思丹陛上不過王公數  
人大學士都察院堂官耳目較近儘敷糾察儀文自能整肅而丹陛下行禮  
人員較爲衆多自非御史六人所能稽察周到嗣後著於都察院堂官內輪  
往二人在頭層品級山兩旁站立督率再於每品正從東西不拘滿漢科道  
各派一員專司彈壓科道員數較多每次止用三十六員儘爲寬裕於朕未  
升殿以前著在品級山兩旁向上按班分立屆時留心稽覈如行禮人員有  
越班不齊者既可隨時指示而於錯誤不遵者亦無難指名糾劾更足以昭

體制而肅朝儀著爲令欽此又例開監禮滿洲御史二員立於西檐第三柱東面北上滿洲御史四員禮部滿洲司官二員立於丹陛上近南都察院堂官二員立於頭層品級山兩旁滿洲科道漢科道共三十六員立於品級山每品正從東西俱向上按班分立禮部滿洲司官漢司官共四員立於丹墀之南 太和門東西階下兩旁儀仗內品級山之末東西僉立又滿洲御史漢御史共四員禮部滿洲司官漢司官共四員侍衛四員分立於 昭德門階下之左 貞度門階下之右東西向朝班各官有越次私語或互相背坐及先自起散無故踰越 御道者即指與侍衛立拏指名題參又領侍衛內大臣處咨准大朝常朝如有越班行走者應由在品級山押班科道指交兩處階下御史司官侍衛等暫時看守聽都察院堂官自行叅辦又恭遇皇上升殿各衙門掾造官員名冊送禮部及都察院稽察至期禮部及都察院各委官於左右掖門外收職名有無故不到及不親遞職名者會疏題叅惟侍班前引監禮及有執事各官例應先入者毋庸投遞職名又恭遇皇上升殿王以下公以上止用護衛內一人携坐褥內監均毋庸隨從值班

護軍統領嚴行稽察違者奏參各等語除該御史原奏內稱每遇 壇

廟祭祀執事各官既不免擁擠喧嘩而陪祀人員到班行禮者亦復

爲數寥寥一節已由禮部於議覆御史江春霖等摺內另行會議具奏外至

原奏內稱遇 朝賀時各部院官員在品級山前行禮者亦皆不按品級

班次任意擁擠甚且以六七八品人員混行列入一二品班次內行禮並時

有閑散人等擅行混入擁擠一節查 朝賀典禮定例綦嚴彈壓糾刻本

有專責日久玩生誠恐不免擬自此次申令後行禮各員皆須各按班次倘

仍有擁擠越次及閑散人等擅行混入者卽由押班科道及值班護軍統領

照例辦理又原奏內稱向例都察院及吏部禮部均有接收職名之責乃近

來吏禮二部接收職名等員率皆委之皂役而呈遞職名各官亦皆不由本

員自行呈遞以致遞職名之事率皆視爲具文一節查凡遇 朝賀大典

向均派員接收職名擬請嗣後由各該衙門照例先將行禮人員銜名造冊

分送禮部及都察院屆期親身呈遞職名並嚴飭派出之員親自接收按冊

查核如有無故不到及不親遞職名者卽照例會同都察院奏參又原奏內

內稱應由禮部先行派遣委員按照品級班次分別帶領魚貫而入按班行禮仍由都察院遣派御史認真監查倘有擁擠擾亂等項情事一經查出卽應將禮部帶班人員一併查叅一節查禮部序班官職掌僅止序其班聯倘有擁擠擾亂等事自應仍由押班科道遵照乾隆五十四年諭旨認真辦理所有臣等遵議緣由是否有當伏候 命下遵奉施行再此摺係禮部主稿會同吏部都察院具奏合併聲明爲此謹 奏請 旨宣統元年二月十五日奉 旨依議欽此

甘學士請貫通憲政禮學法律三館摺

內閣侍讀學士臣甘大璋跪 奏爲憲政禮學法律三館亟宜貫通以期遵行請 飭會議酌訂恭摺具陳仰祈 聖鑒事竊近來疊奉 諭旨宣布立憲預備以修明禮教移風易俗爲禮部責任又以形律之源根乎禮教修訂宗旨必本此意各等因欽遵在案良以禮教爲中國數千年立國之本將欲規定憲法必先修明禮教始能據禮以爲憲法之範圍此君政立憲與民政立憲之分途卽中國憲法與外國憲法之異點禮爲根本法憲爲循

用法律爲防禁法各國規定憲法皆推本於其國教之原理而折衷於羅馬  
法典比而擬之卽中國之經史學昔鄭康成深通六經乃著漢律司馬遷述  
史記自序經出於經夫史乃經之支流經以禮爲歸宿非據禮經以爲軌範  
莫由決憲法之從違不但三權鼎立之制無以理新舊政界之紛而且君權  
民權之惑無以平新舊學界之難惟援據禮經以範圍憲法乃所以定國是  
而正人心方與

德宗景皇帝詔兼采列邦之良規無違中國之禮教  
二語不肯現聞禮學館但主纂書不明修禮纂修人員多有濫竽充數憲政  
館偏重出洋學生但知趨步日本不識中國數千年相承倫教之重哲學之  
微與國政民風之關繫法律館一聽客員之所爲專賴所聘洋員錄其國已  
成之法律與我國倫教官制禮俗民情動多鑿枘該三館爲議法之權衡卽  
爲立政之基礎定一朝之典制爲舉國所遵循直如何慎重周詳豈可聽其  
草率從事又聽其各不相謀致修禮成無用之冊訂律有非禮之條卽編成  
憲法勢必視爲不能實行之具文不過屬一種繙譯外國之書則何所取於  
此擬請 飭下憲政禮學法律三館會同集議提出禮教與憲政法律互有

關係互相出入及所有妨碍所常損益各條別爲議案各稟所學引抉經心參酌憲章勘合律意統歸劃一始行決定以禮爲規定憲法之根據卽以律爲維持禮教之大坊庶三館會通而立法亦並行不悖孔子云齊之以禮必如是而始能齊也愚昧之見是否有當伏乞 皇上聖鑒謹 奏宣統元年二月十二日奉 旨著禮部法部會同集議後咨商憲政編查館再行覆核欽此

江督端奏已故革職湖北巡撫曾鈺懇請開復原官摺

奏爲已故撫臣以言獲譴情有可原臚陳事實籲懇 天恩准其開復原官用獎忠鯁而勵方來恭摺仰祈 聖鑒事竊維竭誠摠慮者事君之常經棄瑕錄瑜者馭世之妙用自來純臣謀國徃徃知無不言發之事前誠多駭聽驗諸事後率可推行若令擯斥以終雖效忠者沒齒無怨而幽忱未白究無以勵謇諤之風有不得不略跡原心瀆陳於 君父之前者伏查已故革職湖北巡撫曾鈺正白旗滿洲人同治四年伊父原任甯夏將軍慶昫在軍營積勞病故奉 旨百日後帶領引見五年以主事分工部行走

荐升員外郎中河南道監察御史光緒九年

簡放陝西督糧道兩次

署理按察使二十年補授陝西按察使署布政使補甘肅布政使二十四年

九月

擢授湖北巡撫於交卸甘肅時上疏請

朝廷變通成例奉

旨令該衙門議奏旋經已革綏遠城將軍前翰林院侍講學士貽穀前

光祿寺少卿張仲忻以擅請變法莠言亂政等語先後奏參是年十二月初

六日奉

上諭曾鈺著革職永不敘用等因欽此維時該革撫在陝西

途次聞

命回旗杜門省過追拳匪猖獗家資蕩盡賣卜餬口幾絕餐

殮顛沛之中痛心時變未幾遂以病歿聞者惜之此該革撫歷官始末及以

言獲譴之實在情形也該革撫爲外官十餘年以廉靜爲體以勤幹爲用自

甘淡泊屏絕浮華雖在仕途仍耽書史禮遇耆宿折節訂交官陝西督糧道

時前按察使黃彭年素負儒林重望與該革撫深相契合亟稱其賢關中郡

邑各書院向歸糧道主持督課實學士論翕然西同各屬農民納糧例必自

繳省倉道遠途艱弊端叢出該革撫遴員捐俸設法清釐裁抑猾胥冀寬民

力三陳臬司兩縮藩條聽斷公明勾稽詳實理財察吏規畫咸安初至甘肅

適值回匪跳梁防營失利瘡痍滿目廣集客軍餉賑兼籌左支右絀而駕馭驕將調和漢回擊講維持尤爲堅苦前陝甘督臣陶模倚之如左右手用能削平反側安輯西陲秦隴士民至今歌頌此該革撫政績卓著遺愛在民之實在情形也至於奏上條陳在戊戌八月以後斯時變法之議尙在斟酌未定之時而該革撫見爲常言卽毅然言之勇於謀國不顧其私跡其躋直之風樸忠之操實非唯諾趨時者所可比數奴才求其家藏遺稿已經兵燹散失鬱轉訪覓僅得殘稿綜其大概約分四條一請變通設官之例一請變通訟獄之例陳義並不過高但就閱歷所得力籌補救之方慷慨陳詞出於至性貽穀等指爲莠言實屬過當欽惟我

孝欽顯皇后

德宗

景皇帝因時制宜

簡派大臣更定官制修改刑律各要政薄海中外

莫不傾心該革撫所上條陳多與現在推行之新政隱相符合奴才伏查該革撫世篤忠貞心殷報國所至之地皆有成績可考今當變法圖強之際如此忠愛之臣允宜及時蒞雪庶足以作伉直敢言之氣而儆便佞趨時之風合無仰懇天恩俯准將已故革職湖北巡撫臣曾鈺開復原官出自



鴻慈逾格所有已故革職撫臣籲懇開復原官緣由理合恭摺具陳伏  
乞 皇上聖鑒訓示謹 奏統宣元年二月十七日奉 硃批曾鈺著  
開復原官該衙門知道欽此

按午帥此摺謂曾公被劾之由在條陳變通成例一疏輾轉訪覓僅得  
殘稿綜其大概約分四條今舉其二閱者至此不免以未窺全豹爲憾  
茲從諭摺彙存書內搜得原奏全文附錄於後以供 衆覽

記者謹誌

頭品頂戴新授湖北巡撫奴才曾鈺跪 奏爲酌量變通成例以培 國本  
而固民心恭摺仰祈 聖鑒事竊奴才伏讀本年十月初三日欽奉

慈禧端佑康頤昭豫莊誠壽恭欽獻崇熙皇太后懿旨從來政治之道首  
在破除成見力戒因循深宮宵旰焦勞無時不以力圖自強爲念嗣後內外  
臣工及有言事之責者務當各抒所見凡有益於國計民生者切實陳奏以  
備採擇施行等因欽此仰見 皇太后 皇上念切民勤求上理孜孜  
焉如恐不及凡爲臣子者當如何感激奮發各思振作然而新猷未煥百

僚無所適從實惠未霑羣黎不知感化地方之政教民生之苦樂有身親其事而未能盡知者亦有格於成例而不能更改者奴才在外十餘年服官只陝甘兩省而經手裁判之案牘謹以目見耳聞之實事有不敢不據實臚陳而亟求變通者敬爲

皇太后

皇上

一補官之例宜

請變通也查吏部銓選授官只有內選外補兩途分正途勞績試用三項而已近三十年來或因正途擁擠而變通捐納或因招徠捐納而變通正途以缺作輪次則有升調遺病故休五項雜各名目以人作班次則有科甲大挑截取保舉試用常捐銀捐鄧工海防遇缺先遇缺分缺先分缺間缺各名目正班與花樣輪用插用接算補算無法不備至繁至曠名目缺盤在部諸臣窮源竟委求明其道本已極難卽令熟讀強記一名不訛亦與舉賢任能設官養民之道遠不相涉徒令胥吏藉爲招搖官員習於賄買風氣日壞吏治更日媮似於澂敘官方深有關係擬請仿照主事保送直隸州之例由在京各衙門堂官在外各直省督撫隨時考察所屬各員才具出衆堪備任使者臚陳事實保舉代領引

見語

旨記名自知縣以上之缺一律改爲

請

旨簡放如係繁難要缺卽由該督撫擬定正陪開單請

簡保送

之員但求能勝所保之任亦不必論其爲正途爲雜項如其得缺之後奮勉有爲再行層累遞保至道員知府卽與京察人員一體進單如奉旨

記名之後查有難期造就之處卽請將

記名撤銷如

簡放得缺之

後或委靡不振或任性妄爲卽隨時奏叅不加原保官以罪諒大小各員咸知此官出於

聖恩特簡自然感

思奮可收日新又新之效原保

無罪則前後任之督撫亦不必迴護其佐貳教職以下咨選之缺亦不論其班次名次由督撫揀選酌補或由雜職酌升按季開單具奏並仿兵部簡付飯銀之例由吏部增定憑照飯銀官職大小的定數目行令按名批解則部中辦事無竭蹶之虞官員得缺免賄求之辱庶爲官之始基既正而養民之實效可圖一掣簽之例宜請變通也查本省之人不能居本省之官卽或隔省亦必於原籍距在五百里以外避族鄰之情託免戚黨之迫隨立法本爲盡善但統天下各省配簽入簡而掣之似乎得近省者措資較易得遠省者措資倍難且相距太遙言語不能相通於教誨生產聽斷詞訟兩事隔

膜太甚去官既負重累到官無異癡癲負債如山歛財若渴勢不能不乞靈於丁役聽命於書差官方之不飭實基於此擬請將分省人員通照親老告近之例由吏部分撥相近省分毋庸掣簽庶官債可輕取賞較易而語言相近民氣變通神益官常正所以嘉惠黎庶也 一度支之例宜請變通也查錢糧之案考察最嚴每年造分數冊兩次考成冊兩次盤查冊兩次撥冊兩次六分減平冊四次四分減平冊四次二分減平冊四次雨澤糧價已造月冊十二次仍造季冊四次每月官員有無交代造冊十二次而最重出估餉奏銷尙不在內州縣每有交代皆須查造細冊而最繁最重者如奏銷而每一分三四百本部院科道須各送一分共約千數百本其中收款名目支款名目至爲繁多又加減平減成空曠小建扣回之款又作別項支出官兵廩貧吏役囚犯斷支月日接支月日一一詳細開載散碎糾紛牽扯交互須將各項冊籍前後散總無不鹹芥相與毫厘不悞始能如式其實各省應支之款皆有額定偏災賑撫業已隨時奏明但有總冊清單足資考核何必用此按日計口之冊細結令外官不能自辦京官不能自核將京外理財之權一

概屬之書吏夫倚書吏而辦事卽不聽書吏之需案部書案之於各省各省  
索之於州縣州縣索之於百姓於是奏銷蠲緩豁免升科無一而不需費州  
縣之書差又藉端而中飽焉而蚩蚩小民終歲勤動於隴畝之中穫糧一石  
值銀不及二兩除去工本卽須完納正賦所餘餬口不遑何堪任此無名之  
費間有無須另派者亦無非出自斗面平餘仍是賦外之賦州縣藉端而議  
加增紳民不服而執挺抗官水火自古已然擬請將撥冊改爲總數列表每  
年年底報部四次以便查各省之有餘不足分撥挹注冬季預估來歲之用  
春季核銷上年之用將零碎名目全行歸併匯爲總數以戶部陝西司所刊  
之各冊表式略加釐定頒行各省大小寬狹天下一律一切出入款目照格  
填寫隨摺呈覽務使閱之了然外官可以自辦京官可以自核無形之  
中可省無限民力一切京外衙門可將書吏散去大半則州縣清靜而閭里  
無不清靜矣一訟獄之例宜請變通也查律例一書曰順治初年命法司  
廣集廷議照明律增損修成至今每屆五年續修一次酌理準情矜恤周備  
各省案件均造供招細冊送部會同法司覆覈每年秋審又將所核各省冊

籍由部刷印編交九卿科道集議惟恐有枉縱可謂仁之至義之盡矣無如各省理刑之官自臬司以至知縣出身於刑部者百人中難得一二人全仗學律出身之幕友爲之辦理案件而幕友之中讀律實有心得比擬加減毫髮無差者百人中更未必能得一人每辦一案由州縣而府而司往返駁飭不厭再三又有由司發交首府獄局覆審者首府不承仍復發回本縣將案情畧加修改又復府遞再轉未及成獄又復駁回若幕友彼此同幫尙可通融定案如幕友不給則任情挑剔直無限期所以達部案件五六年十餘年不能具題者所在恒有捏故展限傳證可及萬里之外部中扣限議處之條無可埋模犯法者只有一人而拖死之鄰佑干証不知凡幾州縣下鄉相驗科派車馬酒席公館房班之費則鄉約爲之鎖拿人犯先將其家抄搶甚至波及四鄰則衙役爲之無論部中不及知上司本及察及本官之忠厚者尙在夢中而一鄉已成赤地況有犯者在監証者在保常川供應使費不計年限必致錢財性命同歸於盡至於尋常詞訟之爲害更有出人意外者呈詞到官自代書直至本官各省應納之費名目繁多不勝枚舉全出之於被告

其至分潤於原告所以唆之使告以圖傾陷善良也其捕風捉影擇肥而噬藉端告狀爲衙門奔走生財者爲訟棍其顛倒是非變幻事理羅織多人爲衙門舞文生財者訟師終日營營惟以傾人家產爲事卽以陝甘南山而論詞訟殷繁之處每日收呈四五十件以年計之可逾萬件詞訟清簡之處每日亦收呈十餘件每年數千件小民之膏血幾何乃遭此萬千虎狼咋噬百年而不盡思之誠可哀憫其非在官毆之使然哉部臣但知例文之內條條皆有厲禁上司失察處分綦嚴大小官員皆謹守不敢輕犯豈不知六經垂訓 列聖貽謨諄諄以矜恤庶獄及誠者數千百條講求吏准之書又有數十百家宦海之內能知所能行者曾有幾人律例處分二書亦偶遇知之者行之而已竊謂我 朝定律盡除前明之酷刑苛法與天下百姓休息者二百五十餘年專重寬厚愛養斯民所以民心亦極固結至於今則外洋各國之律例較之我 國更寬似我律例亦常斟酌比擬而劑其失可否請 旨飭下各國總理事務衙門購覓外國律書會同刑部將現行律例除強盜土匪游勇馬賊會匪仍照舊章辦理外其餘人命以下各條可

以參互考較務使相平並照周書呂刑一篇酌宜罰錢數目列表繪圖進呈  
欽定頒行各省其登時可以收效者約有十端請略陳之洋律人命  
不抵止擬監禁則獄無待秋審可以從速了結其利一洋律無軍流徒道  
歸監禁可免不法之徒到配紛紛脫逃擾害善良終無底止其利二洋律以  
監爲學延致各項工師教囚製器賣之卽敷監獄之用一年可省無數經費  
其利三囚在獄學成手藝年滿出獄卽有生計可期多半化爲善良其利四  
原被告各延律師及公正人彼此當堂辯白不能任官袒斷官不致悞斷其  
利五律師有費衙門有費統由無禮者持出則憑空造誣者不敢訟而衙門  
之費亦不致任意誅求漫無限制其利六教民守教規見官挺立不跪官亦  
不能強使之跪平民見官則必跪任意扑責犬豕不如若照洋律變通則平  
民見官亦可不跪免致相形見絀其利七官設律師則向日爲害之訟師託  
足有所自然轉而講義理之言取無愧之費立可化莠爲良其利八官員不  
知律例往往濫刑照洋律變通審問之法則刑具可以不用其利九百姓冤  
抑漸少自不思趨歸異教保其恒業自有恒心其利十有此十利更兼各項



罪名皆可罰錢充贖則理刑衙門之經費自然饒裕可期化澆漓爲敦厚變頑梗爲善良內忠潛消外侮何由而至感動編氓之道莫速於此行見海宇騰歡

太和翔洽我

國家億萬年無疆之庥基於是矣以上四條

實因伏讀

懿旨立法之初未嘗不善遠積久弊深不得不改弦更張

以爲救時之計等因欽此之諭是以謹就奴才確有見聞者據實臚陳以省費節民財以省刑定民志感孚期於捷速立義取乎變通若部臣據例議覆未有不全行駁斥者是否有當伏候 聖明採擇施行所有奴才擬請酌量變通成例緣由謹恭摺具陳伏乞 皇上聖鑒再此摺係借用甘肅藩司印信拜發合併聲明謹 奏光緒二十四年十一月二十二日奉 硃批該衙門議奏欽此

己酉大政記卷七

文牘四

國籍法新草案

按和屬華僑因和政府將別定藩籍法律驅之入籍以平居之眷念祖國而不甘心謂他人父遂大聲呼號以求援於祖國其事已見本書矣至籌對待之方由吾國政府急定國籍法固爲急務之一曾未幾時而法案已草定今特急爲揭出以慰華僑雲霓之望也

第一條

子出生時父爲中國人子亦取得中國國籍

第二條

子出生時其父雖已死去臨死時父尙爲中國人其子仍取得中國國籍

第三條

父母何國國籍無可查考或竟無國籍者母爲中國人則其子亦取得中國國籍

第四條

子之父母均無可考或均無國籍子從出生地之國籍 子之生地尙亦不明則從發現地之國籍

第五條 外國人之女子爲中國人之妻則取得中國國籍

第六條 外國人得民政部尙書之許可後可以歸化中國取得中國國籍  
但非具備左列條件民政部尙書不能許其歸化

一有住所於中國延續至十年以上者 二年滿二十歲以上依其本國法律有能力者 三品行端正者 四有餬口之資或有藝能足以自立者 五無國籍者 六雖有國籍取得中國國籍後當失去其國籍者

第七條 左列之外國人如在中國有住所則雖無第六條第一號之條件亦可准其歸化

一其人父母曾爲中國人者 二其妻曾爲中國人者 三在中國出生之人 四延續至十年以上在中國有居所者

前項第一號至三號所舉之人非延續至三年以上曾於中國有居所者不得准其歸化但第三號所舉之人如其父或其母亦係生於中國則可准其歸化

第八條 外國人之父或其母係中國人其外國人現於中國復有住所則

雖無第六條之第一號第二號及第四號之條件亦可准其歸化

第九條 於中國有特別勤勞之外國人可不拘第六條之規定由民政部尚書奏請欽准歸化

第十條 外國人之妻不得離其夫獨自歸化中國

第十一條 凡許可歸化須宣示於政治官報未經宣示不能以之抵抗善意第三者

第十二條 外國人備有左列之資格者可由其父母之報認取得中國國籍

一照本國法尙未成丁者 二非外國人之妻 三父母之中先報認者為中國人 四父母同時報認者父為中國人

第十三條 凡其夫取得中國國籍其妻亦隨之取得中國國籍 前項之規定如其妻之本國法與此互相反對則不適用此規定

第十四條 凡取得中國國籍之人之妻因前條之規定未曾取得中國國籍以後雖無第六條之條件亦可准其歸化

第十五條 凡取得中國國籍之人之子據其本國法尙係未成年者之時可隨其父或其母一同取得中國國籍如子之本國法對於前項有反對之規定時可不適用前項規定

第十六條 歸化人及歸化人之子亦已取得中國國籍者不得享有左列權利

一爲國務大臣 二爲樞密院議長副議長及顧問官 三爲宮內勅任官 四爲欽差出使大臣 五爲陸海軍之將官 六爲大理院正卿少卿及會計檢查院長及行政裁判所長官 七爲帝國國會議員 八此外各種法律明載不准享有之權利

第十七條 前條限制如係因動功欽准歸化之人自取得國籍之日起經過五年之後可由民政部尙書量奏請解除此外各種取得中國國籍之人非經過十年之後不可

第十八條 中國人之女子與外國人結婚因之取得外國國籍者失去中國國籍但須得中國官憲之許可後方可結婚在中國內地結婚者由各

地巡警官長許可在外國者由中國領事官及公使許可

第十九條 凡中國人欲入外國國籍者須先請得中國官憲之許可未曾得許可者無論如何情形仍不失爲中國人在中國內地者由各地巡警官長許可在外國者由中國公使領事許可

第二十條 中國人之男子非有左列資格官憲不能許可其入外國國籍一無錢債糾葛者 二現在非在陸軍服役者 三無在陸海軍服役之義務者 四有官職之人已將官職辭去者

第二十一條 得中國官憲之許可並取得外國國籍後當即失去中國國籍

第二十二條 已失中國國籍之人妻及其子隨其一同取得外國國籍之時喪失中國國籍

第二十三條 中國人因其生父之報認取得外國國籍之時喪失中國國籍

第二十四條 因與外國結婚喪失中國國籍者離婚之後如在中國有住

所則得民政部尙書之許可後仍可回復中國國籍

第二十五條 照第二十一條第二十二條之規定已失中國國籍之人嗣後如欲復得中國國籍須在中國設有住所并經民政部尙書許可之後方可回復中國國籍歸化人以及歸化人子於取得中國國籍後復行喪失以後即不能適用前項規定回復中國國籍

第二十六條 第十三條第十四條第十五條之規定亦準用於前二條之時

第二十七條 中國人取得外國國籍後所有外國人在中國不准享有之利益此項人員亦不得享受

附則

第二十八條 本律自 年 月 日施行並布國籍法施行法如下

第一條 自本律頒布以後所有出籍入籍之事一概須遵守本律

第二條 凡本律頒布以前所有兼有中外兩國國籍之中國人自本律施行之日起限於三年內自行選擇一籍呈報民政部核准存案

第三條 本律施行後三年內未能選擇呈報民政部者一概仍視爲中國人

第四條 中國人取得外國國籍後所有在中國外人不能享有之利益限於三年內變賣盡淨如不變賣或變賣而不盡者一概充公

按南洋華僑前此電求政府請採血統主義以定國籍法今此草案其中固含血統主義也雖然法不徒行苟欲實行保護固須濟以武力否則於今日之強權世界中誰能含其自衛之勢力而可幸存者乎

憲政編查館電諮議局選舉異府縣人變通辦法

憲政編查館電開查諮議局選舉章程第二條初選舉以廳州縣爲選舉區復選舉以府直隸廳州爲複選舉區是選舉及被選舉人自應各以籍隸各該區者爲限每屆選舉之期選舉人自應各歸本籍投票此係採用籍貫主義不得不然之辦理至寄居異府異縣者若不願回籍只能照局章第四條寄居人資格一律辦法此事迭據各省電詢業經本館詳細聲復在案惟各省來電屢以如此辦法於選舉人大有不便爲言本館斟酌情形自應量予



變通以期便利今凡本省人具有局章第三條資格之一而寄居異府異縣者若於寄居地方確係寄居且置有產業准其在寄居地方投票其寄居年限及產業多少均可不論惟須由本人呈請本籍選舉監督聲明在寄居地方投票其本籍選舉權及被選舉權即行撤銷經批准後應將批詞作爲憑証呈明寄居地方選舉監督乃可歸入寄居地方行其選舉權及被選舉權其未經呈明批准者應仍照本館迭次電覆照寄居人資格一律辦理庶於變通之中仍寓限制之意至外省寄居人應照本館原定章程不得援以爲例卽希通飭遵照

#### 萬國禁烟會決定議案

萬國禁烟會各國代表會議十餘次已將各代表所呈議案決定九條當俟呈請各該國政府實行茲將全體決定議案照錄於後其先由何國提議者並附注焉

一 中國政府以禁除全國鴉片烟出產行銷之事視爲重大實力施行且與情協助得以日見進步故本會會員承認中國之堅誠雖各處成效不一

然已獲益不淺（英國提議）

二因思中國政府實行禁阻吸烟之例他國亦同此舉動故本會敦請各代表陳請各該政府於其本境或屬地內體察各國情形逐漸推行吸烟之禁令（英美兩國提議）

三本會查得鴉片烟之用除作醫藥外在會各國均視為禁物而頒行嚴密條例使之逐漸消滅因此本會承認各國情形雖有不同惟應敦促各國政府借鑒別國辦理之經驗考訂其取締規則（英美提議）

四查各國政府均有嚴厲法律其宗旨或直接或間接以禁止鴉片烟暨鴉片質提製之品私運入國因此本會會員聲明凡與會各國均有責任訂立相當之規例以禁止鴉片烟暨鴉片質提製之品運往已頒行上開禁例之他國（美國提議）

五查嗎啡之製售流布漫無限製早釀成巨患嗎啡痼疾已露蔓延之象因此本會甚願力請各政府制定嚴厲規則於其本境或屬地內以取締此項藥物之製售流布及由鴉片中提製雜和之品研究其質倘若妄用則

與嗎啡毒害相同者一律限禁（中國提議）

六本會會員於組織上礙難按科學之理研究鴉片烟及戒煙藥品之性質功用然深悉此項研究極爲重要故本會甚望各代表將此項問題陳諸各該政府酌定辦法（英美提議）

七本會極力敦促凡在中國有居留地及租界之各國政府倘於各該居留地及租界之內尙未實行關閉鴉片煙館者須仿照他國政府已經施行之禁令參酌情形迅速舉辦（中國提議）

八本會會員敦促凡在中國有居留地或租界之國各代表須陳請各該國政府與中國議定條例禁止製造販賣內含鴉片煙質或鴉片提製品之戒煙丸藥（美國提議）

九本會會員勸勉各國代表陳請各該國政府凡在中國有居留地或租界者施行藥商專律於領事裁判權限之內俾該國之民有所遵守（英國提議）

粵督札行藩司明定華洋產業按抵辦法文

照得華人將產業按抵洋人款項一事應以担保單呈請地方官立案不得以契典交易以示與洋商在口岸承租地段教會在地置買房產有別前於光緒三十二年十二月間經廣東稅契總局稟定有案自應查照辦理查現在華人將產業向洋商按抵銀兩仍有以典契交易查約章並無准華洋人典質地段房產明文自非明定限制誠恐橫生枝節光緒二十四年十二月二十二日以英商的見洋行與梁慎思堂受省城沙基大街鋪屋一案業經照知英領事官應改作担保單由縣立案並聲明凡華人將產業按抵英商銀兩如果按期已滿華人無銀取贖應由洋商請官將所按之鋪變價歸還按款惟所按之鋪洋商祇能照舊收租抵息不得有管業易租之權亦不能由洋商自行變賣該鋪按與洋商之後業主亦不得再行典與別人如有抵欠別家款項亦不准復將該鋪作按以免有重按重賣膠轕等弊如該鋪按後犯有違例應封及一切不法情事仍應照例充公倘因別人控追欠債被封則將來變價銀兩自可先儘歸還按抵担保單洋商之款餘數仍發原主給領俾昭公允等語嗣後凡有此項華人以地段房產鋪屋向洋商按

紙銀款自應一律照辦以免紛歧其担保單並須酌定款式刊刻通行各屬俾資遵守云

東三省總督札提法司營口海防撫民通判改直隸廳文

爲札飭事據署營口廳同知朱蓮溪呈稱現在籌設海蓋地方審判廳營口廳之或裁或改亟宜首先定議以免紛歧查營口廳本無專管地面名爲海防撫民實則僅埋錢產細故各訟案自杖徒以上罪名均歸海蓋兩縣令海蓋地方審判廳設在營口是營口廳已無詞訟可理原缺直同虛設現辦之各項新政均在兩縣行政區域之內原可分歸兩縣以一事權遇有交涉案件或經由關道直接辦理或札飭兩縣承辦均無不可而每年可省津貼六千餘兩撥充審判廳經費藉資挹注較爲合宜以上辦法是營口廳可以裁撤之實在情形也至營口廳若不能議裁則必改爲營川府或直隸廳營口爲通商口岸事務殷繁海蓋兩縣距此爲遠呼應不靈其關於中外交涉及本埠商務各項事宜在在均關緊要且營口係商埠性質其行政機關宜整不宜散宜合不宜分若能改設府治劃入轄地若干方可明定權限贊佐關

道俾一行政事權整飭地而則全埠精神資注免致紛歧似於商務民情兩有裨益此營口亟應改設府治或直隸廳之實在情形也總之營口廳一缺或裁或改必有一定宗旨是宜酌量輕重策其萬全以定方針而垂永久伏乞鈞的施行等情據此查營口廳所屬皆海蓋兩縣地現籌設海蓋地方審判廳於此營口廳即無事可理然地處商埠若竟事裁撤獨商務交涉事宜固道不能獨理即審判廳名屬海蓋實則距離甚遠亦將虛懸而無所係應即改爲營口直隸廳判營口一埠暨海蓋地面之附近營口者盡歸廳轄現籌設之海蓋審判廳即改作營口地方審判廳庶名實相稱於司法行政兩項官廳均有裨益除札民政部派員往勘畫分地界外合行札飭札到該司即便查照辦理云云

粵督函諭報館慎載關係邦交之事

粵督張爲飭遵事宜統元年正月十一日接廣州口日本領事函稱客歲本省流行抵制風潮至今大有減退統由閣下盡力維持之所致本領事不勝感激然近聞南洋及美國各埠在僑華民依然抵制與日商不稍融和實爲

恨事回憶抵制之事初由廣東省城始延海外故省城源泉而海外各埠其流域也源泉一清流域何有不澄清之理如今省城各報均不登載日船出入又間或揭載與兩國交情相背之紀事者本領事閱及每有遺憾蓋抵制以來中日兩國商民均受其害倘使風潮彌久不息受害愈大況且報紙卽社會之耳目刻下自當設法研究一清其源泉而澄其流域爲要也閣下夙敦友愛顧念兩國交情以致日益親睦仍望妥爲設法澄清源流使中日兩國商民均沾其澤誠兩國之福等由前來合就札飭札到該口卽便遵照諭令省城各報館凡關係邦交之事登載務宜審慎免惑觀聽而滋口實是爲切要仍將遵辦情形具覆查核毋違

已酉大政記卷七

撫言五

說氣球

物質文明進步人間氣象改觀當二十世紀開場鬢稱之者夥矣然終未有能離却地球壳面之人間世而爲大道遙遊者有之則自輕氣球始方其拊風背負青天搏扶搖而上者九萬里而莫之天閔俯視下界塵埃野馬飛渡前路南溟天池直與圖南之鶻競其勢力信哉一古今未有之奇觀也自茲以往將爲空中旅行乎將爲空中戰鬪乎將爲御風而叩月窟之門乎將爲通商而闢星球之埠乎人類精神萬能凡此皆屬意中事特吾人不幸空負文明古國之資格而伏處東方社會物質方在箕子豆蓬時代舉歐西日新月異之偉大發明幾欲改換全世界之面目者乃無一能知之能做之甚或聞其過巧且疑其爲鄙衍談天齊諧志怪之誇誕即其信者亦不過資爲茶酒閒談之助而已又烏知日處茲優勝劣敗之天演場中彼即以物質一端已足以橫烏拉嶺衝戈壁灘而撲殺我族也言念及此可勿懼哉吾因取現在歐洲各國預備雄飛之利器之輕氣球情形譯述一



二匪獨供一般國民之新智識亦將望吾同胞中有理工研究其人者以此爲材料之一撮也

考輕氣球之研究即在歐美亦悉爲最近年間之事但進步之速一日千里始著先鞭者惟法蘭西人德國繼之英美繼之俄意又繼之各不相讓競求心得而進步即由此競爭而增速從前輕氣球上升後祇能隨風勢爲進退左右今則不然於輕氣球內裝置習湫發動機此機之推進力最強故球在空中時或逆風或橫風儘可自由行動胥賴此習湫機之力現稱此種爲舵行氣球此研究之尤爲進步者德國是也按德國方富學術勃興凡事皆長於研究而於輕氣球則尤爲該國地勢所宜蓋氣球研究必經試驗然此試驗動多危險各國爲試乘氣球而墮喪身者不知凡幾惟德爲大陸國無論氣球吹落何方終不逾陸地上故放膽安心從事試驗其進步遠勝於英國因英國限於地勢雖冒險研究終不能得充分成功是以現今英國氣球決無能越海峽而渡入德境者而德國之氣球則由大陸泛渡英倫三島者亦嘗有之且德國婦女亦敢爲氣球旅行無所畏怯則其技術之精良完善亦可知矣德國現今最盛行之舵行氣球計分三種

(一)紫野蒲荅式氣球 此即德國紫野蒲荅伯爵近今一大發明者世界新聞喧傳殆遍此式氣球計長百二十邁富中徑十二邁富比較新出之戰關艦其形尤大但此式氣球係用阿爾米尼作成骨架不便疊折收藏故保存時必特造倉屋繫納於其中如船然因此使用累贅之故於軍事上不甚合宜但以其能遠出而能速馳有時軍事上有利用此長處之時則仍為莫大之利器也

(二)帕西巴爾式氣球 此係名帕西巴耳之人創成者前年經德國輕氣球研究會社中考驗此式精良特以二十五萬馬克賣於德國輕氣球大隊俾供操練之用此較前式為小計長六十邁富全體皆軟布被成無骨架易於折疊保存故軍事上非常使用

(三)苦魯斯式氣球 此係德國輕氣球大隊所創造者蓋折衷於前所述之兩種而成全體組織雖用骨架然其絲甚細故亦能折疊收藏其大小亦祇有前第二式之半以上三者皆出自德人之心與手聞最近彼更有紫野蒲荅式第四號之作不久亦將成功然則昔時英之軍艦稱為世界海王者將來德意志之輕氣球安知不更稱為空中王耶吁可畏矣

詳記連山灣新港形勢

政府自去年來即欲在直東二省覓一良港曾在錦州附近覓得葫蘆島即狐狸島擬開築口岸即前書所記之連山灣也

見本書卷六紀事第五頁現聞政府擬於今年三月間動工一面由京奉路綫連山車站興修枝綫故近者中外商民對於此舉甚為注意日人尤甚蓋懼奪其大連灣之利也查連山灣又名錦洲澳其南頭在連山車站東面東西二里南北一里本一小半島北隔連山對天橋墮天橋墩係向來民船繫泊之區又查連山灣中更有一小灣半島西隔此小灣於關外大陸又隔一小砂灘而砂灘則直連大陸砂灘幅員僅七八百步東南直面渤海島中有一山與島分向餘脈綿亘南北至南端獅子山遂入海北端為大北山再由連山灣突起為鬼頭山島層島等島中山脈高約七八百尺漸向西方傾斜島中居民止二十餘戶散在山腹島之北岸為連山灣之一部其水之深度灣南岸即為渤海之水分隔連山灣與渤海間者僅有數十砂灘耳此次擬修口岸並非北岸係在南岸即渤海內一小灣也蓋大陸之對島處名為段崗者有一小山脈蜿蜒於沿海與狐狸島兩兩相對擁渤海成小灣四面環繞雖亦良港灣山頗寬風波亦穩惟水頗

嫌淺其最深處僅六七尺許其淺處不過二三尺一至冬間即冰結矣惟此次擬修之港連山灣即葫蘆島灣其水頗深離岸未幾深達十餘尺現擬修防波堤之處水深約三十八尺其口約寬一里雖稍狹隘然兩面負山北東隔連山擁抱關外大陸除有南風可患其餘東西北風皆能風波不至且冬間雖在極寒時現擬修築之區近數十年來並未冰結是則必爲將來良港可知也更查葫蘆灣在連山車站正東三十餘里連山車站介在高橋寧遠兩站之間今將連山車站附近各地路程開列於下由營口至山海關計二百六英里由營口至錦州計九十八英里由營口至連山車站計一百二十九英里由新民屯至連山車站計百四十二英里蓋連山站雖係京奉路車站地甚寂寥人多不注重今既修築葫蘆灣由該站展修枝線則後此商務必日興旺矣

#### 德國裁減駐兵說

國之相與交際也曰踐修舊好約結外援好事鄰國以衛社稷由此派遣駐使宜若無所用其戒心焉今者中外交通天下猶一家而各國派遣使臣駐京以辦理交涉事前此因兵燹之啓咸持其戒心以相與曰有備無患亦無足怪者獨日本異焉雖嘗與中國啓兵

釐矣而乘怨修好首先以裁減駐兵爲各國倡當去年兩宮升遐之際其在中國臣民亦且自有戒心不知動搖之何從而何論夫列強日本則深信不疑特實行其減兵事以安衆心是何如敦睦者觀於今之德國裁減駐兵有矣夫查德國衛隊總員七百五十名現擬分爲二班定期一併回國另由青島調兵百五十名分駐於京津其減少之數若斯亦視中國之行新政日有進步於外交界上當無所深用其戒心耶竊因之爲中國前途賀更念日本與中國同文同種同居亞東方隅以感情之有孚倡減兵之實行未幾而德國繼之安知後此繼者之不翕然同聲乎雖然中國諸當道其可自鳴得意玩視夫外交而不勤修內政乎內政之與外交相關亦大矣但以踐修舊好約結外援爲言無當也雖曰好事隣國以衛社稷古有明訓而觀於今之國際日求進步者是不不得專依賴乎他人要亦善自爲謀也可慎無負我友邦裁減駐兵之意而已

己酉大政記卷七

譯海七

英國藍皮書爲中國禁煙事 續前

鎮江 城內煙館均已封閉惟烟膏仍得發售然亦僅售與實爲吸煙之輩耳鎮江關道辦理此事甚力有烟店主人二以在店吸食鴉片關道乃答一人二百其一人則監禁之外在鎮江道屬之城鎮二處亦已照此辦理英租界之有烟店者僅此一埠工部局已發文告不准於租界內發售烟膏想中國官吏亦必依此辦理領照之士行凡六家均不發售烟膏故雖有禁售烟膏之告示實於若輩無涉

蘇州 凡烟店必於膏局注冊領照納稅且又頒發文告聲明膏價已增十分之一而以五之二撥入釐局五之三撥入戒烟局至戒烟局已有一所其入局戒烟者上流社會納費六元至戒絕而止中流社會納費三元其已戒絕者則還其半下流社會則不取分文是所能容百人戒烟局總辦以辦事不力已被參革

上海 此處以鴉片營業致富者輒多抗阻至使禁烟辦法棘手殊甚然官吏紳商無不

主張禁烟是以封閉烟館之舉殊洽輿情在城烟館有七百所均已平和封閉絕不滋事鴉片公所亦允退讓惟煙館雖已封閉而吸戶實未減少出售之烟膏轉見日增至上海公共租界工部局及法工部局之對付此事則見於此說帖之末茲不贅言

安徽 歲產土藥三千擔蕪湖一地未嘗違 諭禁烟亦惟於其處禁止學堂及徵兵之吸食耳至禁烟一事之所以未行者殆以亂事叢生無從安戢至於罌粟雖栽種無幾然本年夏季蕪湖附近某縣令迫令農民拔去罌粟之苗致有暴動是爲拒阻禁烟 諭旨之現象當封閉烟館時適恩中丞被刺地方官方注意於捕革黨不遑計及禁烟八月之初蕪湖烟館均已封閉蓋以便夏復之計耳然至九月而貿易如故鄉村之中亦有實行封閉者惟居民仍得在家吸食烟店雖仍尚設而已大減寧國府已設立戒烟所官紳皆注意於此是年栽種罌粟之地較諸去年已減入之一殆以苛索過甚而致此乎其西南境之烟館則轉多於前而嗎啡銷路愈盛凡戒烟丸藥均有嗎啡是所謂戒烟者亦適以自欺而已

浙江 歲產鴉片五千擔杭州士紳主持禁烟極表同情凡吸烟官吏皆已具結請假六

月以便戒除戒而不斷願歸警察處置所有烟館均已封閉禁烟會已設學校一所以便戒烟之人就學工藝又假資以與停歇鴉片營業之主人俾得別謀他業且復購燬舊時烟具分贈戒烟丸藥凡售攬雜鴉片之戒烟丸者莫不利市三倍是則戒烟之人實不吸烟而吞烟益價廉而事便也據某要津言凡醫治吞烟或吞嗎啡之人較之吸烟及用嗎啡針者尤爲棘手禁烟會已於各處設法防範藩司因有烟癖爲中丞所知暫行嚴任其南之衢州則地方官已竭力禁煙聞有某官以戒烟而遭疾致死其地煙館皆已封閉膏店貿易較之去年已減六分之一其東之嚴州烟館亦已對閉戒烟丸藥業由官紳廣爲施送惟寧波禁烟之舉甚爲遷延殆因甯波餉源以土藥稅爲大宗故必設法彌補乎其府縣官業已戒烟居民之主張禁烟者三居其二栽種罌粟之地尙未減少城中與租界之烟館則已封閉

江西 歲產鴉片五百擔全省之烟館均已封閉且未滋事惟膏店照常開設居民之於禁烟 諭旨皆表同情栽種罌粟之地甚少其東北境之改而種稻者已有三分之一然此固非以禁烟 諭旨而然實因米價奇昂有利可圖之故然亦須俟冬季罌粟收穫始



可清查聞饒州警察總辦嗜好甚深爲其地之巨擘今已撤差限於大個月內戒除烟癮  
福建 歲產鴉片二千擔然恐猶不止此福州已設禁煙會封閉之烟館計五百家聞地  
方大吏均已相繼戒烟城內亦設施醫之戒煙所三處附近之烟館業已封閉膏店必須  
領照而照費頗昂士紳已自籌款開設戒烟所四處民間亦有開設者日收食用費二辨  
士有半貧者不取每所約容二十人興化烟館均已封閉有開設烟館者六人以不遵命  
歇業罰令荷枷遊街其後官紳集議決定設立戒烟所惟廈門未嘗實施禁令省憲派員  
調查興泉永道乃於七月十日頒發文告十九日烟館一律封閉現今鴉片尙可購買但  
不能聚吸於公衆之烟室耳栽種罌粟之地爲數無幾廈門迤北五十英里之向種罌粟  
者今已漸減大史與學界中人無不踴躍戒烟

廣東 歲產鴉片五百擔瓊州官吏之限禁吸烟亦徒有其名耳人民之注册吸烟者約  
三百人烟館之封閉者僅一、二家廣州禁烟會與學界中人無不力主施禁且常集議此  
事謂官吏必須戒烟烟館注册不合法者封之即酒樓娼寮旅館均不准吸烟六月粵督  
意欲效法香港招商承辦專賣鴉片或阻之議遂寢九月地方官新定照捐按其辦法有

違條約英總領事出而阻之此舉乃蹙回溯一千九百零二年及一千九百零三年亦已有欲行其法者某報所載新聞其言云有武員一以與他人吸烟同時被逮請示粵督就地正法至於汕頭雖亦封閉烟館而不注重禁烟 諭旨吸烟者不必領照仍可任便購烟在家吸食汕頭附近之烟館則皆以封閉人民亦以禁烟爲然有某館烟以逾限未歇爲人所毀然不知其果爲仇烟歟抑乘此機會以圖劫掠歟惟觀此而可見禁烟之舉爲人民所公認是以有戒烟會多所之設立也至於罌粟則栽種無多地畝亦已漸減潮州封歇之烟館已三十餘然禁烟 諭旨尙未盡遵故其成效亦惟入口之鴉片月減十箱洋藥土藥價皆漸落而已

廣西 歲產鴉片三千擔南甯之奉行禁烟 諭旨踴躍殊甚雖設法嚴禁亦未有抗拒之者是以所有烟館均已封閉地方官皆親到店舖詳查吸烟者之底蘊桂林官吏辦法亦然惟烟膏尙可購買據教士言禁烟之成效必有可望民情既已若是則今之所望者乃在實心行事之桂撫耳梧州官吏辦理禁烟頗爲妥善烟館皆已封閉有烟館店東二人以不遵 諭閉歇至被徵罰柳號示衆

湖南 歲產鴉片三千擔長沙官民皆主禁烟地方官無一吸者五百五十四家烟館之店東均已勒令具結限六個月封閉官設藥局兩所貧者贈醫此外另設戒烟所二處以一處既已敷用乃停其一在九月杪以前戒絕者已二百人其西境官吏於封閉烟館之事踴躍殊甚凡能查知私設烟館者有賞且又編造烟籍以便轄制吸戶也

河南 歲產鴉片五千擔禁烟文告雖亦頒發亦惟奉行故事而已栽種罌粟之地有百之十五其北境人民以疑慮將來不敢多種某縣所種已減於昔又有一縣將已種之罌粟悉數拔去至於烟館則扶溝而外尙未有所聞也

湖北 歲產鴉片四千擔漢口之所謂實行禁烟者亦惟嚴禁官界軍界學界中人再吸必斷而已烟館雖已封閉而膏店尙可售烟某處地畝麥與罌粟並種北境栽植罌粟之地轉見增加宜昌未嘗禁烟又不頒發禁烟文告烟館之開設者轉添一二家

己酉大政記卷七

譯電八

路透電○英國下議院現在議定養老銀共九十一萬磅此數較起初三月所定者加增十分之八

又電○英政府現派駐那威使署頓等書記官麥利爾氏爲駐華參贊官又派駐西班牙公使魯布洛德氏爲駐日本參贊官

又電○據駐澳洲首府訪員報告奧議院各員提議將添設陸軍參謀處問題議妥并將所有各員均由澳政府直接管理

紐約電○華盛頓電云美國新總統戴夫德氏現將新內閣組織妥協克納斯氏充首相兼外部大臣懷德院充兵部大臣威克斯漢氏充總律師兼執法大臣赫士庫克氏充郵政大臣巴林智爾氏充內務大臣威洛森氏充農務大臣希理克氏充財政大臣尼智爾氏充商務大臣

東京電○韓國內務大臣宋秉俊氏辭職韓政府已派朴齊純氏爲內務大臣

路透電○蘇格蘭葛拉斯溝中央地方因徒蘭斯氏逝世舉行選舉議長聯政黨岱克森氏得七千二百九十八票自由黨包洛斯氏得五千一百八十五票

又電○德首相普魯親王痛詆徵收亡人稅一事日昨議院各員亦極力反對聞德國對於改良財政之事須派他員代表云

又電○英首相阿司奎斯氏在下議院宣言政府擬實行建造泛艇所有海陸兩軍均行添置現已派員調查云

柏林電○奧國對於與塞國交涉現允從俄國之意并知照塞國將對於包斯尼亞與希爾構溫亞兩地方之要求作廢又謂俟奧塞兩國協約議訂後即可會議近東之約現在塞國甚願保守和平大局

路透電○英皇於西三月五號啟程往比利德斯地方遊歷以壯身體聞英皇此次出遊係一千九百零八年時醫士勸告須於今年西三四月出外遊歷

又電○美國議院各員現議定將總統公費銀每年加至七萬五千美元

犯罪時未老疾

文律

凡犯罪時雖未老疾而事發時老疾者依老疾論

謂如六

下犯罪年七十事發或無疾時犯罪有發疾後事發得依老疾收贖或十九以

九犯下犯死罪八十事發或無疾時犯罪有發疾後事發得入上請八十九犯

得入勿論之類若在徒年限內老疾亦如之  
謂如六十九以上徒役三年無

病徒後年限內或發疾並聽准老疾收贖以徒一年三百六

十日為半論該杖徒若干應贖銀若干俱照例折收贖

發時長大依幼小論謂如七歲犯死罪八歲事發勿論十歲殺人十一歲事

按此亦明律 國初添入小註與唐律原文一字不差蓋承上條恤老慈幼

矜不成人之義而更推廣之也依老疾幼小論者或贖或請或勿論俱依老

小三等年歲及廢疾篤疾分別擬斷流罪已至配所不能復還徒罪限內年

入七十及成廢疾者俱聽收贖若小時犯罪事發年雖長大仍以幼小論蓋

優老則損其現在發覺之年矜幼則原其從前犯罪之歲所以補前律之不

及而 國家寬大忠厚之意亦可於言外見之至於徒罪限內老疾除役過

年月折算收贖餘罪之法另有詳例略舉一節可以類推如杖一百徒三年

全贖應該出銀三錢除已受過杖一百准去銀七分五釐下剩銀二錢二分

五釐以三年一千八十日計算每日該銀二毫零八忽三微三纖零如已役

一  
二  
三  
四  
五  
六  
七  
八  
九  
十  
十一  
十二  
十三  
十四  
十五  
十六  
十七  
十八  
十九  
二十  
二十一  
二十二  
二十三  
二十四  
二十五  
二十六  
二十七  
二十八  
二十九  
三十  
三十一  
三十二  
三十三  
三十四  
三十五  
三十六  
三十七  
三十八  
三十九  
四十  
四十一  
四十二  
四十三  
四十四  
四十五  
四十六  
四十七  
四十八  
四十九  
五十  
五十一  
五十二  
五十三  
五十四  
五十五  
五十六  
五十七  
五十八  
五十九  
六十  
六十一  
六十二  
六十三  
六十四  
六十五  
六十六  
六十七  
六十八  
六十九  
七十  
七十一  
七十二  
七十三  
七十四  
七十五  
七十六  
七十七  
七十八  
七十九  
八十  
八十一  
八十二  
八十三  
八十四  
八十五  
八十六  
八十七  
八十八  
八十九  
九十  
九十一  
九十二  
九十三  
九十四  
九十五  
九十六  
九十七  
九十八  
九十九  
一百

過一年之三百六十日准去銀七分五釐未役二年之七百二十日該贖銀一錢五分此等細微末數雖不必見諸寔事惟公牘之上絲毫不能含糊自應照此計算亦以見讀律之家不可不兼明算術也

給沒贓物凡彼此俱罪之賊謂犯受財任法不任及犯禁之物謂如應禁

書之則入官若取與不用強生事逼取求索之賊並還主謂恐嚇詐散強

強及求○其犯罪應合籍沒財產赦書到後罪人雖在赦前決訖而家未會抄

割入官者並從赦免其已抄割入官守掌及犯謀反叛逆者財產與緣坐家

官並不放免若謀反及本家口雖已入官若罪人遇得免罪者亦從免放

為未入其緣坐謀反及本家口雖已入官若罪人遇得免罪者亦從免放

若以賊入罪正見在者還官主謂官物違官私物違主又若本

見在已費用者若犯人身死勿徵別犯身死者亦同若不因盜罪而犯別餘

皆徵之若計雇工貨錢私役兵私借為賊者死亦勿徵○其估賊者皆據

犯處地方當時犯中等物價估計定罪若計雇工錢者一人一日為銀八分五

錢五毫其牛馬駝羸驢車船碾磨店舍之類照依犯時雇工貨值計算定貨

錢雖多各不得過其本價謂船價值銀一十兩却不其贓罰金銀並照犯

人原供成色從實追徵入官給主若已費用不存者追徵足色謂人原盜或

取受正贓金



銀錢用不存者並退足色

按此係明律 國初加入小註蓋於追贓之中仍存矜恤之意也唐律分爲三門一爲彼此俱罪之贓一爲以贓入罪一爲平贓者此合爲一章大致悉依唐律原文惟唐律贓費用者死及配流均勿徵現律刪去配流一層惟死勿徵則較嚴矣又唐律小註凡贓皆徵正贓惟盜贓倍備若盜一尺須徵二尺之類現律無此再唐律計庸者每人一日爲絹三尺現律改爲銀八分五釐亦與唐律不同通章分五段看首節言贓物入官給主之法二節言入官財產 赦免不赦免之法三節言贓物應徵勿徵之法四五節言估贓追贓之法總之贓物有入官有給主有還官而入官給主還官三項中又有 赦免者有勿徵者必罪惡重大而始不赦如謀反叛逆之事此外即應遇 赦免追矣必人贓見存而始追徵如其人已死即不必徵或未死而十分赤貧亦有量追一半及勘實治罪豁免之例其中纖細畢具情與法可謂曲盡矣至於斷付死者財產遇 赦不得免追一項本係律後總註現已纂爲條例緣斷付死者之家財產係侵恤生者以備養贍之用與應合入官不同蓋入

官者可免而優恤死者之家不可免也當分別觀之此外又有與律互相發明者如律稱身死勿徵然官員侵盜錢糧入己者該員身故仍有將伊子監追之例又侵盜應追之贓著落犯人妻及未分家之子名下追賠如果家產全無取結豁免不得株連親族又應行查抄資產而兄弟未經分產者將所有產業按其兄弟人數分股計算祇將本犯名下應得一股入官其餘兄弟名下應得者概行給予又官員應追因公核減及分賠代賠之項查明家產盡絕者照例題豁毋庸再於同案各員<sub>中</sub>追亦不追其妻子又搶竊之贓定案時嚴行比追如果力不能完即將本犯治罪取結豁免又命案內減等發落應追埋葬銀兩勒限一個月追完如係十分貧難者量追一半如限滿勘實力不能完取結豁免又應該償命罪囚遇赦宥免追銀二十兩給其家屬赤貧量追一半又強盜贓不足原失之數將無主贓物賠補如仍不足將盜犯家產變價賠償又監守侵盜倉庫有限四個月八個月十二個月監追及一年二年三年監追之條以上數例散見各門皆與此律互相牽涉宜一併參考再給沒一法外國均有日本謂之徵償沒收其沒收之法分爲三項

一爲法律禁制之物二爲供犯罪所用之物三爲因犯罪而得之物徵償之法如犯人放免若被害者請求其應還給贓物及賠償損害仍不得免若贓物尚在犯人之手雖無請求即還給之云云與中律大意相同特文法與細則略有變通耳諸學友現習日本刑法故將中律與日法符合之處附錄於後以爲好學深思之一助

宣統元年二月三十日第十一册

己酉大政記

山會大類譜

宣統元年二月三十日發十一冊

# 己酉大政記卷八目錄

諭旨

由二月二十四日  
起至二十八日

紀事

十六則

摺奏

禮部會奏

德宗景皇帝梓宮奉移

山陵暫安事宜

又會奏

德宗景皇帝梓宮奉移

山陵後祭祀事宜 併單

又奏每周月令值班王大臣致祭片

湖南巡撫岑春煇奏爲恭報奉到

遺詔

遺詔日期

又奏爲恭報奉到

恩詔日期

憲政編查館奏擬定民政財政統計表式酌舉例安

奎瑛等奏恭辦要差遵案請撥銀兩以濟急需

又奏恭備要差遵派人員以專責成

文牘

奉天公署編輯處辦事要綱



己酉大政記卷八

諭旨一

監國攝政王鈐章

宣統元年二月二十四日內閣奉

上諭禁煙一事乃今日自強實政致養大端於衛生足  
民興地利塞漏卮各節皆有極大關係萬國屬目贊  
助同殷特是禁吸禁種及籌款抵補洋土藥稅釐三  
事相爲表裏倘一端辦理不力則其二端不免牽制  
觀望恐限滿仍難收效比年以來雖疊經禁煙大臣  
暨各省督撫將沾染嗜好各官查驗叅處然玩違欺  
飾者仍復實繁有徒至各省種煙地畝初定章程本



限十年遞減嗣據雲南四川山西直隸黑龍江等省  
奏請該省於一年內全行禁種任事頗屬奮往惟究  
竟各省禁種是否一律認真地方官能否於禁種鴉  
片之外勸種有益衣食各項植物俾令小民樂從至  
此項稅釐關繫軍餉大宗近據度支部奏請酌加各  
省鹽價以爲抵補此項稅釐之策當經允行惟鹽斤  
加價合計不過四五百萬不敷尙多朝廷求治維殷  
既憤國民積弱之難振復慮友邦期望之難副言念  
及此宵旰憂焦特此再行申諭禁吸一事文武職官  
責之禁煙大臣及京外各衙門長官務須認真糾察  
不得徇情避怨各營兵夫各學堂師生責之該管長

官尤須立即嚴行禁絕至於商民人等責之民政部暨各省督撫順天府尹及管理地方之將軍都統等亦須多訪良方設局施獎勵其廉恥酌采東西各國辦法設法減癮由少而無期於比戶可封而後已其禁種一事亦責之各省督撫順天府尹及管理地方之將軍都統等酌量本省情形督飭所屬認真禁拔相其土宜改莠爲良定當考其成績優予獎擢並由民政部查核其抵補稅釐一事責之度支部悉心擘畫此時籌款誠艱要當權其利害輕重多方籌集迅速舉行各省督撫如有抵補良策亦著奏陳備采俾查禁者不至瞻顧進款因循寡效國家財用雖絀豈

恃此醜酒漏脯以救飢渴而不爲吾民除此巨害耶  
似此各分權限各專責成不得互相推諉務須各盡  
乃職相助爲理以弼成朝廷利用厚生之盛治京外  
各衙門接奉此旨後各將該衙門如何辦法自行切  
實覆奏欽此

軍機大臣署名奕劻世續張之洞鹿傳霖那桐  
交旨

二月二十六日

監國攝政王鈐章

軍機大臣欽奉

諭旨此次驗看之開缺廣西太平思順道馮相榮著發

往廣西以道員補用欽此

軍機大臣署名奕劻世續張之洞鹿傳霖那桐假

監國攝政王鈐章

二月二十七日内閣奉

上諭雲貴總督李經羲著加恩在紫禁城內騎馬欽此

軍機大臣署名奕劻世續張之洞鹿傳霖那桐假

交旨

二月二十七日

監國攝政王鈐章

軍機大臣欽奉

諭旨孫家鼐等奏謹擬進呈講義事宜開單呈覽一摺

著按照圈出各書另行分認撰擬講義於閏二月初一日起進呈欽此

軍機大臣署名奕劻世續張之洞鹿傳霖那桐  
監國攝政王鈐章

軍機大臣欽奉

諭旨御史徐定超奏司法官制關係憲政始基擬請詳加釐正一摺著會議政務處憲政編查館議奏欽此  
軍機大臣署名奕劻世續張之洞鹿傳霖那桐

監國攝政王鈐章

二月二十八日內閣奉

上諭廣西提督著龍濟光補授欽此

軍機大臣署名奕劻世續張之洞鹿傳霖那桐

假

交旨

二月二十八日

監國攝政王鈐章

軍機大臣欽奉

諭旨農工商部奏議覆御史王履康奏請振興絲業飭  
由上海商會籌擬章程一摺著依議欽此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉

諭旨郵傳部奏覆陳查勘西潼鐵路路綫股資大概情

形一摺又片奏新易鐵路改歸京漢鐵路管轄等語  
均知道了欽此

軍機大臣署名奕劻世續張之洞鹿傳霖那桐

假

己酉大政記卷八

紀事二

如意館恭繪 大行兩宮之聖容○恭辦喪禮王大臣日前具奏恭繪 孝欽顯皇后

德宗景皇帝兩聖容聞內廷人云此項恭繪聖容仍由 內廷如意館畫士恭繪保

二十五日卯刻即上午五點鐘 攝政王由乾清宮恭請 孝欽顯皇后 德宗景皇

帝聖容至主敬殿內供奉以便如意館人員敬謹開筆恭繪

二十一日恭請 皇車進內○二十一日上驛院官員帶餉人役前赴鑾口衛衙門投文

呈說掌衛大臣那親王現因敬謹恭備要差所需皇車應由貴衛庫內恭請應用皇車一

輛當經那邸允准是日已由庫內將皇車一輛飭人役敬謹恭拉進內備差矣

景皇帝奉移路程誌略○德宗景皇帝三月十二日奉移 山陵是日 梓宮奉移

時刻及沿途宿安廬殿各路程分列於下十二日上午寅刻預備卯初刻奉移田 觀德

殿出北上門地安門阜城門至彰義村「即田村」宿安第二日十三辰刻由宿安殿恭移

至韓村蘆殿宿安第三日十四辰初刻恭移申刻抵魏村宿安第四日十五辰初刻恭移



未刻至梁格莊行宮暫安

預備承差物件○鑾儀衛例辦常年承差官物旗民校尉四季冠履等項現由內務府咨取開該署奏請此項物件擬請自行採辦以及歲修等工請給經費開支惟大駕鹵簿轎乘駕衣毯簾等項仍請由各衙門行取以符定制

旗制處之調查戶口○變通旗制處行文八旗各都統衙門略謂本處辦理旗制變通各事擬先由確查旗人戶口入手惟各旗頂名空頭等弊已習爲故常若僅照各固山造送度支部之戶口辦事仍屬徒勞往返無裨實際本處擬由各旗傳知食餉兵丁由騎驍校以至敖爾布等無論屯居各旗營房及散居城鄉內外均將家中人口及門牌號數詳細開明由各旗造送本處本處再與民政部步軍統領衙門戶口冊內互相核對以收實效而易著手等因請各都統查照辦理

欽天監咨送頒給華僑時憲書○前經民政部及山東巡撫袁海帥先後具奏請頒賞外洋各埠華僑時憲書曾蒙旨准茲於日昨已由欽天監咨送官報十八篇及全省日辰分時各憲書數百本於外務部請由部分頒各國華僑云

禁衛營開工日期○溥侗將軍勸定禁衛軍營地於暢春園已插立標記惟所勸之地多係墾熟之水田附近民居賴以生活濬貝勒擬發給各民重價以資體卹聞定於閏二月初十日以前開工

攝政王崇尙儉德三則○攝政王因內務府各等處費用銀兩每年報銷甚鉅當此國計維艱之際揅一絲之虛費即積一絲之實用故奏請 皇太后將內廷虛靡之款酌行裁

減現聞內務府核辦裁減虛費各款每年可減省至四萬兩之譜

攝政王以頤和園現值 皇太后持服期內 皇上又在冲齡數年之間暫不幸其各處之費用亦當一律裁減聞頤和園各處每年減省至二十萬兩之數云

政府各王大臣前經議定 攝政王經費一節由庫提銀二十萬兩當經攝政王拒駁擬定十萬兩而各王大臣以攝政王所擬十萬兩實不敷用故再請定爲十五萬兩每年分兩季提放

豫算統一財政辦法○度支部澤尙書因立憲後開辦國會應將全國財政先期豫算次年之度支而現在京內各部院衙門經費皆由各省地租撥解其銀兩數目亦徑與各該

衙門直接度支部無從查其詳數其豫算一節殊較難辦故奏請攝政王議商擬定統一財政辦法其內容所有全國各省督撫每年無論何項只應交納各部院之銀兩統歸度支部收管至各衙門需用之款亦統向度支部支領所有各款另在大清銀行積存如此辦法既屬統一財政亦便於豫算云

派定貴胄女學堂監督○攝政王擬定設辦貴胄女學堂提倡女子教育現因學堂將及開辦而監督已經派定肅邸之嫡孫淑舫女士充該堂監督蓋葆女士曾創立淑慎女學堂於學務頗爲得法故經量材奏派現聞規模已備不日將行開辦矣

軍機大臣具奏請假之新章○軍機大臣因事請假舊制均應具摺奏請今聞自宣統元年以來經監國攝政王欽定規制軍機處王大臣請假如在三日內勿庸具摺即可面奏如請假至五日十日即應遵照舊制假前後具摺奏請故今年軍機請假一二日者均不錄邸抄祇有署名註假云

議定會考長江水師實缺候補各官員規章四則○聞樞府諸巨公會議復興海軍應將長江水師實缺候補各官員一律詳加考試甄別以收得人之實效即應厘定飭兩江湖

廣各總督及長江水師提督會同考試長江水師其缺候補各官弁之規章以便各大吏酌核認真舉辦當經擬訂會同考試規章計分四策一考試曰學問二考試曰水師戰法三考試曰船政專門學理四考試曰槍砲優劣俟江鄂各總督長江水師提督會同考試畢應即行將所考試成績強劣情形詳細造具清冊咨部核辦並聞有准老弱人員毋庸列考之說

民政部考試錄要○民政部連日在署考試內外城警官委員自十七日爲始 十七日考內城所裁官員自五品警官下以至委員約百餘人到者六十八人三堂親臨面試又派部中司員十人充檢察官 閱卷者爲參議參事及正司總辦試題三道首題一記名投票不記名投票其利弊和何一 次題一甲乙二人皆違警章甲有心疾乙不及歲應如何科斷一三題一衛生告示三題之外并謄寫三代履歷 十鐘出題限至三鐘完卷不全作者亦可 茲并將分期考試列後 十八日考外城所裁警官委員 二十日考內城已留廳之警官 二十一日考外城已留廳之警官

吉林示定墾荒之期限○東督吉撫以吉林從前積弊糧戶包領大段荒地不自耕種轉

輟售賣墾斷居奇致貧民負耕遠來無地可耕報領各戶往往草萊未闢荒蕪滿野界址既未分明浮多幾無限制歷屆委員固難辭辦理不善之咎至著名荒販竊攬兼營居心亦殊可恨所有逾限不墾情形大略相同特出示曉諭略謂書教稼漢詔力田大利在農古有明訓查吉省土脈沃饒人民稀少地之不闢不治者不知凡幾各屬承領夾荒經歷任將軍奏明在案其先後奏設之依蘭臨江大通密山濛江長嶺等六處地盡膏腴亟宜開闢本大臣本署院忝領斯土首在重農提倡保護備極經營恐劫掠之類仍則爲肅清翰匪慮交通之不便則爲平治道塗一意招徠以期踴躍滌從前弊竇即使一律升科亦不爲過姑念鄉愚無知特從寬假與其勒之使賦何如勸之使耕凡在依蘭臨江等六屬領荒之戶無論响段多寡時期遠過統限於宣統元年起二年六月止全行開墾成熟毋稍觀望倘再愆期立即撤地另放荒價概不發還既已言之諄諄爾等慎勿聽之藐藐云云

### 國際

問島問題近聞○問島問題近經外部與日使磋商已有端緒聞其辦法大約土地所有

權可完全讓還中國至該處管理日韓僑民之權則仍歸日本云

移民入澳○澳洲任克姆門章魯夫總督夫腦科特君於西正月十九號即華去臘廿八日在倫敦章特吳魯地方演說聲言英政府應將顏色種人遷居澳洲之事詳加研究因亞洲工人之入澳者日甚一日澳洲頗爲困難之故澳洲若不抵制亞洲工人將來釀成問題尤重於當日美國黑奴問題也今澳洲能於北境安置多數白人足見澳洲安插白人之事實爲當務之急然其氣候是否合於婦稚體質及將來之生育又討論所必先者計澳洲五十萬英里之內共有白人二千他日未必能陸續而來是以北境殖民之地爲澳洲最大問題也設使日本與中國均於東亞成爲強國占奪達爾文港口非歐人五百萬不足以防之蓋澳洲之地較大於歐洲全洲四分之一也然則澳洲全賴英國相助無疑矣英國本爲世界殖民地最多之國區區澳洲當不難得其相助要之澳洲太平全恃澳人之防護而已

留日中國學生數目○興文學院「私設」二百八十人岩倉鐵道學校「同上」一百六十六人早稻田大學「同上」八百二十人成城中學校「同上」二百五十人法政大學「同

上「三百人帝國大學」官設「五十八人第一高等學校」同上「六十人日本大學」私設「十人高等師範學校附屬中學校」官設「一人正則英語學校」私設「三百人正則預備校」同上「三百三十三人經緯學堂」同上「二百人東城學堂」同上「四十五人東洋大學」同上「四人振武學堂」同上「一百八十人慶應義塾」同上「一十三人東京高等工業學校」官設「一百二十九人高等師範學校」同上「六十三人東京高等商業學校」同上「六十人同文書院」私設「一百五十人明治大學」同上「七百人東京外國語學校」官設「八人至誠學堂」同上「四十四人此外陸軍學校及聘師修學者約有千人共計五千一百餘人

己酉大政記卷八

摺奏三

禮部會奏

德宗景皇帝梓宮奉移

山陵暫安事宜摺

奏為會奏請

旨事恭照三月十二日

德宗景皇帝梓宮奉移

山陵於梁格莊

行宮正殿安奉臣等恭查奉移

梓宮前期

三日

遣官告祭

天地

太廟後殿

奉先殿

社稷壇

先師孔子廟

孝欽顯皇后几筵前前一日於

德宗景皇帝几筵前行祖奠禮奉移日五鼓官校陳

法駕鹵

簿恭辦喪禮王大臣率內務府官將

冊

寶案

寶牀香

案香几銀五供等項由

觀德殿移出送至

蓋殿黃幔素帷等

項預送梁格莊

行宮鑾儀衛同內務府官預陳

冊

寶黃

亭禮部內務府堂官恭捧香

冊香

寶安奉黃亭內俵

靈駕啓行時校尉昇請在

鹵簿後隨行內務府陳八十人大壘及三

十二人小壘於

觀德殿大門外其一百二十八人所昇大壘以城門

己酉大政記卷八



不能容請照例於第一站宿次預備恭辦喪禮王大臣禮部內務府鑾儀衛大臣率執事官及穿駕衣校尉豫進小輦敬謹預備妥協退出屆時禮部堂官奏請 皇上詣 梓宮前舉哀執事官進奠兒 皇上祭酒三爵每祭行一拜禮興立於左恭辦喪禮王大臣禮部內務府鑾儀衛大臣率執事官及校尉等進恭請

梓宮出

觀德殿大門外登大輦禮部

尚書祭饗奠酒三爵每祭行一叩禮焚紙錢五千張王公百官等各辨位渠俟奉移祭酒時衆皆隨行禮四品官以下有頂戴官員以上及年老不能步行之大臣官員俱在城外關廂內齊集俟 梓宮奉出時皆跪舉哀往

送之王公大臣官員等隨行至關廂外換二班時驗馬其不往送者亦至換二班處各散公主福晉命婦等照常齊集舉哀俟 靈駕啓行往送之

公主福晉命婦等於別路先往其不往送者各散令喇嘛一百八衆在 觀德殿大門外恭送

梓宮外罩加以黃色絨絡所備幃套黃油單

絨繩等項在前相近處行走以備需用太監等每班派出十名侍衛每班派出二十員俱分班更換在 梓宮兩邊步隨其近前行走之王大臣侍

衛內監等在

儀衛大臣於

梓宮兩邊騎馬隨行恭辦喪禮王大臣禮部內務府鑾

梓宮兩邊騎馬巡查照管每換班時下馬觀看隨行之

王大臣侍衛官員內監等俱下馬跪候換班畢起行時上馬在原處隨行之

後執豹尾槍侍衛行走次帶領衆人之侍衛行走又次王大臣官員依次行

走所過門橋內大臣二員輪班祭酒三爵每祭一叩興焚紙錢五百張禮部

官捧壺進爵包衣官員沿途揚撒紙錢至 蓋殿相近末班王大臣官

員豫從他路先往黃布城北門外按翼排立 梓宮至跪迎舉哀候過

從黃布城兩旁牆外至大門前按翼排立官校將 法駕鹵簿排設於

大門前 梓宮連槓安奉畢禮部內務府堂官恭捧 册

寶安於 梓宮兩旁案上供果臬行夕奠禮恭代之承祭王祭酒三爵

每祭行一叩禮衆隨行禮舉哀沿途百里內地方文武官員於道右跪迎舉

哀候過至宿處在黃布城外行三跪九叩禮供獻時文職在正藍旗之末武

職在廂藍旗之末行禮舉哀徹臬張畢衆皆散官校徹 鹵簿內務府

官帶領執事人等將大輦兩旁敬謹加添一百二十八人肩槓次日早設騎

駕

鹵簿衆皆按翼齊集屆時承祭王詣

梓宮前行朝奠禮祭

酒三爵每祭行一叩禮焚紙錢五千張衆隨行禮禮部內務府堂官恭奉

冊

寶安奉黃亭內奉移

梓宮出時王公大臣官員等按

翼毋跪舉哀候過隨行至換班處乘馬仍在原處行走凡每程齊集行走之處俱照此例所有 法駕鹵簿預送至梁格莊 行宮伺候至日

自梁格莊附近地方迎設俟騎駕

鹵簿到時各在本處下馬同行至

梁格莊

行宮排設沿途交與武備院酌量村莊寬敞處所搭蓋涼棚收

放漢鑾儀使帶同官校搭蓋帳房看守所撥校尉酌量足用交鑾儀衛官約束往返計日發給路費其運送 鹵簿及校尉乘坐裝運被褥車輛應

遵照此次

諭旨由該衙門自行雇覓所有昇請

梓宮夫役分爲六

十班輪流昇請自

觀德殿奉移至梁格莊

行宮頭班末班俱

用校尉餘班俱選精壯民夫每班多備四名共計夫役七千九百二十名行

文直隸總督於宛平良鄉涿州涿水易州附近等州縣選用其衣帽鞋襪預

備整齊管轄照看著直隸總督率道府等官帶領前來會同本班管轄夫役

官員在都門外演習預備應用自演習以至奉移梁格莊 行宮共計若

干日每名每日照案各給制錢六十文由度支部給發仍免丁差一年再撥校尉四十名均穿絮衣每班派令四名在兩旁步行遇夫役內有力不勝者卽行更換其餘三十六名令騎馬在 兩簿前兩旁行走更替每班管

轄夫役以四品京堂科道以下主事以上八旗公侯伯以下參領雲騎尉以上前鋒參領護軍參領八旗參領副參領上三旗頭等侍衛下五旗王府長史內移取能事者每班四員照管並令其演習本班夫役進退行走再夫役每宿所需食物住宿等處若祇令本班官照看恐不能周及應由各部院衙門賢能科道等官酌量揀選分班會同督率夫役之道府等官公同照看每班仍派鑾儀衛官二員指示更換進退至鑾儀衛官校領取所騎之馬交與鑾儀衛辦理搭綵頭目八人分爲二班擊鐃尺行走夫役等所用駕衣翎帽輪班穿換所有第一班校尉夫役並擊鐃尺頭目四名鑾儀衛官四員令內務府堂官帶領卽於網城外轅房內住宿每宿 蘆殿前門及

棹宮前點香燈各派太監十名殿內太監俟香燈盡時將香爐內炭火止息

出與前門太監十名輪班坐更守護後門亦派太監一十名看守圍牆內外預備激桶八座由八旗步軍營取用每旗派章京一員領催兵丁各十名每日清晨令各旗抬至宿處每宿處地方官於

瀛殿周圍設放水缸滿

盛清水其黃布城正門後門網城周圍看守並守衛

行宮安設堆撥巡

查之處交與內大臣前鋒統領護軍統領內務府等衙門辦理

靈駕

至日所有業經奏准由

陵寢大臣派撥官員人等俱在梁格莊

行宮附近地方跪迎舉哀候過隨行

梓宮至梁格莊

行宮大門

外換三十二人小舉由中門入安奉

梓宮於正殿正中設黃幔素帷

五供香几等項禮部內務府堂官恭奉

冊

寶於

梓宮

兩旁案上一切安奉畢供果臬承祭王祭酒三爵每祭行一叩禮衆隨行禮

焚紙錢五千張禮畢各退次日行饗奠禮其騎駕

鹵簿於致祭後俱

行焚化此後初周年內每日仍三次供獻初周年後每日設午奠一次每月

朔望仍三奠致祭日近前棹張及每日供獻棹張交

陵寢總管內務

府官員內管領等預備沿途所供之茶至梁格莊

行宮日所供茶膳由

茶膳正預備所用器皿由茶膳頭目帶往其別項由各該員帶往沿途所用  
羊隻由慶豐司備辦至梁格莊 行宮後所用羊隻等項由 陵寢

禮部預備沿途供獻棹張至梁格莊 行宮日及饗奠禮致祭應用器皿

隨棹等項由禮部備辦至運送器皿等物所用車輛由禮部自行雇覓馱載

茶桶茶壺馬匹及人役所騎之馬由 上駟院取用蒙古帳房等項由武備

院預備沿途所撒紙錢焚化紙鏢造辦供獻果棹之席棚一應器皿等項並

修理道路 蘆棚內鋪設氍毹等事均由內務府等衙門查照舊案辦

理其送往之王貝勒貝子公滿漢文武大臣官員近前隨行之王公官員等

俱由各衙門自行奏派各衙門司官由各該堂官派往所有黃布城網城白

城等項由該衙門自行查照辦理交與派出之護軍統領嚮導官參領等預

備支搭每日供獻時值班之王大臣及 西陵派撥官員人等俱齊集

其沿途及行饗奠時齊集行禮之處均由禮部排班恭俟 命下行文京

外各衙門一體遵照爲此謹 奏宣統元年二月二十二日奉 旨依議

欽此

禮部會奏

德宗景皇帝梓宮奉移

山陵後祭祀事宜

傳單

奏爲請

旨事恭照本年三月十二日

德宗景皇帝梓宮奉移

山陵前經禮部具奏所有至

陵後一切祭祀事宜應照成案由

陵寢大臣派撥官役將事等因奉

旨依議欽此恭查檔案內開

梓宮奉移

山陵自饗奠禮後每遇致祭應行預備各項交

陵寢衙門敬謹備辦其一應執事人役亦由

陵寢大臣酌量撥

用在案復查道光三十年九月

宣宗成皇帝梓宮奉移

山陵

同治元年九月

文宗顯皇帝暨

孝德顯皇后梓宮奉移

山陵光緒元年九月

穆宗毅皇帝暨

孝哲毅皇后梓宮奉

移

山陵均經奏准遵行亦在案今本年三月

德宗景皇帝梓

宮奉移

山陵除每周月及四時大祭並每周年事宜禮節另行分別

具奏外所有自饗奠禮後大小祭祀應行預備各項擬請仍照歷屆成案交

陵寢衙門備辦其一應執事人役亦由

陵寢大臣酌量撥用

謹照案繕具清單恭呈

御覽伏候

命下由禮部行文京外各衙門

一體遵奉施行爲此謹

奏宣統元年二月二十二日奉

旨依議欽此

一 梓宮至

陵後凡致祭應焚化之

冠服自道光三十

年奉

旨改用畫緞應請交

陵寢衙門照案預備

一 每周月致祭並四時大祭除冬至禮應用牲帛由禮部送往外其餘大小

致祭按照

殯宮之例仍用羊酒桌張焚化畫緞

冠服及紙鏢

統山

陵寢官員預備

一 每日致祭每周月致祭及四時大祭應用一切器皿及反坫臺盞桌張酒

樽涼棚几杯壺金銀銅器等項均應由禮部內務府按照

觀德殿

致祭成例應用各件由各該衙門逐細備齊於行饗奠禮後交與

陵

寢大臣收存以備需用俟奉安

地宮後派員繳還各處

一 每日致祭並每周月致祭令值班之王大臣等輪班祭酒其承祭及執事

行禮各員均服青長袍褂冠摘纓每日致祭並每周月致祭令在

值班之王大臣侍衛並

陵寢大臣官員分班輪流齊集

陵



一每周月致祭時刻由在

陵值班之王大臣隨時選擇

一四時大祭禮謹照各

陵四時大祭

遣官致祭之例屆時由禮

部奏

派遣官承祭

一

梓宮前應行陳設各件並一切桌檯几案及簾幙帷幔各套罩等

項由各該衙門自行查照運往近前桌張及陪桌品味數目式樣由禮部內務府自行開單知照

陵寢承辦事務衙門按照辦理

一自饗奠禮後每遇致祭所用鋪秩葦氈紙鏤衣版冥衣燎牀紙牀佛花均

由陵寢衙門備辦

羊隻由陵寢衙門撥用並由慶豐司送乳

牛十隻交

陵寢餵養以備每日對茶奶子其每祭應用油麵肉腥乾

鮮果品以至燒酒黃酒並杯盤匙箸碟碗各項及一切應需應備物料由

陵寢衙門詳細查明有應行咨取者行文咨取應行採買者附近採買

所需銀兩由

陵寢大臣奏明辦理

一凡執事人役並執儀仗人等亦由

陵寢大臣酌量派撥

禮部奏每周月致祭令值班王大臣致祭片

再恭查光緒元年

穆宗毅皇帝暨

孝哲毅皇后梓宮奉移

山陵後每周月致祭常經遵照成案奏請令值班之王大臣每月輪班承祭奉旨依議欽此欽遵在案今本年三月十二日

德宗景皇

帝梓宮奉移至

陵後所有每周月致祭擬請仍照成案令值班之王

大臣每月輪班致祭伏候命下遵行謹附片具奏宣統元年二月二十二日奉旨依議欽此

湖南巡撫岑春煇奏爲恭報奉到

遺誥

遺詔日期摺

湖南巡撫臣岑春煇跪奏爲恭報奉到

遺誥

遺詔日期仰

祈聖鑒事竊臣於宣統元年正月初八日准禮部咨開恭頒

大

行太皇太后遺誥

大行皇帝遺詔到湘仍令將所奉

遺誥

遺詔由驛繳還等因遵卽率同在城文武各官紳耆素服出郊跪迎至公署恭設香案叩頭跪聽宣讀畢舉哀按照禮部奏定禮節敬謹遵行當將

遺誥

遺詔轉齎布政使恭鐫贍黃轉頒各屬欽遵並將用

寶

遺誥

遺詔恭送禮部轉繳內閣所有微臣奉到

遺誥

遺詔日期理合恭摺具

奏伏乞

皇上聖鑒謹

奏奉

硃禮部知道欽此

湖南巡撫岑春煢奏爲恭報奉到

恩詔日期摺

湖南巡撫臣岑春煢跪

奏爲恭報奉到

恩詔日期仰祈

聖鑒事

竊於宣統元年正月二十日准禮部咨開上年十一月初九日

皇上登

極頒

詔天下今由內閣將用

寶詔書領出應頒發各督撫欽遵後

仍將

寶詔繳還等因臣謹率在城文武各官暨紳耆士庶人等出郊跪

迎至公署恭設香案跪聽宣讀望闕叩頭敬將

詔書齎交布政使恭

鐫謄黃轉頒各屬一體欽遵並將用

寶詔書咨送禮部轉繳內閣所有

徵臣奉到

恩詔日期理合恭摺具

奏伏乞

皇上聖鑒謹

奏奉

硃批禮部知道欽此

憲政編查館奏擬定民政財政統計表式的舉例要摺

奏爲遵辦統計政要事宜擬從民政財政入手編訂表式的舉例要請

旨頒行恭摺仰祈

聖鑒事竊維統計之法由來最古周官歲計曰會月

計曰要目計曰成司會考歲成以知四國之治司徒類比法以受三年之要其餘各官言會政致事者甚多而王制亦言大司徒大司馬大司空以百官之政質於天子雖其成式不傳而鄭重統計之意要可概見漢令郡國上計唐令州縣報最至今每屆歲終內外衙門猶有稟奏戶口城隍錢糧倉穀之事此皆關係民政財政大端古今典章未善不合特以日久相沿簿書期會習爲故常祇視爲報政之虛文遂失其立法之本意臣館遵 旨設立統計局奏定辦事章程並由各部院分設統計處各省分設調查局搜輯各種事項彙齊辦理欽奉 上諭統計一項照該館所定表式詳細臚列

按期咨報以備刊行統計年鑑之用等因仰見 朝廷綜核庶政實事求是之至意現各部院所設統計處暨各省所設調查局業經先後奏明成立並據民政部等衙門咨送表冊到館臣等將同館員詳加覆核雖法理尙待精研而事實足資參考義例宜加審別而搜輯已得端倪伏查東西各國所以刊行統計之意非徒磨勘帳籍繪演算式而已將以研究國家之勢力人民之情狀察其消長進退之原以爲比較設疆之準也惟其關係重要故列爲

科學一門中國疆域廣袤民物殷闐政治寬大而相習爲闕疏交通艱阻而遂成爲隔閡州縣之事督撫不盡知督撫之事部院不盡曉創辦統計之初勢難一一賅悉而委曲繁重尤莫甚於民政財政兩門民政以清查戶口爲最難財政以清理款日爲最要方今積習相仍編審既虞紛擾報銷盡屬通融檢門牌則戶戶有脫漏之人查庫簿則處處有參差之數一端已不可究詰况關乎全體之繁是以逐年籌備事宜首以此爲憲政之初基開宗之先務今則清查戶口章程清理財政章程民政部度支部均已奏定通行既有審端致力之方自有循序進行之效所有統計事項自宜一併從此入手以期相輔相成臣等謹督館員參考中西斟酌義類擬訂統計總例十有四條又爲民政統計部表七十有六省表七十有二財政統計部表九十省表八十有八並將所以立表之意填表之法各於表後繫以解說又以財政頭緒糾紛別爲舉要十有二條疏通證明以見新理之發明皆出舊章之蘊蓄中外古今同條共貫惟是格式雖負周詳而事實每多遷變往往例由事起而事與時移此次所擬表式不過取法乎惟輪並非遽懸爲準的將來內外報

告之後尚須刪繁提要逐一改修各該主管衙門職任既專推尋必細如有節目應加增補之處不妨變通填報但期經緯之分明自見循途而合轍日本刊行統計年鑑至今二十餘次宏綱細目屢有更移可爲前證謹將例要解說繕具清單連同表式恭呈 御覽伏候 欽定頒行所有表中應

開事項概以光緒三十三年爲始事必徵前而體必務實藉資比較而免推延擬請 飭下內外各衙門自此次奉 旨文到日起統限半年內務

各查照表式例要逐一確實迅速填報咨覆臣館以備查核不得粉飾稽延以重要政而嚴定限其餘各種表式卽由臣館趕緊接續編訂奏請頒行所有擬定民政財政統計表式酌舉例要緣由謹恭摺具陳伏乞 皇上聖鑒訓示謹 奏宣統元年二月二十日奉 旨已錄

奎瑛等奏恭辦要差遵案請撥銀兩以濟急需摺

奴才奎瑛溥霈希廉跪奏爲恭辦要差遵案請擬銀兩以濟急需恭摺具奏仰祈 聖鑒事竊奴才等接准禮部咨開宣統元年正月初七日内閣奉

上諭三月十一日 大行皇帝梓宮奉移 西陵暫安所有

經由道路著各該衙門及直隸總督敬謹預備是日

皇太后恭送

梓宮禮畢於十三日啟鑾乘坐火車行抵梁格莊

行宮駐蹕勿庸

另備

蹕路十四日恭謁各

陵十五日恭迎

大行皇帝梓

宮暫安禮成十六日仍乘火車回鑾其沿途地方一切應備事宜務從簡省所需經費著楊士驤核實樽節辦理准其作正開銷絲毫不得攤派民間以免擾累欽此欽遵等因奴才等自應遵照成案敬謹辦理察查上廂恭備謁

陵大差廣恩庫無款可籌曾經奏請由直隸藩庫撥銀一萬兩仰蒙

允准在案今本年三月

皇太后恭謁各

陵所有

陵寢急修地面並一切工作以及辦買物料均應早爲恭備惟查廣恩庫歲入各款未能照額解交例支之項尙難如期開放茲值恭辦要差實係無款可籌又兼易州境內行使銅元百貨因之騰貴奴才等除將各屬備差領銀照案切實刪減外凡屬

經臨處所工程遵奉

諭旨務從簡省惟

有仰懇

天恩俯准照案仍由直隸藩庫籌撥銀一萬兩以濟要需應請

飭下直隸督臣轉飭藩司務於二月內照數委解奴才衙門以資應用

差竣歸入廣恩庫年例奏銷謹恭摺具奏伏乞

皇上聖鑒謹 奏奉

硃批著照所請該衙門知道欽此

又奏恭備差遣派人員以專責成摺

奴才奎瑛溥霽希廉跪 奏爲恭備差遣派人員以專責成而資承應恭

摺具奏仰祈 聖鑒事竊奴才等准禮部文行原奏內開本年三月十二

日 德宗景皇帝梓宮奉移 山陵暫安 崇陵工程一時

尙難告竣所有官員人役自應暫緩設立其應行承辦一切祭祀事宜可否

請 旨飭下 陵寢大臣遵照成案奏明於各 陵酌量派撥

官員兵丁夫役以期敷用等因具奏奉 旨依議欽此行令遵照前來恭

查 德宗景皇帝梓宮奉移梁格莊 行宮暫安官員人役既經禮部

奏請緩設自應遵照在於各 陵官員內擇其差務明敏禮節嫻熟者

酌派數員以資承應查有八旗總管義斌翼長吉鍾奉祀禮部關防郎中啓

棟員外郎瑜璞內務府關防員外郎富基郎中選齡尙茶正文英均堪承辦

該管衙門一切事宜俾得各專責成其恭值週年週月四時大祭八旗禮部



承應兵役擬由奴才等隨時酌量派撥至恭備

凡筵前每日奠酒內

務府執事人員除已擬請派有承辦官三員外擬由奴才等再行酌派官二員差役十名以便敬謹將事惟查官員兵役應俟工竣後再行設立現在派撥兵役原擬分隸各

陵謹擬請將

泰陵八旗總管義斌

泰陵禮部關防郎中啟棟

昌陵內務府郎中遐齡暫行兼署

崇陵八旗總管並禮部內務府郎中等缺用資督率管轄以一事權所有陵寢工部應行承辦一切事宜擬飭該部關防郎中熙榮員外郎裕

有遵

旨擬派承辦一切祭祀事宜各官緣由謹恭摺具奏伏乞

命下欽遵辦理所

皇上聖鑒訓示遵行謹

奏奉

硃批著照所請該衙門知道欽此

己酉大政記卷八

文牘四

奉天公署編輯處辦事要綱

一本署編輯事項自改設行省後所有籌畫邊務蒙務軍事交涉以及一切內政凡奏牘文件均應擇要編輯以備考証

二邊務編輯應由本處主任凡卷宗圖說調查報告關於三省邊務者皆依次分類纂入其秘書官內文案電報處所存關於邊務之函電案件應由本處分別函調以資採擇

三蒙務編輯應由蒙務局主任照本處體例一律辦理限四十五日彙送本處覆核編定

四軍事編輯應由督練處主任照本處體例一律辦理限四十五日彙送本處核定所有巡防營務卽擇要附入此類

五交涉編輯應由交涉司主任所有吉江兩省交涉編輯卽行函電兩省照本處體例一律辦理限函到一個月彙齊送奉天交涉司再予限十日由

奉天交涉司彙送本處核定

六編輯之要義如左(甲)舊日之狀況(乙)改良之辦法(丙)開辦之原因

(丁)籌備之方法(戊)籌備之情形(己)擴充之希望

七編輯時先將各項文牘彙齊分別已辦未辦及秘密文件均以次劃清門類再行彙入其關於秘密者另紙抄存

八原來案卷報告等件皆節用原文以存其實惟里俗者酌改之空論者刪節之每類編纂完壁附以案語案語爲全類之主腦亦可發表籌備之意

見聽從 欽帥語氣

九凡與他項事件有關係者不妨擇要節錄如邊地之墾荒開礦通道設官駐兵置電設郵以及關於某項專門實業之類均可於邊務編輯中附述之

十凡有已經籌畫而未及辦者依類附入

十一吉江兩省關於邊務蒙務軍事交涉之重要文件以及各項條陳報告奉省有未及詳者應於該兩省各派員將各項文牘照此體列編輯限一

月彙送本處以便一併彙入

十二本處應辦編輯等件務於兩月內辦齊

十三其他各項編輯如財政裁判民政學務實業巡警旗務等事應由三省各司道分辦者均予一個月送交本處察核其編輯體例另有專章

十四本處派定各員務須每日照公署時刻到處分任編輯不得推諉貽誤

十五本處一切庶務及雜支等項均由承宣廳庶務科代辦

十六本處既無關防其與各廳司道詢問事件悉用函牘以右案贊圖章爲憑

### 黑龍江省沿邊招民墾荒章程 第一章 招徠

一本省沿邊興墾情形恐內地農民未及周知擬俟此次章程奏奉允准之日由本省刊印成冊並繪具荒段圖說咨奉天吉林直隸山東山西河南江蘇安徽江西湖北各省督撫轉飭各屬出示曉諭併責成勸業員將章程圖說廣爲指導其有願赴江省墾地者由各屬就近指赴邊界招待處

以期接洽而免觀望

一漢口上海天津煙台營口長春各處擬設黑龍江省邊墾招待處凡有各該省招送墾戶或公司招集多口以及零星墾戶前來領墾者卽由該處招待處照章妥爲照料

一招致墾戶應於所在地方覓具保結確係務農良民方得由邊墾招待處填給赴江墾戶執照不得需索分文

一來江墾戶携有邊墾招待處執照者除由烟台至營口招商局輪船業經奏准減收船價外其由哈爾濱至松花黑龍兩江之官辦輪船及昂昂溪至齊齊哈爾之官辦鐵路均一律徵收半價其隨帶眷口概免收費以廣招徠

一招徠墾戶應於每年三月內到江以便卽時開種各該省所屬及各處招待處均須明白預算程途日期以免先後參差致悞種作

## 第二章 授地

一民戶赴段領墾者每晌徵收經費銀四錢以充各處辦理墾務之用惟本

省畢拉爾路土人向以牧獵爲生該處協領擬招民戶導引耕種於民戶領地時暫行免收經費俟墾熟後仍照章補收以歸一律

一每戶領地以四十五晌爲限惟墾地公司認領荒地不在此例

一各戶所領地畝到段立予撥給但非墾熟升科後不得展界續領

一公司所領大段荒地非經墾熟後不得讓轉讓費如於領地之後並不實行開墾但思轉販漁利坐令荒蕪不闢者一經查出確有販賣生荒情事立將所領地照撤銷原繳經費概不發還

一凡領墾地畝除領地之本年不計外統於領墾後第三年起一律升科

一各戶領地除墾之本年不計外均於第二年起勘查一次查明墾成熟地若干分別填給大照

一墾戶領墾之地至勘查所分其墾熟地畝三分之二以上者其餘未墾生荒應准一律填入大照照章升科墾熟地畝不及三分之二若應照已墾地畝填給大照其餘未墾生荒概行撤佃另放原繳經費概不發還

一凡報領墾地經營林業者查其已種樹木地方均照熟地一律升科

一前條所定墾地期限，因天災事變迫於不得已，緣由不能依限墾闢者，准其呈候查明分別辦理。

一墾戶墾領荒地後，應於四圍接界處開挖溝渠，各於溝渠之旁排植適宜樹木，以資引蓄而清界限。

### 第三章 資助

一墾戶到段開墾，倘有青黃不接者，准由就近官立銀行號查核實在墾種人口酌予資助，分期償還，其資助章程隨時另行酌定。

### 第四章 獎勵

一各該省所屬招送墾戶在五千人以上，領地過六萬响或二千五百人以上，領地過三萬响者，准其呈請各該督撫咨報江省，分別照異常尋常勞績請獎。

一各處招待員除各該省招送墾戶外，由招待處招致墾戶在五千人以上，領地過六萬响或二千五百人以上，領地過三萬响者，准照異常勞績尋常勞績分別請獎，其招徠不力者，隨時由本省撤換。

一各處荒段新設地方官及設治委員准於沿邊墾務案內積有異常勞績者儘先補授如設治三年其境內新增之戶不及二千五百人及新墾之地不及二萬响者卽行撤換

一領荒地主獨力□□□墾闢升科地至六百响以上者擬請給予七品頂戴八百响以上者擬請給予六品頂戴一千响以上者擬請給予五品頂戴如本身職銜逾於應獎銜秩或不願得獎者准其移獎子弟親族

一凡創集公司招募佃戶墾闢荒地者其發起人准照前條給獎若發起人不止一人准照所墾地數平均分獎如該公司能闢地十萬响招民逾二萬人者查明分別奏請優獎以昭激勸

第五章 附則

一本省各城無業旗丁及各省駐防無業旗丁資遣來江安插者免徵經費銀兩以示體恤其各鎮退出兵丁由各該省資遣來江安插或由本省招致辦理屯墾者伺其來江時統由各處招待處妥爲指導

一本章程適用區域以沿邊興安嶺以外興東愛琿呼倫貝爾等處所轄地



方爲斷

一所有丈地發照折扣一切放荒章程悉照本省向章辦理

江甯藩司燮增祚賀湖廣總督張宮保師入閣啓

竊維長江上下七千餘里而獨賴夷吾不圖 太后臨御四十六年而始相  
司馬一身而兼將相屹然坐鎮於上流夷狄之有君臣相戒勿生於邊事昔  
歲庚子淩虛揆席早被廷推始則東海躡居繼而善化捷得迨彼相既落於  
次對而我公甫晉於叅知荏苒七年卒愜羣望溯有宋最榮使相藝祖已許  
曹彬潘美既而斬之迄近代遙領中書 慈聖以畀湘鄉合肥後鮮繼者今  
兩宮注意安危之局惟一老實兼文武之資誕告大廷爰立作相恭維某  
官斗南一星天際孤鳳當壬午領節旄之始力捍海疆廿六載之狂瀾迨內  
午廢科舉以前已是玉堂十九村之前輩大千世界學堂之籍盡注門生十  
八行省封疆之臣無非後進楚國赫赫姬宗實師嚮熊江漢湯湯 天子獨  
命召虎黃扉紫閣別開幕府之新居堂印介圭本是公家之舊物數行丹鳳  
詔立傳電馬之綸音千丈白沙隄直接火輪之鐵軌當好音入耳若東應西

鳴卽舍人趣裝亦朝發夕至而况仁和東返文華左虛今日新參詰朝首輔  
天闕蒸蒸而上祥源汨汨而來警神鳥三年不飛其飛必速大河千里而曲  
過曲必昌從此被門吏以朱衣任堂餐以金鼎帳下之奇才劍客咸修室闈  
之儀江干之螺女鮫人益起礪舟之敬此則淮西保相前銜猶帶青宮江左  
風流故相深慚綠野者矣某羊家舊鶴渭水新漁桃不實而空負春風黍方  
華而適逢早魃雖蛾眉衆忌去婦甯望於復還而鳳翥遙攀痿人不忘於思  
起恭聞嘉命益罷歸心廣廈萬間來賀較遲於雙燕龍門百尺知音深憫夫  
孤桐 仁待西風徃依東閣門子掃除帥府已共倅魏勃之來老僕改呼相公  
自信非蘇軾之過其爲欣幸實倍恆常

廣東藩司胡會同勸業道 詳覆兩廣督憲普設家族工藝廠辦法文  
伏查爲政之道不外教與養工藝廠實爲富養於教之一端致富之良圖弭  
盜之要著粵省地廣人稠農田山澤之利未盡蕃興衣食不足而盜心生故  
匪徒猖獗終歲誅戮以千百計而盜風仍未少衰豈真惡不畏法歟殆山遊  
手奸閒謀生乏術饑寒交迫挺而走險耳故論今日弭盜以善以教化務爲

夏莫善於工廠之設顧官中所設工廠校地有限人憚遠出招集不過千百而什一焉其勢萬難遍及欲期大衆普及尤非同辦家族工藝廠不爲功方今 明詔屢頒振興實業猥以職道承其乏受事以來日夜兢兢伏讀憲台批示有根本至計無逾於此之諭仰見盡慮周詳爲粵民除疾苦籌生計胥於此造其端廣東地方遼闊通省計九十五廳州縣土壤腴瘠不同各鄉各姓貧富不一創辦之始擬請先從廣州府屬之南海番禺東莞順德香山新會六大縣入手蓋六縣之中富戶較多易於集事如從巨鄉大族舉辦責成各地方官調查祠產實力勸導諭令公正紳耆集衆公議提撥一面規地建廠或就本族祠堂試辦延雇匠師購買器具凡族內無業閒人收留入廠量其才力各教一藝並酌限時期開辦務底於成以爲之模範其他各廳州縣有聞風興起者亦准一律仿照辦理至於較爲僻遠之區風氣未盡開通則俟勸業員考取派定後再行分赴各廠勸辦以期逐漸推行而收普及之效一切章程卽由該族紳耆等各就本處情形詳細擬議並將撥入本族工廠人名造具清冊稟由地方官核明通稟立案至於應撥祖管若干廠中如

何支用概由該族紳耆等籌畫經理月結榜諸廠門年結刊刷徵信錄務期家喻戶曉地方官專任稽查督率考核成績以覘實驗不必爲之經手銀錢如經理紳耆有侵漁浮冒等弊爲衆攻訐地方官有權追賠撤換如此分別審定由一姓而推於萬姓由一鄉而推於衆鄉由一縣而推於各縣祖嘗多者大辦祖嘗少者小辦務使族中游惰人人皆習工藝人人能自營生默化轉移爲盜必鮮綜核該縣丞所擬大綱辦法除第一二三則均可照行外其第四則謂紳耆教養無效流入匪類事發訊明連坐以罪等語查父兄不能禁約其子弟爲盜原有治罪專條惟桀驁不馴之徒強梁成性德禮所不能化者法律有時而窮罪其父兄未爲過當然父兄亦有時而不能約束非其族黨則房族大者丁口以萬千計動相連坐人人自危紳耆將視爲畏途吏胥且從而魚肉不免因噎廢食於開設家族工藝宗旨轉多刺謬應將第四則連坐一條概予刪去但責族中遊惰盡令收廢習藝如有流入匪類以及屢誡不悛隨時送官究辦父兄故縱照例治罪庶幾寬嚴得中易於遵守倘能辦有成績由地方官詳請賞給功牌或給之扁額以資獎勵其有改良工

藝殫精仿造確有進步並准詳請咨部照章酌給商牌藉示優異總之家族  
工藝嚴責雖在於紳耆而設法提倡盡心勸導仍惟地方官是賴語曰有治  
法尤貴有治人是在身膺民社者實力奉行於事乃克有濟(後略)

江督端 札甯藩司准度支部咨奏准部用緞疋等款照案派辦文

爲抄粘札行事宣統元年正月初六日准度支部咨庫藏司案呈本部具奏  
年例部用緞疋等款照案派辦並將裁撤江甯織造改歸蘇杭兩處織辦分  
別開單一摺又循案奏派江蘇布疋一片於光緒三十四年十二月二十五  
日具奏本日奉 旨依議欽此相應鈔錄原奏附片清單恭錄 諭旨

依咨行兩江總督遵照可也等因並抄奏到本部堂准此合就抄粘札到該  
司立即遵照辦理毋違此札

己酉大政記卷八

摭言五

論華商宜注意長江航業之競爭

現今世界所恃以爲交通之用者鐵路而外惟航路而已然鐵路不容數軌並馳而航路則可千槽競進是鐵路無競爭而航路有競爭我國揚子江一水綿亘七千餘里可與美洲之密士失必河非洲之尼羅河西伯利亞之烟尼塞河相頡頏於以產出全國之文明運輸各地之商貨如人身之有滋養源泉之一大血管爲我國所頃刻不可缺者而自宜昌以下東抵海門上下三四千里間尤爲民物殷富之區人文薈萃之地是故言乎全國航業之競爭必自揚子江始溯海禁未開之前往來揚子江之大小帆船已以數萬計及中外立約先開五口通商外人之商輪許其駛入各口於是太古怡和旗昌三公司次第成立至庚子一役以後英公使要求實行一千八百九十八年所訂內河行船條約政府允之他國乃圖視而起所有揚子江上下游航業之利向爲華商所自有者至是遂大半入於外人掌握據去年西報之調查各國泛船之往來於上海漢口之間者合計約三十

艘噸重共五十七萬餘噸英占其十日占其十德占其三法占其二而屬諸華商者僅五艘而已此外尚有由漢口以達長沙之英日兩國汽船五艘總計以上航利之入於外人之手者幾居十成之九而我國則除招商一家而外絕不聞有繼起者焉則揚子江航業之利其不盡爲外人所攫奪者幾何耶更以沿江各地之商務證之自重慶鎮江通商之口岸凡十處而去年進出口貨共值關平銀一百十五兆四十七萬兩有奇較前年增二十五兆幾占全國進出貨額四分之一故僅以各汽船之往來運費而論已達銀二百餘萬兩而將來日興月盛尙不止此數夫商業之發達在揚子江則日見進步而航業之競爭在我華商則日見退步局外者能無爲我華商危雖然我華商不知自危而局外代爲危之無裨也我華商而苟知自危則目覩此競爭劇烈之情形其必有所以處此英人爲世界上之海王汽船之多至二千九百二十九艘美國次之亦有八百四十六艘（見前年太晤士報）我華商之力固萬不足以臻此矣然而商家之營業獨舉則力薄而艱難積集資則勢雄而事易集試觀彼外人汽船之專駛揚子江者皆公司耳其以個人之資格擲數十百萬之母財以獨樹一幟者未之聞也我華商誠能仿公司之辦法則有百萬

之成本即可購置商輪三四艘即可載重十萬噸左右縱我華商力量淺薄然積微成鉅百十萬之資本尙易爲力要知航路之利苟盡握於外人則泛船所至之地即商力所至之地商力所至之地即國力所至之地其足以爲我國之損害者與鐵路初無少異我華商咸規近利而昧遠圖故恒若熟視無覩耳不然其有不以集腋之謀爲補牢之計者哉吾敢以一言正告於我華商曰商業愈興則航業愈厚外人之競爭亦愈甚際此門閥洞開漏卮橫溢之日有志者莫不投袂而起是以前年粵省七十二行商發起兩粵華商輪船公司郵傳部亦擬聯合南洋羣島華僑創設航業公司惟其航行之線皆在南洋各埠及美澳兩洲而於揚子江一帶則未之籌及殊不知航業之組織腹均更易於外洋而利權之挽回內國尤急於外海如治疾然先心腹而後股肱斯元氣實而外邪自漸以除也嗚呼時不可失事在人爲我華商其念旃我揚子江流域之華商其念旃

### 論人口之增加

陽小歐

吾國人口皆聽其自生自滅出洋不知回籍不知婚娶不知生育不知被人虐待不知攻擊不知疾病死亡不知蓋幾幾乎不關痛癢矣近者始有調查戶口之議今後民籍或有



詳析之數乎按中國昔者素重民籍周禮特設專官孔子聖人有式貢版之敬朱子注稱其重民數是知古人于民間生齒之事視之最重蓋無人民即無土地無土地即無國家一國之中自不能不講究生民也是故吳王謀生聚頗聞日本昔日亦甚重生聚之法寧稍捐棄禮法以求達此目的其重視可知矣吾國素尙早婚又素重子嗣其民數之發達應視各國爲較速徒以擾亂頻仍或數百年而一殺或數十年而一殺生機之窒半緣于此又加以不知調護疾病癘疫視爲天然而不知以人事爲補救故視各國人口增加之率或竟瞠乎後焉則大可哀也

茲將歐洲各國之人口之增加分列如後以供吾人之省覽焉抑亦有國者之所當留意矣乎

一千八百零一年

國名	人口	百分比
法國	三七、三五〇、〇〇〇	二〇、六一
奧國	二五、〇〇〇、〇〇〇	一八、八四

德國	一三、一八〇、〇〇〇	一七、四七
義國	一七、二四〇、〇〇〇	二二、九九
英國	一六、二〇〇、〇〇〇	一三、二一
瑞士	一、八〇〇、〇〇〇	一、三六
比國	二、二〇〇、〇〇〇	一、六六
和蘭	二、一〇〇、〇〇〇	一、五八
瑞典	二、三五〇、〇〇〇	一、七七
諾威	八八〇、〇〇〇	六六
西班牙	一〇、五四〇、〇〇〇	七、九四
葡萄牙	二、九三〇、〇〇〇	二、二一
丁抹	九三〇、〇〇〇	七一
合計	一三三、七〇〇、〇〇〇	一〇〇、〇〇〇
一九〇八年		
即光緒三十四年		

國名	人口	一年增加率	百分比例
德	六三、四〇六、五二〇人	一、五二	二、三九
奧	四八、四六五、〇六〇	九一	一七、一二
英	四四、八八五、八二一	九九	一五、八五
法	三九、三七〇、〇二四	一五	一三、九一
義	三四、一五二、九二四	七四	一二、〇六
西	一九、九四三、六九四	八九	七、〇四
比	七、二四五、〇九六	一、〇三	二、五六
和	五、八二九、二一九	一、四五	二、〇六
葡	五、七四四、一八一	七四	二、〇三
瑞典	五、四一、二二八	七一	一、九一
瑞士	三、五三九、一〇六	八三	一、五二
丁	二、六二二、五八四	一、一〇	〇、九四

諾

二、四七八、三七一 一、三三三 〇、八八

合計二八三、三三六、八一八

一一〇〇、〇〇〇

滇省鐵路始末記

法國獲得修路權之緣由 法國之獲得該路因聯絡俄德干涉日本令其還付遼東半島法以是事示恩中國他國未要挾利權以前籠絡中國竊訂密約開放口岸裁減關稅在滇粵桂等省獲得採鑛之權如英國勢力範圍亦入而爭利遂至得將越南鐵路延至雲南省城也初西歷一千八百九十五年六月法國駐華公使西拉晉謁慶邸提議改修境界及通商等條約當經議定略云延展越南鐵路至雲南省城倘中國債自修滇省鐵路須聯接越南路等語是獲得滇路之緣由也於是法國經營南服基礎大定牢不可拔雖英亦久滯南服遂爲法國先著祖鞭亦無奈何矣是後法國商界聯絡一氣組織中國調查會廣派專家前往中國粵桂滇黔川等省均經踏查農礦實情商工現狀山河形勢人口多寡詳細調查歷如指掌又關於該地方英商舉止細心攷察隨時報告於是法國上下皆得洞悉中國事情而法政府方針大定以待機至已而德據青島獲魯省鐵路俄

**Page not available.**

Please help scan and add.

页面不可用。

请协助扫描添加。

己酉大政記卷八

譯海七

美新總統發表政見

美總統塔夫脫君就職演說之詞凡前任總統羅斯福對於托辣斯梯聯邦之中央政府監督鐵道各問題均舉其中諸事無不默許

塔夫脫君欲於西三月十三日（即華二月念二日）特開國會公議下格里所訂稅則以冀編入新稅則使外國人口貨之價值與國內所產各貨之價值相等籍以維持相等之國課保護國內之實業按近日情形所徵各稅當增富減情勢互殊查今歲國用已逾所入之額多美金一百兆元須由稅則上求實在相當之入款以彌補此項缺款

塔夫脫君又言保守太平洋之局能防護美國利益者莫要於海軍故海陸兩軍須竭力轉賴以冀達至高之程度

又云吾人所川政策務必溶發太平思想並贊助一切裨益世界之事加海牙平和會之裁判廳及裁判約章皆以求免戰禍爲主各國備戰之事須設法從中阻止萬不可任其

勢力過於吾美

國際爭端之起於東方者皆因洞洞門戶之政策及其他意外之事美國須竭力維持利益勿令損失並保守其公正之要求不僅以外交之法爭權利也由事言之海陸軍經自不可從事省節以致減損美國之國勢且吾國民之暫時僑寓外國者每因宗教或種族起見致成交涉美國應以全力抵制

又言國民爲東亞移民問題勿得無故致起爭端尤望政府消除此種惡習此問題應由各國政府與美政府通融辦理總宜互相退讓以息紛囂目下國民中如有懷種族思想反對與美有約章之外國僑民應勸導或設法懲儆務使外人不以我美爲野蠻

又云須訂新律使中央行政官實行外國僑民在中央公堂之約章權利萬不准本國臣民偏執已見以致釀成戰禍改革國法及銀行律例俾國幣流通并望國會鼓勵外國貿易而東方及斐列濱之商務尤當注意

巴拿瑪運河工程之完美足使國人咸稱滿意至於尼格羅人民宜從實業上先行設法開通其智慧

美報論華工禁例事譯聞

美國某報云近日美國商工部卿士多羅氏擬將關於廢弛華工禁例之政見條呈議院查多羅氏於華工禁例一層研究多年曾自至加拿大檀香山太平洋各埠調查禁例之情形去年又舉三藩市人委姆爲商工部副卿而委氏於華工禁例亦頗有心得故多羅氏與之協商擬成此條呈以冀議院之採納也據該條呈(中略)言華工禁例自頒立以來毫無實效既耗美國之資財又傷中國之感情而華工之紛至沓來仍如故也故聞美國英倫之某堂官三年之中共釋去偷進美境之華工一千餘名每人予以合例居美之護照一張詢其何故曰若輩美國土生華人也此種護照仍有見於今日關員遇之付諸無可如何而已且近年以來中國政府及上中下人民以美國禁例之故大傷其友美之感情昔年曾有杯葛美貨之舉以致美國在中國之權利大受退縮之影響此其明證也今欲行一法既不耗美國之資財又不傷中國之感情而一面又欲行之有效則莫如將華人入美之禁例廢弛並將管理華僑之委員撤退使華僑之在美境及入美境者與各國在美境之僑民一律看待以僑民委員管理之長者華僑委員祇能管理華僑今



此條若能批准則各僑民委員皆有管理華人之責團體大而易於辦事若遇華人之無合式護照不合例居美者一概歸回中國今此政策與勞總統於西一九零五年十二月五號所降上下議院之意見書適相符合（勞總統之政策曰美國設華人之禁例是禁不合例居美之各種工人凡華人之合例來美者吾美當歡迎之云）則目前之政策是亦優待合例來美之華人使合例來美之華人易於入境而不復嚴禁華工人入美也若華工禁例不即廢弛則於形式上顯以不平等之法律待中國與實際亦毫無成效耗費公款辦事掣肘吾美何必徒具此不損人不利己之政策耶云云

最近列國之新造軍艦

查一千九百零八年以降各國之新造兵艦如左

德國

戰艦

四隻

大巡洋艦

一隻

小巡洋艦

二隻

應囑船

一隻

此合計噸數

九萬五千八百七十噸

英國

戰艦

二隻

小巡洋艦

一隻

此合計噸數 四萬二千四百七十一噸

合眾國 戰艦 三隻 載炭船 二隻

此合計噸數 七萬八千五噸

佛蘭西 大巡洋艦 一隻 此噸數 一萬四十噸

伊國 大巡洋艦 三隻 此合計噸數 二萬八千四百十八噸

奧地利 戰艦 一隻 此噸數 一萬四千五百噸

伯刺西爾 戰艦 一隻 此噸數 二萬一千五百四噸

亞爾然丁 裝甲砲艦 二隻 此噸數 二千噸

丁抹 裝甲海防艦 一隻 此噸數 二千六百七十九噸

俄羅斯 裝甲巡洋艦 二隻 此合計隻數 二萬三千七十噸

### 東省官界之混亂

瀋陽專電云奉天左參贊梁如浩右參贊錢能訓吉林巡撫陳昭常濱江道施紹基奉天勸業道黃開文其他與徐菊帥唐少帥有深厚關係者今者皆被言官彈劾東三省官界

爲之混亂 又徐菊帥當不遠歸京以故三省各司道近日陸續來奉天面晤徐菊帥磋商任內一切之要政以備新舊總督之交代目下菊帥爲預備其交代事務額極壯碌聞其所最難即財政事務之交代也夫三省之財政有巨額之缺陷固不待言官吏而有三月薪金未領者其他爲種種彌縫之計借用諸銀行之款菊帥自己之私債亦不少而近日屢被人參劾故不堪痛苦而放聲流涕者不止一再云

#### 德法協約之內容

德法兩國關於摩洛哥協約已於西歷二月九日在柏林講押其協約內之要點如左

一 法國絕對的尊重摩國之領土保全及獨立主義持列國在摩國經濟上之均等故對於德國商工業之利益絕不妨礙 二 德國於摩國惟以經濟上之利益爲目的法國於該國有政事上之特別利益承認維持摩國之安寧秩序與有密接關係之事不執反對之行動 三 兩國政府因已國或他國之措置遇有無庸取經濟上特權之傾向或應委於個人經業之事業務准兩國人民共同從事

已西大政記卷八

譯電八

倫敦電○巴黎消息法國海軍大臣比喀爾德氏現在允許將前訂海軍經費二萬二千三百萬佛郎減為三千萬佛郎須另訂海軍章程

紐約電○美國遊歷太平洋艦隊現在舊金山停泊總司令官海軍大將司伯爾氏諭令各艦駛往各港停泊聞美政府擬於一年內再組織艦隊兩部共艦十六艘

路透電○美國新總統戴夫德氏履新之日有火車六十輛爲害所阻車中均係致賀之人又有數千人阻於各城向例履新典禮應在城中舉行戴氏特在議院舉行是日接見文武各員約四萬餘人遊歷太平洋艦隊海軍下士亦在其內此次典禮共用二十五萬磅聞前總統赫爾斯福氏回紐約時途中阻雪在巴德莫爾地方停避數小時之久云

又電○英議員比理洛氏在布里斯陶爾地方宣言美國新總統戴夫德氏提議擴充軍備問題實欲使美國海陸兩軍強大此事於英屬大有妨礙(指坎拿大)英國亦擬加

增經費擴充一切以保沿海利權

路透電( )英海軍現將海軍經費核准共三千五百一十四萬二千七百磅去年經費共三千二百三十一萬九千五百磅添造兵艦經費八百八十八萬五千一百九十六磅去年添造費共七千五百四十萬五千二百零二磅并造德瑞納提號式大戰艦四艘西七月造二艘十一月造二艘再造巡防艦六艘魚雷艇二十艘潛水魚雷艇多艘飛艇一艘共須經費五十萬磅海軍大臣堪納氏提議速造裝甲巡洋艦四艘以濟要需因列強均擴充軍備所有各艦均於一千九百零十年四月修造於一千九百十二年三月告成

又電○中國前總稅司赫德氏擬籌辦十萬磅的款在北京設立醫學堂并在他處設立醫學堂三處教授中國人練習醫學聞赫氏擬於西三月十六號在曼森公所會議此事

六賊細數比較

監守盜如經紀車戶船戶之類均是盜者不分首從併賊論罪者有管掌倉庫錢糧之責非但官吏凡經營官之人

一兩以下杖八十 一兩至二兩五錢杖九十 五兩杖一百 七兩五錢杖六十 十兩

杖七十 徒二年 十二兩五錢杖八十 十五兩杖九十 十七兩五錢杖一百 二十

杖一百 流二千里 二十五兩杖二百 三十兩杖三百 四十兩斬

按以上流罪斬罪均係雜犯雜犯三流總四年雜犯斬絞准徒五年現例一

千兩以上實擬斬候一百兩以上分別實擬流罪

常人盜常人對監守者而言無論軍民官吏凡無監守之責者為是若盜倉庫錢糧亦不分首從併賊論罪

一兩以下杖七十一 一兩至五兩杖八十 十兩杖九十 十五兩杖一百 二十兩杖六十

二十五兩杖七十 三十兩杖八十 三十五兩杖九十 四十兩杖一百 四

十五兩杖一百 流二千里 五十兩杖二百 五十五兩杖三百 八十兩絞

按以上流絞亦係雜犯現例從重一百兩以下不分多寡首犯發煙瘴充軍

一百兩以上實擬絞候為從減等

竊盜 以一主爲重併贓論罪爲從減一等鞠摸者罪同

一兩以下杖六十一兩以上二十兩以下杖七十二二十兩八十三兩九十四

十兩一百五十兩杖六十一六十兩杖七十七十兩杖八十二八十兩杖九十三

九十兩杖一百一百兩杖一百二十一百一十兩杖一百二十一百二十兩杖一百三十

百二十兩以上絞監候

枉法贓

謂受有事人財而曲法處斷者各主者通算全科無餘人贓一等一百二十兩絞監候

一兩以下杖七十至八十兩實擬絞監候計數之法與常人盜相同但彼流

絞係雜犯此是實流實絞耳

不枉法贓

雖受有事人財而判斷並未曲法者各主者通算折半利罪一主亦折半利罪無餘人贓一等罪止流三千里

一兩以下杖六十至一百二十兩以上絞監候計數之法與竊盜同

坐贓致罪

凡官吏人等非因事而受財如送慶賀或私借所部內牛馬衣物之類又如被人盜財賠償之外多受人財或秤斂財物多收解

而而不入己者或造作虛費人工物料之類非贓而分不應受無贓而罪不免故不曰計贓而曰坐贓在凡人為交際之常在吏即為坐贓所以杜貪污之漸也此六贓之最輕者

一兩以下答二十一兩以上二十兩以下三十二兩四十三兩五十四

十兩杖六十五十兩七十六兩八十七兩九十八兩一百一十兩杖

十徒一百兩杖七十徒三百兩杖八十徒四百兩杖九十徒五百兩

按六贓而外又有挪移出納一項雖非監守自盜亦有應得之罪律係計贓

准監守自盜論罪止滿流例則分別五千兩以下者照律擬雜犯流五千兩



以上者實流三千里一萬兩以上發近邊充軍二萬兩以上斬監候仍勒限  
一年二年三年追完分別減免

宣統元年閏二月初五日第十二册

己酉大政記

馬百大烟譜

宣統元年閏二月十五日癸亥十二冊

已酉大政記卷九目錄

諭旨

由二月二十九日起  
至閏二月初三日

紀事 十六則

摺奏

郵傳部奏核銷贖電收支用款 併單

考察憲政大臣于式枚奏譯注普魯士憲法全文

度支部會奏設立財政學堂酌擬章程 併單

禮部奏 監國攝政王祇領 冊寶及祇告各禮節

禮部奏王公百官班見 監國攝政王請 欽定日期

文牘

浙江諮議局議案預備會啓

古巴限制華民之新案

禮部通行各衙門

德宗景皇帝梓宮奉移後預備大小祭禮事宜文

摭言

滇省鐵路始末記 續

鄂督整頓吏治

譯海

俄邊糧業之調查 列國競造新式兵艦

各省礦業調查表 東蒙古之交通機關

俄國海軍之現狀

新煤比較之功用

日人在滿洲之進步

歐洲外交界之近狀概畧

譯電 一頁

附錄

大清律例講義 犯鄂自首

己酉大政記卷九

諭旨一

監國攝政王鈐章

宣統元年二月二十九日內閣奉

上諭廣西左江道員缺著紀堪謹補授欽此

軍機大臣署名奕劻世續張之洞鹿傳霖那桐

監國攝政王鈐章

二月三十日內閣奉

上諭度支部奏酌擬清理財政處各項章程一摺清理  
財政爲預備立憲第一要政各省監理官又爲清理  
財政第一關鍵所有正監理官著該部自丞叅以下

開單請簡俾昭慎重其副監理官著卽由該部奏派  
餘依議單併發欽此

軍機大臣署名奕劻世續張之洞鹿傳霖那桐  
監國攝政王鈐章

二月三十日內閣奉

上諭廣西桂林府知府員缺緊要著該撫於通省知府  
內揀員調補所遺員缺著敦崇補授欽此

軍機大臣署名奕劻世續張之洞鹿傳霖那桐  
交旨

二月三十日

監國攝政王鈐章

軍機大臣欽奉

諭旨貝勒載洵等奏謹將

崇陵規模邊樣全分呈覽一摺又片奏請飭欽天監於閏

二月內敬謹選擇興工吉期等語均著依議欽此

軍機大臣署名奕劻世續張之洞鹿傳霖那桐

電旨

監國攝政王鈐章

閏二月初一日奉

旨趙爾巽電奏悉四川按察使江毓昌署提學使趙啟

霖均著迅赴新任趙啟霖毋庸來京請訓欽此

軍機大臣署名奕劻世續張之洞鹿傳霖那桐

假



監國攝政王鈐章

閏二月初一日奉

旨陸徵祥電奏悉著賞假兩個月欽此

軍機大臣署名奕劻世續張之洞鹿傳霖那桐

假

交旨

閏二月初一日

監國攝政王鈐章

軍機大臣欽奉

諭旨領侍衛內大臣奏一品廕生榮齡或作爲三等待衛抑或作爲四等待衛請旨一摺榮齡著作爲三等待衛欽此

軍機大臣署名奕劻世續張之洞鹿傳霖那桐  
監國攝政王鈐章

閏二月初二日內閣奉

上諭三載考績爲國家激揚大典內外滿漢諸臣有能  
共濟時艱勞勩最著者允宜特加甄叙其平庸衰病  
者亦難曲予優容茲當京察屆期吏部開單奏請朕  
詳加披閱軍機大臣總理外務部事務慶親王奕劻  
謹慎忠純勤勞懋著竭誠籌畫悉協機宜著交宗人  
府從優議叙大學士世續張之洞協辦大學士尙書  
鹿傳霖大學士那桐同心襄贊共矢慎勤均著交部  
議叙大學士孫家鼐老成厚重衆望交孚新授東三

省總督錫良力任艱鉅勞怨不辭直隸總督楊士驥  
宣勤畿輔籌畫精詳兩江總督端方規模宏遠應變  
有方山東巡撫袁樹勛籌辦新政任事實心均著交  
部議叙民政部右侍郎趙秉鈞聲名平常著原品休  
致餘著照舊供職欽此

軍機大臣署名奕劻世續張之洞鹿傳霖那桐

假

監國攝政王鈐章

閏二月初二日內閣奉

上諭民政部左侍郎著烏珍補授林紹年著調補民政  
部右侍郎欽此

軍機大臣署名奕劻世續張之洞鹿傳霖那桐

假

交旨

閏二月初二日

監國攝政王鈐章

軍機大臣欽奉

諭旨清明令節致祭

奉先殿後殿著派貝勒載潤恭代行禮欽此

軍機大臣署名奕劻世續張之洞鹿傳霖那桐

監國攝政王鈐章

軍機大臣欽奉

諭旨吏部奏恭遇恩詔應否給廕各官開單請旨一摺  
其曾任實缺應給廕者著准其給廕餘均毋庸給廕

欽此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉

諭旨吏部奏遵議兩淮鹽運使趙濱彥處分降一級調用公罪可否准其抵銷一摺著准其抵銷欽此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉

諭旨呂海寰等奏濟南黃河橋空加寬派員核實勘估一摺著該大臣等隨時體察情形妥慎辦理又奏改

派直隸公司總理協理各員一片又奏援案請將回籍壽商路事各員免扣資俸一片均知道了欽此  
軍機大臣署名奕劻世續張之洞鹿傳霖那桐  
監國攝政王鈐章

閏二月初三日內閣奉

上諭倉場侍郎著俞廉三補授欽此

軍機大臣署名奕劻世續張之洞鹿傳霖那桐  
監國攝政王鈐章

閏二月初三日內閣奉

上諭左翼總兵著鶴春署理欽此

軍機大臣署名奕劻世續張之洞鹿傳霖那桐

監國攝政王鈐章

閏二月初三日內閣奉

上諭都察院奏現屆舉行京察之期謹將聲名平常未孚衆望之員據實叅劾一摺給事中李灼華掌雲南道御史俾壽掌浙江道御史常徽均著回原衙門行走欽此

軍機大臣署名奕劻世續張之洞鹿傳霖那桐

假

交旨

閏二月初三日

監國攝政王鈐章

軍機大臣欽奉

諭旨欽天監奏選擇

崇陵興工吉期一摺著於閏三月十七日敬謹興工欽此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉

諭旨都察院奏代遞吏部員外郎黃允中條陳立憲期  
近學務有關憲政敬擬管見呈一件著學部知道欽  
此

軍機大臣署名奕劻世續張之洞鹿傳霖那桐

假

監國攝政王鈐章

軍機大臣欽奉



臣等謹將  
一  
臣等謹將

諭旨都察院奏代遞廩生趙榮章等移墾實邊條陳一  
件着農工商部知道欽此

軍機大臣署名奕劻世續張之洞鹿傳霖那桐

假

己酉大政記卷九

紀事二

攝政王手諭照道○聞日前 監國攝政王親自手諭本邸回事處嗣後凡有進送禮物者一律壁回不得收受仰見 賢王之潔己奉公以身作則矣

樞臣新定各部院具奏規制○內廷消息樞臣新定奏事規制探之議定辦法各部院衙門如於值日之期有具奏事件應於前日呈遞膳牌以奏事處其平日各該部院遇有加班具奏之件亦應前一日呈遞奏片至言官封奏都察院代遞各呈仍於當日遞牌以爲定制云

政務處擬辦議摺之新章○會議政務處王大臣於日前面交該處吳菊若提調大致謂嗣後交議各要摺勿庸議期前請示辦法應於交到次日先由諸提調擬辦議略俟至議期雖俟諸王大臣核定其應會同各部院衙門議辦之件亦照此先行會同擬議以免阻延云云

陸軍用之無線電○義國科學名家馬爾坤氏發明遠通無線電信以來歐美列國爭先

用之海軍日本海軍與俄國戰仗之際東鄉提督亦用以通軍事上之消息而頗見効然在陸軍當時未之運用耳至昨年日本陸軍大演習之時始試用此電據聞當時使用無線電信機器一駝載之物又一車載之物而主用德國雙鳴式之無線電其通信之距離駝載之者約日本之十里而車載之者約達日本之二十五里稍見成效云元來陸上無線電信由電波之關係上彼此通信所之間由岳丘陵橫斷之處窒礙必生又由天候氣候之關係上亦必有窒礙而比於海上之無線電信頗有所困難其所以使用不如在海上靈利也雖然在今之陸軍以無線電信之需用雖日急迫陸上無線電之研究現在日本陸軍汲汲乎實行漸見其進步云惟此陸上無線電之用法將次第研究而得其秘訣乎必於陸軍之戰術上當奏莫大之効果也

議辦調查旅華外人表册○樞府與外務部梁尙書提議擬由外務部通咨各省所調查局將本省各屬及商埠旅居之東西洋教士商民詳細調查分別國籍職業年歲旅華年月有無不動產業造具表册報部以備查核云

外部將修訂約又疑考書○前外務部袁尙書曾於上年電飭出使各國大臣令將歷來

中國於各國所訂專約通約各約章分別編譯彙案送部編輯成書分送各省督撫以備講習外交一事今經梁尙書重提是議擬將各出使大臣業經咨部之件先行擬辦其未經咨送者仍應電催前聞梁尙書與諸總理會辦兩王大臣商定除將庚子以前各約章先行編訂外其庚子新立各約凡係有傷國權各條亦擬酌爲更訂云

議入萬國版權公會○學部農工商部會議擬訂著作版權一事俟將條律專利限期註冊事宜決定宣布後再與各國公使商議入萬國同盟保護會以重版權

宣布十五日之上諭○樞府提議以 朝廷恐人心無定不知趨向於本月十五日特頒明白宣示實行立憲維新圖治之上諭以定國是猶慮草澤下民不能週知深負朝廷之意擬請將此日 諭旨通飭京外各衙門宣布於城鄉各鎮咸使聞知以示趨向而定國是

東三省奉天各國游歷人數表○奉天自日俄戰後東西各國士商來奉游歷考察日俄戰跡者運袂接絡絡繹不絕茲聞去年自春至冬游歷人數共有四百餘名今將人數及國名統計列表於後

一、二、三、四、五、六、七、八、九、十、十一、十二、十三、十四、十五、十六、十七、十八、十九、二十、二十一、二十二、二十三、二十四、二十五、二十六、二十七、二十八、二十九、三十、三十一、三十二、三十三、三十四、三十五、三十六、三十七、三十八、三十九、四十、四十一、四十二、四十三、四十四、四十五、四十六、四十七、四十八、四十九、五十、五十一、五十二、五十三、五十四、五十五、五十六、五十七、五十八、五十九、六十、六十一、六十二、六十三、六十四、六十五、六十六、六十七、六十八、六十九、七十、七十一、七十二、七十三、七十四、七十五、七十六、七十七、七十八、七十九、八十、八十一、八十二、八十三、八十四、八十五、八十六、八十七、八十八、八十九、九十、九十一、九十二、九十三、九十四、九十五、九十六、九十七、九十八、九十九、一百

國名	人數
日本	三百〇八
英國	四十
法國	七十
德國	十八
俄國	三
美國	十三
奧國	三
和國	一
瑞士	一
總數	四百〇四人

〔附註〕右表專指奉天府屬而言如游歷吉林黑龍江以及蒙古直隸等省經過奉省者並有無約帝國商民來奉游歷未發給護照者尙不在內

直隸津浦車輛德廠賤價攬造○津浦鐵路擬購用三十噸車一百輛十五噸車六十輛  
經京奉路局唐山造車廠開出價目較之德國威益喀列廠所開價單三十噸者每輛實  
貴二千六百馬克十五噸者亦貴四百餘馬克津浦總工程師德浦彌勒並謂德廠所造  
之車其車輪車底較唐山所造者堅實精良而價反能廉至二千馬克云云該公司督辦  
大臣等深恐利權外溢以京奉津浦同爲中國自造之路若能通融辦理可不再向德廠  
訂購爰行文郵部參商郵部以既係同爲國家之路苟能不虧成本其所請通融辦理一  
節自可照辦爰札行京奉路局切實將價核減聲覆

粵局仿製新槍之精利○粵省各大憲因擴充新軍特飭製造局將製造軍械認真改良  
擴充並仿製各國新式槍砲日前該局復仿製新式五響毛瑟槍一種異常精利不亞外  
來將仿製槍式呈陸軍部核驗該部深爲嘉獎並飭粵省新軍一律換用此項鎗枝以歸  
劃一應卽廣爲趕製以備改用

黑龍江稅收總額○黑龍江省稅捐收入總數去年一年中經度支司詳細調查計百貨  
一成捐二十四萬四千六百七十六串九百九十文魚稅二萬三千五百九十九串三百九

十六文賦稅五千三百九十七串三百八十四文木稅九萬一千零七十串五百十文山  
貨及皮類五千一百二十七串六百十四文車捐八千八百六十七串鹽捐三萬三千七  
百四十串九百十二文以上皆錢合計四十一萬二千四百七十串零八百零六文以上  
皆錢又土藥稅每百兩抽收二兩計銀一千三百七十九兩

國際

雲南法國經營滇越鐵路近情○法國越南政府現借英金二百一十二萬磅以充雲南  
鐵路建築費由政府擔保聞該路報告員特倫克爾爲交趾支那議員曾將十年前法  
國獲有該路築造權以來該路財政及各種變遷情形詳爲審查據稱該路各事現復更  
改綜計築費須英金六百六十二萬磅原估費額僅三百八十四萬磅所增之數由該屬  
地籌撥二百零六萬磅餘由該路公司籌足此後築造工程將較前此慎加督理以免再  
有糜費惟勞開至蒙自一段工程最難現以實際論之可謂已成大約西四五月間可築  
至蒙自此段開車後於全路輸運事業將大有影響逆料一千九百零十年此路可以築  
至雲南省城就已經開車各段之成效觀之該路築造雖不無糜費將來全線告成所獲

必豐而與法屬越南之財政蓋大有裨益云

葡人佔澳門界之證據○澳門佔界一事日前經粵督飭由該廳丞將前後被佔地方查報在案惟此等交涉要件必須有當時假佔年月及一切證據情形方足以杜口實當即飭再詳查惟所佔各地多係陸續暗佔蠶食無甚時日可稽現特就詳查所及足供證據者分別列報以資考核計查青洲島在澳門灣仔兩處之中在海面之北近接前山河岸係光緒十五六年葡人先在該處築造新路逐漸圍劃至今僅屬於彼其望厦角龍田村一帶在澳界之後中國原設有汛署礮臺至光緒初年爲葡圍管地十三年吳前撫親往亦未釐定界址至二十四年全被圈入其過路塚一處爲澳門出海要區左九澳右橫琴大於澳門數倍向由拱北派輪緝私光緒初年竟派輪設營並荔支灣石澳硬以兵力從事隨及於灣仔銀坑各地然均有中國台官署多所足爲證據

德國裁減駐京津衛隊)德國衛隊裁減回國一節今聞將該隊總員七百五十名分爲二班第一班擬於六日以內他一班於月杪一併回國另由青島調海軍水兵一百五十名內將百名護衛館使內將五十名駐北京天津已由本國政府電飭駐京德使屆期實



行「須與路透電報參照」

美國海軍之改良○美國前總統盧斯福氏欲改良美國海軍組織海軍調查局茲聞其調查事項如下「一」爲現在海軍組織法令頗有缺點部內各局長之權於他種職務上與海軍卿又總統之權同等「二」爲各局相異責任戰鬥準備又作戰計畫不能一致協力「三」將部內之數局合併而爲一局「四」海軍卿附設顧問官數名顧問官關於部內各局之事務及戰鬥準備事宜幫助海軍卿而以立整齊之秩序「五」各局之經費務須節省且明其收支「六」改正海軍部事務戰鬥準備之權柄專歸海軍卿以俾海軍部作戰計畫無遺算「七」革正海軍部一切組織以使全國海軍當平時如戰時嚴加戰鬥準備並無遺算「八」考究最良之方法將上項斟酌改良

己酉大政記卷九

摺奏三

郵傳部奏核銷贖電收支用款摺

併單

奏爲核銷贖電收支款目繕具清單恭摺仰祈

聖鑒事竊臣於上年五

月具奏收贖電股摺內聲明所有贖電款項擬由臣部籌借開單核銷欽奉

俞允在案茲據上海電政局呈稱所有電報商股收贖用款截至光

緒三十四年十二月底止共收二萬一千五百六十七股給付票價三百八十八萬二千零六十圓合規銀二百八十八萬四千七百四十九分三釐又各局經理收股用款外洋華僑匯票保險各公司洋電等費共支規銀三萬一千二百三十八兩一分開單呈請核銷前來查此次收贖電報經臣部分飭電政各局經理收股交通各分行經理付款均尙得力茲據該局呈報核銷各款與交通銀行所列數目尙屬相符應請准其照銷至贖電之款係向路局及交通銀行等借撥常經於收贖京漢鐵路借款摺內附片陳明撥給二百八十五萬兩以爲贖電之需所有路局及交通銀行等借撥各項擬

卽以此款清償其贖路借款未清撥以前各處息項仍舊支給不敷之款以電報局應交二十六屆官息餘利抵支毋庸續借以清款目核計商電尙有四百餘股散布內地外洋一時不能掃數收清其有隨時交繳零股者應歸該局電報收支帳冊內核銷不必另行造報以歸簡易理合繕具清單恭呈御覽除咨度支部外所有奏銷贖電用款緣由謹恭摺具陳伏乞

皇上聖鑒謹 奏宣統元年二月十八日奉 旨已錄

謹將光緒三十四年分贖電收支款目開具簡明清單恭呈 御覽 計開 新收 一借用鐵路總局規銀一百萬兩 一借用交通京行公砵三十萬兩合規銀三十一萬三千八百兩 一借用交通滬行庫平十五萬兩合規銀一十六萬四千四百兩 一借用交通滬行規銀十八萬兩 一借用交通滬行規銀三十萬兩 一借用交通漢行規銀二十萬兩 一借撥上海電政局規銀五十五萬七千七百七十八兩一錢三釐 以上共收規銀二百九十一萬五千九百七十八兩一錢三釐 開除 一付電股二萬一千五百六十七股每股一百八十圓共洋三百八十八萬二千零六十圓

合規銀二百八十八萬四千七百四十九分三釐 一付上海天津北京  
香港漢口廣州長沙各電經理收贖電股紙張筆墨報告等費規銀九千五  
百四十九兩八分四釐 一付匯寄各省及外洋股款匯費規銀三千二百  
八十兩五錢 一付各電局經收外洋華僑來往寄票保險等費共規銀一  
萬八千四百八兩四錢二分六厘 以上共支規銀二百九十一萬五千九  
百七十八兩一錢三釐 實在 收支兩抵無存 查此次贖電款項前經  
奏明在贖路借款內撥給二百八十五萬在案茲以此款清還前項支借各  
數實在不敷規銀六萬五千九百七十八兩一錢三釐應歸入三十四年分  
電報收支冊內核銷合併聲明

考察憲政大臣于式枚奏譯注普魯士憲法全文摺

清單另登

奏爲譯注普魯士憲法全文繕單恭摺仰祈

聖鑒事竊臣准憲政編查

館開送考察憲政要目曰憲法條文及附屬法又曰憲法成立後之改革查  
普魯士憲法首爲國家領土次曰普人權利三曰國王四曰國務大臣五曰  
國會六曰司法權七曰非裁判之國家官吏八曰財政九曰鄉市及省府縣

聯屬十爲通則十一爲補則共十一章百一十九條其法多原於比利時所  
 異者比憲法首明主權出於國民普憲法則特著王權爲所自有比憲法所  
 不載者其權皆在議院普憲法所不載者其權皆歸國王比憲法既行從前  
 舊法多廢普仍遵用如前所具列百十條文不過揭示大綱俾國民執爲保  
 護權利之據畢士麥謂英法比三國憲法爲暴力要索之條款與普之惠與  
 者不同然與索雖殊其爲交換之條款則無以異矣憲法定後國民獨於選  
 舉法頻年爭論請改不已因當時本有改定之諫日久迄未議行既經允許  
 於先宜有責言之及此外各條均無異詞惟於新定法律與憲法原文偶有  
 歧互或更周密者削除數條無關宏旨故其改革之迹不似英法之多日本  
 憲法又本於普而刪併爲七章七十六條尤爲簡括伊藤博文自爲義解於  
 普法頗有異同如升天皇於首章以明臣民統屬之義後大臣於國會以示  
 原本輿論之公議制君權之偏見爲仿法比憲法之眞舉廢棄預算之變  
 例爲非奧美立憲之正不必載事變專律愈見特權保全之眞不備列鑄幣  
 諸條益徵大權包括者廣大臣無別設糾彈斷罪之法議院不可有提出議

案之權租稅議決不必限定一年議置攝政不必召集兩院其所駁議具見別裁固由後起損益之彌工亦見東方情勢之本異也昔自立憲以來憲法遂爲專門之學憲文本簡所重最在解釋近年各處所譯普國憲法但有正文而詞意又多誤會或致抵觸且於削除各條均未備載致莫詳其改革之由前年考察政治大臣戴鴻慈端方所譯普國憲法獨有注語而不甚詳當時備考各國政治普憲不過一端又爲時甚促故未能盡備西人稱憲法爲根本法憲政者自須博考政治尤以憲法爲本茲就正文逐條譯註根據歷史參稽律令博探諸儒解釋附爲論說及繁舉要期於詳明其削除各條仍查譯原文以備考證近譯各本間有附載議院選舉勅令及戰時停止憲法專律者因與憲法有關故附於正文之後遂謂之附屬法其實關於憲法如此等專律甚多本非憲法正文所有也其選舉法案牘至繁由臣別案具奏先將譯註憲法正文十一章百一十九條繕列清單恭呈

御覽應請

飭下憲政編查館存案備查至憲法內如國王大權大臣職任人民義務以及國會司法財政地方自治各事憲政編查館開送考察要目內皆已備

列均由臣分別專案奏報所有譯註普國憲法正文緣由理合恭摺具陳伏  
乞 皇上聖鑒謹 奏宣統元年二月十二日奉 硃批憲政編查館  
知道單併發欽此

度支部會奏設立財政學堂酌擬章程摺 併單

奏爲設立財政學堂酌擬章程恭摺會陳仰祈 聖鑒事竊查前年三月  
十四日度支部奏發訂職掌摺內聲明擬設財政學堂上年四月初三日復  
經奏請撥給馴象所地基建造財政學堂各等因均奉 旨允准在案

現在該學堂將近竣工亟應妥定章程以便先期招考惟是財政爲專門之  
學非普通各學夙有門徑兼習過各國語言文字未能究其精蘊光緒三十  
四年四月間學部奏各項學堂停止招考一摺內開自本年六月爲始凡奏  
定學堂章程所定分科大學大學選科大學實科高等學堂等學堂屬於高  
等教育者概不得招收未經中學堂畢業之學生等語財政學堂既屬高等  
教育則入學程度自應以中學堂畢業生爲限但興學伊始各處中學多未  
屆畢業之期懸一格以相求既不可以遽得設多方以甄取又有違夫定章

臣等再四籌商財政一門原與實業相近如銀行稅務等科皆有實業性質擬仿實業學堂辦法於校中先設中等科課以歷史輿地算數語文理財等學以植其基三年畢業然後升入高等科俾肆財政各科及與財政有關係之法律政治等學以盡其蘊仍以三年畢業就一校之內爲遞升之階等級分明秋然不紊俟他日中學畢業人數已多屆期亦可招收以謀普及其已未服官之人年力富強有志向學者現當整理財政需才孔亟尤應廣予甄陶以資任使擬於校中另設別科專選京外候補候選人員及舉人五貢學有根柢者在堂肄習選課財政各學三年畢業如此辦理一則求速成之效以應急需一則循漸進之方以期深造於國家財政前途實有裨益至獎勵一項中等科擬照中等實業學堂高等科擬照高等實業學堂分別給予獎勵別科應如何給獎之處俟將來酌量情形再行奏明請  
旨辦理謹將所擬財政學堂章程五十條繕具清單恭呈  
御覽伏候  
欽定遵行所有設立財政學堂會同酌擬章程緣由謹繕摺會陳伏乞  
皇上聖鑒再此  
係度支部主稿會同學部辦理合併聲明謹  
奏宣統元年二月



十四日奉 旨依議欽此

謹擬財政學堂章程繕具清單恭呈 御覽 第一章 設學總義 第

一條 本學堂宗旨在養成財政通材務使研究學理明體達用足備任使  
爲第一義分設中等科高等科別科中等科課程比照中等實業學堂章程  
講授外國語言文字及關於財政之普通學學期三年畢業後再入高等科  
高等科學期三年別科按照法政學堂別科辦法造就已入仕途及舉貢人  
員學期三年 第二條 本學堂另設稅務專科及銀行講習科以養成稅  
務銀行之實踐人材以備稅務處及銀行之任使 第二章 學額及入學  
資格 第三條 中等科每年考選一百人別科每年考選一百人著爲定  
額稅務專科暨銀行講習科學額臨時酌定 第四條 別科學生須京外  
候補候選人員及舉貢年在三十以下中學具有根柢西學亦有門徑者經  
考試錄取後始准入學 第五條 中等科學生須年在十六歲以上二十  
五歲以下品行端正體質堅實曾經高等小學畢業者經考試錄取後始准  
入學 第六條 高等科學生由本學堂中等科畢業升入各省中學堂畢

業生經考試錄取後始准入學 第三章 學課程度 第七條 中等科

應授各學課及每星期授業時刻如左 第一年每星期鐘點 人倫道德

編講經義(一) 中國文學 逢星期一六作論(四) 英文文法(三) 英文

讀本(六) 英文作文(三) 算學 初級代數 用英文課本(五) 中國輿地

(三) 中國歷史(三) 體操(三) 共三十二鐘點 第二年每星期鐘

點 人倫道德 編講經義(一) 中國文學 逢星期一六作論(三) 英文修

詞法(六) 英文作文及講讀(六) 算學 平幾何 三角術 用英文課

本(六) 外國歷史 用英文課本(三) 外國輿地(三) 體操(三) 共

三十二鐘點 第三年每星期鐘點 人倫道德 編講經義(一) 中國文

學 逢星期一六作論(三) 英文 既記解辨(六) 英文作文(三) 算學 高

級代數 析解幾何 微積 用英文課本(六) 理化 物理及化學(三)

政治通論 用英文課本(三) 理財通論 用英文課本(三) 體操(三)

共三十二鐘點 第八條 高等科應授各學課及每星期授業時刻如左

第一年每星期鐘點 人倫道德(一) 中國學文(二) 憲法(二)

行政法(二) 高等理財原論(三) 理財史(三) 財政學總義(五)  
各國財政史(三) 簿記學(三) 統計學(四) 共二十八鐘點 第二  
年每星期鐘點 人倫道德(一) 民法(三) 商法(三) 賦稅總義(二)  
國稅論(二) 國債論(二) 預算決算論(二) 銀行學 學理 歷  
史 實習(九) 中國財政歷史及歷代幣制(四) 共二十八鐘點 第  
三年每星期鐘點 人倫道德(一) 刑法(二) 國際公法(三) 國際  
私法(三) 各國銀行律(四) 各國稅律(四) 中國現行銀行則例及  
各項稅章(三) 貨幣學(四) 理財學史(二) 理財學實習(二) 共  
二十八鐘點 第九條 別科應授各學課及每星期授業時刻如左 第  
一年每星期鐘點 人倫道德(一) 法學通論(二) 憲法(二) 政治  
汎論(二) 理財通論(四) 財政學總義(三) 中國財政史(三) 各  
國歷史(三) 地理學(二) 算術(三) 日本文(四) 共二十九鐘點  
第二年每星期鐘點 人倫道德(一) 行政法(二) 民法(三) 賦稅  
論(四) 貨幣學(四) 各國財政史(三) 理財史(四) 中國歷代幣



酌辦理 第十五條 監督統轄各員主持全堂一切事務並得妥定詳細規則隨時由部核定 第十六條 教務長秉承監督管理全堂學課稽核各教員教法及各學生學業勤惰優劣教員監學員掌書員皆屬之遇有堂中應辦要事隨時與監督商辦 第十七條 各教員分任學科按程講授有實施教育之責無論本國人外國人均當隨時與教務長商定教法並一併歸監督節制 第十八條 監學員秉承教務長專管關於學生入學退學考試及講堂上課一切事務 第十九條 掌書員秉承教務長專管圖書品物標本收發存儲一切事務 第二十條 庶務長秉承監督管理堂中一切庶務文案員會計員雜務員皆屬之 第二十一條 文案員秉承庶務長專掌本堂文報公牘 第二十二條 會計員秉承庶務長專掌本堂銀錢出納豫算決算 第二十三條 雜務員秉承庶務長經理本堂廚役人役房屋器具及文案會計職掌外一切雜務 第二十四條 齋務長秉承監督專管考驗學生品行及寄宿舍一切事務 第二十五條 檢察員秉承齋務長稽察學生出入及一切起居勤惰並本學堂衛生及各學生疾

病事宜 第五章 考試章程

第二十六條

本學堂各科學生所習功

課分爲三種考試以定其學級程度之高下一曰學期考試一曰學年考試

一曰畢業考試 第二十七條

學期考試每半年應就所已習之功課分

門考試一次 第二十八條

學年考試每屆學年之終分門考試一次

分省仍留原級補習 第二十九條

各科學年考試分數既定的取前六十

數名爲優待生由監督分別獎勵如左

一免次年全年或半年學費膳費

一受相當之獎賞品 第三十條

第三十一條

各科畢業考試及格者一律授於畢

業文憑所有中等科畢業生應比照中等實業學堂高等科畢業生應比照

高等實業學堂獎勵章程辦理別科畢業生俟將來畢業時酌量情形分別

奏請給予獎勵 第三十二條

第三十二條

每次考試除科學分數外另記品行分數

由監督教務長齋務長教習監學檢察等員隨時考察其分數併入人倫道

德科分數計算 第三十三條

第三十三條

如曠課太久者應卽就所曠之學科核扣

考試分數其一學期或一年未請假未記過者分別加增分數 第三十四條 品學分數册各教員及監學員檢察員各置一本隨時稽察登記 第三十五條 監督教務長及齋務長應置功課總分數册品學總分數册將各教員及監學員檢察員所呈分數彙總記入 第三十六條 凡考試不准規避違者記過一次 第三十七條 考試時學生除自攜筆墨外堂中備有試卷草稿紙學生不得攜帶書籍講義違者記過一次 第三十八條 凡考試學生未經交卷不准出堂亦不准互相談話傳遞紙筆隨意走動違者記過一次 第六章 學費及膳費 第三十九條 各科學生每月繳學費兩元均三個月合繳一次一年分四期於二五八十一月初五日以前繳納 第四十條 各科學生務於前條所定期限內將學費繳納清楚倘遇期不繳積欠至二學期以上者由監督查明應令退學 第四十一條 各科學生有願住本學堂寄宿舍者每人每月應繳膳費四元按第三十九條所定期限繳納倘有積欠亦照第四十條辦理 第四十二條 其不住宿僅就本學堂午膳每人每月應繳膳費兩元繳納期限及追繳積欠與

第三十九條 第四十條 一律辦理膳費每年以十一個月計算五月初旬只繳兩個月膳費 第四十三條 各科學生已繳學費膳費而中途因事退學者其餘款概不退還 第七章 入學及退學 第四十四條 各科學生入學之期每年一次於年假前定期招考錄取者一律於年假後入學肄業 第四十五條 各科學生於入學之前須覓取住居京師確實可靠之保證人出具保證書呈送本學堂後始准入學 第四十六條 前條保證人凡關於學生一切事務均有保證之責任如保證人遇有遷居外省或別項事故須另覓保證人 第四十七條 別科學生人數不滿足額時須於開學前考取程度相當者編入各班隨同肄業 第四十八條 各科學生如中途遇有疾病或其他不得已事故必須退學者須陳明實在情形俟監督許可後始得退學 第四十九條 各科學生有遇以下各事由監督核定令其退學 一品行不端 二荒廢學業 三不遵本學堂章程命令 四沾染嗜好 五學業不進無可造就者 六二學期以上不繳學費或贖費者 第五十條 本章程如有應行修改之時由監督會同教務長庶務



長齊務長對酌擬定由部核准施行

禮部奏 監國攝政王祇領冊寶及祇告各禮節摺

奏爲請

旨事恭照宣統元年二月廿七日已初時

監國攝政王詣

孝欽顯皇后几筵前祇領

冊寶已正時詣

德宗景皇帝

几筵前祇告各禮節前期一日

遣官各一員恭祭

太廟中殿

後殿以

冊封告是日早官校陳

口駕於

甯壽門

外內務府官設

冊寶案於

皇極殿內東旁設黃亭二於內閣

門外內閣禮部官捧

冊寶分置亭內校尉舁行內閣禮部官前導至

錫慶門外亭止內閣禮部官自亭內捧

冊寶入陳於案退大學士

禮部堂官各一員立於簷下西面內閣侍讀學士二員分左右立屆時贊引

對引官由

錫慶門引

監國攝政王入

皇極門

甯壽門各有門

詣

孝欽顯皇后几筵前就拜位立贊引官贊跪

監國攝政王跪典

容官贊宣

冊宣

冊官就案東西面宣

冊訖大學士恭

捧授 監國攝政王

監國攝政王祇受轉授右旁內閣侍讀學士侍讀學

士跪奉興俟於左典容官贊宣寶宣寶官就案東西面宣寶訖禮部堂官恭捧授 監國攝政王 監國攝政王祇受轉授右旁內閣侍讀學士侍讀學士跪奉興竣於右贊引官贊叩興 監國攝政王行三跪九叩禮興贊引官贊禮畢內閣侍讀學士捧 冊寶降自東階內閣禮部官仍前導出

甯壽門

皇極門

錫慶門各中門贊引對引官

監國攝政王由原

進門出內閣侍讀學士以

冊寶授府屬護衛護衛接捧退執事官皆

退先時官校陳

法駕鹵簿於

觀德殿大門外內務府官設祭

文案於

觀德殿几筵前檻外之西禮部官前導讀祝官恭捧祭文由

中門入陳於案禮部官二員於

景山東門外祇候俟 監國攝政王詣

孝欽顯皇后几筵前祇領

冊寶華引

監國攝政王由

觀德殿右門入就拜位跪前導之禮部官二員跪展祭文讀祝官跪讀祭文訖 監國攝政王行三跪九叩禮興讀祝官恭捧祭文禮部官前導由 中門出送祭文於燎爐內前引官引 監國攝政王由 右門出退執事官皆退所有敬擬 監國攝政王祇領 冊寶及祇告各禮節緣由是否有

當謹恭摺具陳伏乞

聖鑒謹

奏宣統元年二月十九日奉

旨依議欽此

禮部奏王公百官班見

監國攝政王請

欽定日期摺

奏爲請

旨事光緒三十四年十一月二十日內閣各部院等衙門會議

奏准 監國攝政王在

文華殿班見王公百官等語今 監國攝政王於

二月二十七日祇領

冊寶應請

欽定日期舉行班見典禮除禮

節由臣部另行具奏外伏候

欽定一日由臣部行知各衙門一體遵照

爲此謹 奏宣統元年二月十九日奉

旨著於閏二月十一日班見欽

此

己酉大政記卷九

文牘四

浙江諮議局議案預備會啓

吾國人民亘數千年無參與政事之權故其個人與國家之間觀念至薄弱政興廢視若蚊芒雖以通人學士足跡不出里巷而其方之行政是非利害間焉不能置對者比比然也疆吏之奏報京曹之案卷究其最初實始取證於一二里正地保之手而此一二里正地保者又率皆蠢若鹿豕庸賤無所知識之徒刺取成事倩途之人書之如是月月如是歲歲不敢竄易一點點以是上之縣而府而司而督撫而匯於部嗚呼悲哉宜乎吾國之政治淆亂腐敗至於不可爬梳若斯之極也東西各國以立憲政治發達之結果不獨一國之政出入變更必有提案一州一町村凡作一事亦必先造成議案調查於前研究於後衆情允協而後專以行之宜其全國上下整齊畫一百廢無不舉也今賴

孝欽顯皇后

德宗景皇帝聖明吾國數千年

詔定立憲基礎以籌辦諮議局列入九年預備案內

政體正於一旦

責成督撫期年必成

遣詔殷殷猶以按年籌備爲勗

朝廷高厚

所以期吾民者可謂摯矣所以予吾民者可謂多矣今而後一省之內行政秩序若何民生樂利若何實力充斥若何吾人不復敢空言以責官吏也緊惟吾議員是賴議員衆多孰府孰廳孰州縣難一一悉姓氏誰何難一一辦吾人不復暇分研以漸個人也緊惟吾議案是視雖然竊嘗慮之議案者根於事實發爲言論非可凌空架屋嗟咄取材者也查諮議局章程第二十五條云第二十一條所開除第二三款外諮議局均得自行草具議案今細按第二十一條諮議局應辦事件其尤主要者莫如二至五款爲監督財政事件六七款爲參預立法事件預算決算雖不得由諮議局提出議案而議決之權則仍屬之第一款議決本省應興應革事件九十款爲申覆資政院及督撫諮詢事件則尤包含甚廣無一定之範圍要之無論何項議案片詞之得失全局係焉果其得也一省之利將無不興一省之弊將無不革一省之權利義務增減將無不平均下足以爲地方自治之保障上足以爲中央議會之權輿推其所以然曰惟議案之得而已使其失也一省之利將不僅不能

興一省之弊將不僅不能革一省之權利義務增減將不僅不平均下足以敗地方自治之成功上足以碍中央議會之進步推其所以然曰亦惟議案之失而已一得一失毫釐千里吾一省之人民身命財產未來現在升則九天之上降則九淵之下安可不有以自擇稍分其仰事俯畜之精神以相與留意於此至可寶貴之議案哉傳曰凡事預則立不預則廢既知其事之不可以廢也則曷急起而謀其預也

雖然又竊嘗慮之凡言預備者必具二條件其一則即需較長之時日是也一省之事條理萬端甲府與乙府異丙縣與丁縣異駸至一鄉鎮之間風尚習慣或相背馳即其同者分就各地蒐集而排比之亦非旦夕之勞所能竟調查之事本不易言況以吾國事當創始各種機關尙未完備辦事者又素無經驗其能速乎其次則調查事件彙齊之後必合多數明白有智識之士於一所隨時分類研究修飾討論而後持以施於事而可期其有功嗚呼亦至難矣今按吾浙諮議局議員明年選出之期依籌辦順序在六月十五日距九月開局之日其間僅七十有五日耳而又再選去三日通知承認去十

日道路跋涉嘉湖近者去三日溫台處等府遠者去八九日屢減之實可得五十有餘日其期間之促迫也如此計八月初日各府議員依限一律到省而日尙待認識氣誼尙待交孚各出所聞縱堪互證必多隔膜其研究之困難也又如此嗚呼頹波易逝藉手何從逆覩方來必至之危境畧爲揣測可得而言因無預備之故凡遇官吏提案不能有所可否本非慣於模稜而十五不知勢難妄語始則持重終至依違圖了門面於願已足此其必至者一也不然者有議案提出矣而毛舉細故皆無關緊要之談隣家養貓並入紀錄名流揮塵徒聞吳語甚至開議數日先議公費瑣瑣已甚將爲笑柄此其必至者又一也又不然者失其代表一省之資格各徇其所自選出之區每遇一事互相爭執是非黑白混淆不分閩閩之聲囂然並作意見既深有如水火其禍足使有事不能開議有議不能速決全省事機因以凝滯此其必至者又一也至於財政內容尤極複雜支離曲折未易盡知例如浙東鹽釐指撥賠款每年一百萬尙虧三十萬此三十萬又從何來必又有承其做者而此承其做者何以又能支持諸如此類不勝縷舉究其實在處處蹈空故

添一新政督撫所躊躇束手者第一問題即曰無經費而已州縣之中吾浙著名瘠缺二十餘處有求交卸而不得者何論辦事故明年諮議局問局之後無論涉及財政問題與否

(註)按憲政編查館通咨各省文內有三十六年試辦預算次年再行接續試辦決算等語似乎財政問題明年可以毋庸提及不知地方各事無不與財政相關現在國稅地方稅尚未劃分尤多糾葛憲政館但謂預算決算在三十六七年試辦非謂三十六七年以前可絕對不論及財政問題也此理不可不明又咨文謂諮議局議決預算事項應以各本省之地方辦事用費爲限國家行政費不在其內然諮議局雖無議決國家行政費之權苟與本省人民有密切之關係卽爲本省擔任義務之增加事件自可對之發表意見惟議決之權則仍限於地方辦事用費耳

但議員提議辦一事官吏必先力陳困難情形請求籌款可斷言也議員既未預備自無從加以批難國民有納稅之義務議員爲承諾之機關叢詬負尤莫此爲甚此其必至者又一也再不不然因不能提出有效議案之故專意



事事與官吏反對以謝責於社會齟齬百端終至解散則正事之延誤已多此其必至者又一也

吾儕爲此懼不辭越俎發起斯會意在供當選議員之取裁兼作社會一般之指導共竭憂虞冀回萬一昔伊聖身在賦畝引天下爲己任孔孟稱頌焉夫以天下之大可任一己況於一省之內桑梓游釣之鄉子孫百年生死所係何嫌何疑敢放天職謹布章程若干條有意爲章程所未盡者則更贅陳之如左

預備之大綱有二

一籌全局 今東西政治家之言曰爲政必定方針此至言也顧方針何以定則必統計一國之內情及其外界之趨勢然後某事可緩某事須急某事宜先某事略後如奕者然必有成算乃有布子當否之可言如其不然生民之事何一可無今日見一事則議行之明日見一事則又議行之不獨財力終必挫跌其常事之拒擥而無秩序雖至勞苦亦安有成功之可望也故籌全局者爲吾國今日至急之務普魯士之立國日本之驟強惟其能籌全局

故也西人之作一事治一地也類有長駕遠馭之規而經濟不竭精神豫暇吾國力求進步而常若蹙蹙靡所騁其故蓋可思矣一國然一省何莫不然例如財政問題一省止有此數則必計全省之需要與其內容之缺點在於何處然後制爲輕重此一要也再換一方面言之公共團體之經濟與個人之經濟異個人之經濟在量入以爲出公共團體之經濟則在量出以爲入蓋公共團體欲求其存在每達當先明審其任務幾何需用幾何於其屬必要者不可不強制以供給之然不籌全局以隱爲調劑往往有涸其財源或偏於一部分之弊此又一要也舉此例彼可以類推故吾儕以爲籌全局者今日諮議局議員預備第一義也

一求實事 何謂實事凡調查之屬土地方里物產品類民俗習慣農工商業之實況學務鹽政武備警察各項行政之制度院司府縣各級衙署之費用諸如此類條分件繫一一紀載各爲表冊愈瑣屑乃愈完美其空言泛論或不切於吾浙者無取焉更縮而小之例如調查一事其事或極腐敗管理之人全不得當則但詳敘其腐敗之事實與管理缺乏之點其牽涉私人之

歷史近於攻訐者無取焉

預備之標準有三

一舊日之沿革 凡一事之在今日無論何事皆自有舊日之沿革其能歷久習而相安者必其與其地其人民有適宜之要素在也不可不審也東西各國制定法典必先調查慣習得由此意然有特質不可不保存者亦有惡習不可不痛除者或用強制或用默化或但須改良其某部分皆視沿革之深淺以爲斷徃徃有良法美意以反乎人民習慣之故竟不能行東西各國此例不少沿革與議案蓋有密切之關係也

一現在之進行 現在者未來之母也語云辦一事多一事閱歷然必事事躬爲閱歷則失敗已多就已成之事考其現在進行之迹孰得孰失用資股鑒閱歷之便無過於此例如學務警務各府廳州縣興辦皆已數年地方自治章程民政部尙未頒行而省外各州縣亦多自行講習有已實行者有不適宜者究之因何緣由而得實行因何緣由而不適宜觸類旁引其益必多長短相衡標準斯得也

一各個之意思 以上二項皆就事實而言此則對於上二項事實所發表之意思也同一事實甲以爲是乙以爲非是丙復以爲是各有理由遂相分持又或有因特別事項之關係利害異趣主張自殊是皆所謂各個之意思日本法學博士箕先生之言曰法者基於社會心理規律的意力之合成也換言之卽各個人之規律的意力爲法之根源法猶如是況於議案是研究各個之意思實爲議案預備最終之第一要件矣

抑吾儕於茲簡末竊願更效一言辭苦意長無關本旨縱觀海內大勢吾國立憲時代猶在綢繆未雨之天擔荷風塵正賴豪傑而默相時賢之內熱忱救世者固多而懷抱消極主義者亦復頗有非惠莊之世而曳尾爲樂有管樂之才而抱膝爲高夫天下之事非遂可無人任之也君子奉身而退則時有倖位之憂有心人所爲怒焉深痛者也年來海外之事時接耳目政黨演說女子爭權此類情事施之吾國固多窒礙然羣相放棄則比之愜皇周任有言曰危而不持顛而不扶是誰之過歟邵康節先生答人書曰正賢者所當盡力之時吾知人父老伯叔兄弟其各三復之焉不勝幸甚此啟

吉巴限制華民之新案

自美國西岸諸邦排斥亞人華民尤首罹其酷其待遇慘無人理矣然而中美南美及西印度羣島尙多荒闕之地利用華民勞力爲其發展故其待遇華民尙未如美之殘也顧近年南美諸國雖尙容華民躡息而西印度羣島則因有受美保護者已沾染其惡風矣近吾國駐古巴代辦出有告示一道凡欲往古巴者不可不注意也示文如下

駐古巴叅贊代辦使事兼總領事黎示照古巴入口通例遇有別國人入境須經稅關醫生及潔淨局醫生查驗簽准方能登岸如有脚疾者原船折回須自備川費華民數萬里遠來每因眼疾被阻苦累難堪本代辦迭與稅務司及皇家醫生婉商均以通例爲詞各國人一律辦理並非專待華人等語查各國人入境均須驗眼其因脚疾被折回者亦時常有之醫生守例雖稅務司亦屬無權本代辦以此等眼疾並非不治之症雖定章所限尙無不准醫治之條一經折回往返川費損失不少殊非體恤遠人之道再三與古外部婉商請轉達島督設法妥辦古巴外部克篤邦交允照商辦西十月三十

一號經島督定議諭飭醫生等遵照以後舊居古巴暫時返國復來之人照舊免驗新來之人驗有目疾查屬可醫者准具保單銀二百元留候稅關候醫所診治以一月爲期期內愈准放行否乃折回其醫費由皇家支給等語如欲具保出外另覓醫院診治者須具保單銀五百元一戶之外未能全愈仍欲留醫者再准兩個月爲期費由自備各等語現華人來古巴准照新章辦理爲此示曉諭仰華民人等一體知照特示

戊申十二月初二日

禮部通行各衙門

德宗景皇帝

梓宮奉移後預備大小

祭禮事宜摺文

禮部爲通行事本部會奏

德宗景皇帝梓宮奉移

山陵後大

小祭禮應行預備各項事宜各摺片於本月二十二日具奏均奉

旨

依議欽此又禮部會奏

德宗景皇帝梓宮奉移

山陵事宜

一摺於本月二十二日具奏奉

旨依議欽此又附奏

德宗景皇帝梓

宮奉移梁格莊

行宮暫安

皇上應詣

觀德殿梓宮前祭

酒屆日是否由

監國攝政王代詣行禮抑或遣員恭代之處一片本日軍

機大臣欽奉

諭旨三月十二日

德宗景皇帝梓宮奉移梁格莊

行宮暫安是日

觀德殿梓宮前由

監國攝政王代詣奠酒行

禮欽此又奏

德宗景皇帝奉移梁格莊

行宮暫安所有沿途行

朝奠夕奠禮及暫安次日行奠禮應請

特派近支王公恭代行禮一

片本日軍機大臣欽奉

諭旨行朝奠禮夕奠禮

著派禮親王世鐸恭

代暫安次日行奠禮

著派睿親王魁斌恭代欽此

己酉大政記卷九

撫晉五

滇省鐵路始末記 續

此約一經訂立後一千八百九十八年四月十日所訂約章五章更見推擴法國利權益加堅牢蓋在年所定不過有中國值修築滇省鐵路須聯接越南鐵路並開採鑛山須聘延法國工師等字樣其範圍尙小至此約法國自行修路所有路款法自籌辦督路之權悉由法擅則不啻在滇省樹立勢力並箝制英國令不得逞由緬甸入滇再出川省以經營大江流域之志也

修路經費與路線 一千九百零一年印度支那政府議商四大銀行互行合股創辦公司名滇越鐵路公司於是決計先擬修築由老開至雲南省城共四百六十八基羅邁突地段所需路款共九千六百萬弗蘭中由殖民地政府撥助千二百五十萬弗蘭由公司募私債七千六百萬弗蘭其償還之法以向後七十五年間每年總督府應補助之三百萬弗蘭抵押又另由公司資金一千二百五十萬弗蘭撥支七百五十萬弗蘭所有工程



交印度支那鐵路修築公司承辦其定線路初擬由越南老開起渡南河入滇省境界沿河口右岸溯紅河由與新街河合流之處北向越該河沿岸溪谷出蒙自再向西北轉往臨安新興普寧等府州遂達省垣惟此路綫沿途多險屈曲亦急是以考察之餘遂棄該綫改由河口直沿南濱河北向過阿迷州祿豐村宜良縣繞迴楊宗海由水塘溫泉轉達省垣之綫一千九百零三年十月廿日是事經議妥簽押該路自獲得修築權至今五閱星霜而有更改綫路之事以致窒礙工程且該公司於一千九百零五年八月爲加速修路起見稟請總督府再增撥補助金督署亦允貸以八百萬弗蘭尙不足濟急是以督署與公司遂致隔膜一時紛擾將中止工程適有仲裁委員多方周旋遂議定云該公司尙值豫定經費九千六百萬弗蘭悉數支絀再增資本五百萬弗蘭並由每月經費負四成其餘六成由督署稱貸尙不足須由豫算資以外通融一時或由督署作保招募公債等語因是督署在公司負擔額三千萬弗蘭以由印度支那路債一萬兆弗蘭措挪之權允准公司

籌足路款 法國亦思保護公司完竣工程最爲急務於是一千九百零七年六月經仲

裁委員之裁決招募公債共五千三百萬弗蘭督署聲明自任其責必須在七十五年間清還翌年將滇省鐵路修築公司一併解散所有工程交滇省鐵路公司一力辦理以重專責督署自行監督蓋勢之不得已也一千九百零八年據仲裁委員之裁決將預定資本九千六百萬弗蘭增至一萬六千五百四十六萬六千八百八十八弗蘭其內容如左

「一」 公司資本金

弗蘭

甲由公司第一批資本

九、九三〇、四四一

應發支者

乙 增資額

五、〇〇〇、〇〇〇

共

一四、九三〇、四四一

二二 公司公債

甲 第一回公司所募公債

七六、〇〇六、〇〇〇

乙 由督署保證應招募公債

一〇、四八八、九六二

計

八六、四九四、九六二

三 督署補助金

甲 第一回補助金

一、二、五〇〇、〇〇〇

乙 督署應新行撥支金

五一、五四一、四八五

計

六四、〇四一、四八五

總計

一六五、四六六、八八八

據此表督署當行再撥金額共有五千五百五十四萬千四百八十五弗蘭除此外仲裁委員會經費監督工程經費招募公債經費等款亦須撥支於是遂至招募公債五千三百萬弗蘭也

竣工地段 已而工程日著進步適去年四月二十九日有革命黨滋擾滇界之事雖暫停工工程既定叛亂後加急督工由老開七十一基羅邁突間去年六月十五日竣工開車本年三月間至蒙自七十九基羅邁突間亦應竣工聞越南總督今年一月起程巡歷老撾東甯交趾支那等處該督擬二月初須回轅河內埠以便蒞止老開蒙自間備車典

調查滇省鐵路由老副至蒙自百五十基羅邁突間工程最艱此段告竣則其達省垣必當在明年與預定期日決不至相遠也該路全線工程告成由香港至省垣不出五日由是之後滇黔川等省貿易必有一大進步矣

滇路通過之重要城鎮 向來滇省通商埠除蒙自外僅有騰越思茅二處耳開放騰越專在與北方緬甸貿易而思茅專在貿易老撾暹羅東部緬甸等查開放蒙自經年頗久遠在一千八百八十四年訂立天津條約時現在法意派駐領事在未開通鐵路以前客貨之入省垣者專由馬駝均過蒙自是以商業繁盛居然爲一大要鎮也惟蒙自離鐵路二十里稍爲遠隔而沿路市鎮有阿迷州祿豐村宜良縣等想鐵路成後蒙自繁盛必爲是等市鎮之所奪也

邇者中國收回路權粵漢京漢等路已經收回滇省鐵路亦已有人提倡收回或曰法亦稍有允意惟英國久擬由緬甸經營滇省則法亦當與是對峙以爲權衡其能否實行收回尙未可預定也

滇路各市鎮路程 由蒙自至省垣旱路有二倘取途東路先至阿迷州約一百里須要

一日由蒙自至箇寨約四十里間平原瞭闊惟人烟稀少耕耨未闢由此三十里地稍高起初爲平坦遂達阿迷州阿迷州商賈皆至不遜蒙自現擬中央大車站築於此地由此四十里至招店驛間山路稍險又爲低下過八十里至竹園竹園亦地當要衝繁盛亞蒙自竹園至彌勒縣八十里又至大麥地六十里又至路南州六十五里又至宜良縣六十五里此地繁盛稍遜省垣又至水塘六十里溫泉噴出行旅之過此者皆一浴而去雖陳設未備分文不取也又過六十里遂達省垣凡東路各市鎮行程概情也倘擬取途西路由省垣至蒙自先至呈貢縣四十里道路平坦地因濱昆明池水利最便再過二站至晉甯州五十五里由此逾關嶺至江川縣七十五里關嶺係西路第一險要由此過星雲湖畔更經五站至通海縣七十三里此地最稱繁榮以產滇醬名著天下又過五站渡曲江至曲江司七十五里於此路歧爲二經潘芝花出雞街更經二站五十五里遂達蒙自約需八日路程也

### 鄂督整頓吏治

鄂督陳小帥通飭各屬云照得本部堂蒞鄂以來瞬經一載吏治良窳民生利病無日不

競競在念現值時艱孔亟 朝廷銳意立憲凡諸籌備無不以州縣爲基礎際此新政府待頒行成法仍須沿用若任令該牧令等放棄職守無以副九年之期即無以收自治之效各該管官司表率請求具有專責茲特就州縣最關緊要諸端頒示條教一曰清理詞訟以省拖累查初級審判各廳州縣成立尙須時日一切詞訟聽斷自係牧令責任然往往任意積壓一稟累月不批一案經年不審任聽下役胥吏內外勾結原被羈候縣城廢時失業甚至家產蕩盡氣憤已平各願和息而若輩從中架弄求了不得各該牧令漫然不察漠然無動於心鄂省向設詞訟簿冊本部堂原可稽考但各牧趨避之法層出不窮記過既成具文撤任亦屬無及全在該管官司留心考察隨時隨事不稍寬假庶牧令咸知儆懼公堂多結一案民間即少破一家矣

一曰詞和民教以息爭端查各國民教除西國傳教士外皆係中國子民本部堂一視同人原無軒輊然小民無識每因宗教互異意見遂歧積不相能比比皆是有守土之責者自當平時開導化以無形往往不諳約章處處置失當地方因而多事外人藉口有詞設有不處試問該管官司能否辭咎徒薪曲突銷愚未然以後凡有民教之處務當情遣理論

毋使嫌疑固不宜左教以右民亦不可揚民而抑教其駐堂傳教之士亦須聲氣聯絡遇有相商靜氣平心秉公執法該民教等知地方官無偏無袒自然畛域胥忘矣

一日振興實業以殖生計查各國民情困苦游手失業所皆在是自非廣殖生計不足以資安集鄂省荒山廢隴以及江漢淤灘棄而不耕殊爲可惜各該督官司宜飭牧令相度土宜籌備旱潦或廣開墾或置森林其產絲產棉處所或就地籌欸聯合公司以興紡織至於興國之麻蒲圻之茶大冶及施郢之礦荊州之皮油均係最上原質一經製造開採皆可抵制洋貨收回利權而無染窮民亦可藉資安插矣

一日嚴緝匪徒以保治安查近年來邪說勃興動言平權自由排滿革命而海外游魂復恣意煽惑勾結聲援此種匪徒實爲倡亂之階全在該管官司嚴飭牧令細心偵緝一經查有實據立予稟辦至於神拳刀痞青紅各帝以及巨盜積窩老窩慣匪皆須多購眼綫嚴拿到案盡法以懲務使內匪肅清外侮自無緣而起矣以上四條皆係各州縣最要之事而牧令奉行與否全視各道府直隸廳州能否實心講求表率以爲轉移不謂堂卽以各屬牧令奉行之虛實以定各道府直隸廳州之功過台亟通飭即便遵照勿稍玩忽

己酉大政記卷九

譯海七

俄邊糧業之調查

西北利亞西部糧業公司頗覺興盛刻正向鐵路各站及棧房聘運米糧惟購糧多寡無從查考查爾木斯克糧業頗有效果波特羅柏夫斯克牧買米糧預備波羅的海各口岸運其收買者以玲瑯麥佔多數爲供給糧台及烏拉嶺等處庫爾幹市上糧務甚劣其收成雖好旋受潮濕故不易出售庫爾幹麩商多在赤爾賓斯克波特羅柏夫斯克市上收買小麥故赤爾賓斯克市面大有起色客歲冬月下半月邪米怕拉勒斯克市上頗覺興盛每星期運來米糧有三四十萬鋪得其中以小麥居全數之大半查雷施碼頭每日運到米糧約達三萬鋪得左右云

列國競造新式兵艦

現今各國海軍皆專力建造特勒托瑞蘇型之鐵甲戰艦與印他米袋布魯型之鐵甲巡洋艦今且以此二型兵艦之數而核算海軍之力此二型以前之艦始見廢敗舊式之



艦據最近調查所報告現在列國所造新式軍艦之已竣工者及未竣工者厥數如左

英國 特勒托瑞蘇型戰艦既告竣成者即特勒托瑞蘇號一隻現在試驗者白賴蘇福溫號一隻已經進水戴米雷阿號蘇波普號塔仙島號高林得島號等四隻現在建造者塔喀島號一隻將要建造者普培托魯伊安德號一隻又印米袋布魯型巡洋艦既告竣工者即所謂印他米袋布魯號一隻正在試驗者印佛勒箕什布魯號一隻已經進水者印文什布魯號一隻將要建造者（未定名號）一隻以上合計戰艦八艘巡洋艦四艘也

德國 特勒托瑞蘇型戰艦現舉進水者洛沙烏號維斯德扶阿連號疎印蘭特號等三隻現在建造者巴天號一隻將要建造者澳雨天布魯鳩號白歐魯蚌號西鳩弗力特號弗力特浴扶號基爾天佛蘭特號等五隻又印他米袋布魯型巡洋艦現建造者甲號乙號等二隻以上計戰艦九隻巡洋艦二隻也

美國 同型戰艦之既成者二隻未成者二隻將進水者二隻合計六隻

法國 同型戰艦之建造統計六隻

日本 同型戰艦之將成者薩摩號安藝號等二隻現擬建造者五隻合計七隻

義國 同型戰艦現在建造者二隻 巴西國 同型戰艦現在建造者三隻

### 各省礦業調查表

據英國使館商務員調查最近中國各省石炭礦業之情況如左 ○東三省 南滿鐵路沿線各地之煤礦產額比年益殖祇供給該鐵道及沿路居民之需用由營口一帶運輸之外其輸出之額未足以供給一般之需要 ○山西省 近年本地商辦之礦業逐日發達其採礦公司所採石炭供給全省居民之消費外東三省及天津各處之工場亦皆仰其供給 ○直隸省 天津北部之開平煤礦本分於三坑輓近異常發達昨年冬季其產額達百萬餘噸凡北洋諸地之居民及鐵路氣船等皆莫不仰其供給其殘額之輸入滿洲者大約占三分之一 ○河南省 太行山麓之焦作煤礦現在河南唯一之礦山而其礦層厚率達十三英尺一千九百零五年為礦坑浸水停止開採英人以氣筒排水再始採掘其當初礦質甚劣為市場所不願漸掘而及達十餘尺忽發見良質之銀脈今也為礦界之特色 ○山東省 山東鑛務公司遠近馳名其坊子鑛坑產出十六萬三千餘噸近者該公司設立煉鑛工場每一鐘時間以洗滌機器得洗出一百五十噸

之石炭洵東亞罕有之機器也 ○江西省 現在江西省有數十處鑛山其採法極幼稚故其產額較少也 ○湖南省 湖南省現有一所鑛山稱鑛界之巨孽德國鑛師督勵其採法目今自該鑛坑至湘潭沿岸間敷設二百英里之鐵路以便其石炭之運輸漢陽製鐵廠其他工場皆此鑛爲燃料昨年冬季每日採鑛重量平均達二千餘噸其鑛坑長一千英尺悉用電氣以供運搬又萍鄉鑛脉尤屬豐富據最近之調查大約有三億餘噸現在製鐵煉鑛等工場凡有百餘所

#### 東蒙古之交通機關

據俄報云住在伊爾克次官民已合力籌畫由該處或其他地方敷設至蒙古鐵路起點擇由伊爾克次梅索瓦及土烏舍斯克等處擇定一處此鐵路一開蒙古富源自然開拓不但使俄國之在蒙貿易之興旺即中國以北邊境界交通迅速敏活將來恰克圖庫倫與京張鐵路開通互相聯絡實爲最大之利便也現時在西比利亞俄商庫倫貿易額共五百萬元又烏里雅蘇台地方貿易額共五十兆元今概算從西比利亞到蒙古里數恰克圖梅索瓦間有二百八十俄里由伊爾克次經由梅索瓦達恰克圖間共有千二百餘

俄里該鐵路之安設必經過此等地方也現今交通不便之狀態貿易額尙如此一開鐵路該地方商務必蒸蒸日上見振興當路者之籌畫尙不止安設鐵道一事更擬開鑿謝連陵阿及卑切耳德母河挑挖河內淤墊以圖水路運輸交通便利也

該報記者更附言云本報特述俄國之俄蒙貿易振興策深願中國政府注重此舉實與開拓中國邊界大力也現展長京張鐵路至恰克圖雖未議妥若從此著手或有謂恐利權外溢者或有爲侵略的政策而痛憤者又或以改良水陸各路爲軍界上利用者議論紛紛莫衷一是其實開拓中國邊境振興商業進於文化之要務也望中國諸公祛偏狹之見以實其此籌畫也

#### 俄國海軍之現狀

某君久在俄國語人曰方今俄國兵船其數不少惟築造樣式多係古式不合時宜其係新式者不過訂造德國之留利克號訂造法國之麻哥魯夫號俄國自造之巴羊號及砲艦四隻驅逐艦三十餘隻此外俄國現自修造者有戰鬪艦二隻政府始擬去年間告竣無奈工師技術未熟加以籌劃疎漏中間窒礙叢出尙未告成是等兵船均係日俄戰中

所籌造後經擇造四隻所需款項如何應籌備政府與議會豫算委員及國防委員等現正議商所有材料工師工役等國民均願本國自辦惟政府未悉從聽民意兵艦樣式由外國專家採購有交德國船廠訂造之意俄國海軍界中有人提倡防備波羅的海有驅逐艦水雷艇尙可敷用須將波海艦隊調遣東亞海面以保護商漁業等此論傾動軍界想波海艦隊之大部不久即調派東洋也又俄國經甲辰之役國民願富水兵者頓爲減色是以政府勒令壯丁招募水兵國民病之如士官候補生應募者亦甚寥寥云

#### 新煤比較之功用

斐列濱羣島近時產煤既旺且美其煤經化學家柯兒時博士試驗云該煤火力及熱度較進口之澳洲煤及日本煤均強盛數倍且該煤用時氣鍋不能吸引其熱力以是美國之往來船艦如康號沙克拉曼士號及巴拉灣號均以此種煤於各項煤中比較爲最美云

#### 日人在滿洲之進步

撫順煤礦之現況

「一」出產量 據撫順煤礦長松田博士之談曰自滿鐵會社承受該煤礦時「明治四十年三月」其出產額每日平均計千算金寨出百三十六噸楊柏堡出九十四噸老虎寨出百三十三噸統計四十年上半年期之產額凡九萬四千八百九十七噸原價每噸合洋二元六角六分五厘九毛是年下半年期出十三萬八千四百三十一噸強原價二元五角四分三釐二毛次年上半年期之產額凡二十萬四千五百二十九噸餘其原價每噸合二元零七分六厘是年下半年期即最近時因輸送販賣之路日廣其探額一日平均增加二百噸爲千七百噸其探掘費合原價一噸在二元以內如是原價漸見低落隨輸送販賣之擴張益有多額之出產實由於苦工之賃銀減下消費物品之節省與使役上之整頓諸項所致當該社承受之時礦外苦工日需賃銀四角五分今減至三角礦內苦工日需銀一元二角今減至六角其餘諸賃銀大略仿此所有大山之工程現已掘下七分再掘三分即可達到煤層此礦可與東鄉礦同時竣成約至明治四十五年末能以日出五千噸然在今日隨輸送之便利若販路更見擴張則每日可望探掘至二千五百噸云

「二」撫順開發問題 撫順雖在內地近來唱導撫順煤之大開發者頗多即如撫順煤

更供給至日本內地則煤價日見下落在日本生產工業之發展上實可得至大之便益  
撫順煤之採掘此後日見盛大則煤價之下落自不待識者之煩言現今石炭之販路雖  
在哈爾濱亦多採用如製粉工場及其他用途近一年內已見二十萬噸之用額又長春  
哈爾濱間東清鐵道之用撫順煤者凡十萬噸滿鐵之消費額現今已達十六萬噸更至  
安奉線改築後則可消費至二十萬噸同時輸入朝鮮者每年亦有二十萬噸而在去年  
九月輪至香港者四千噸輸至上海者二千噸又新嘉坡亦輸出三千噸餘今後若輸出  
稅再為低率則此後輸出數更達非常之鉅額可知

二二撫順市街之現在 當滿鐵承受撫順時應煤礦採掘上之必要所計劃之事業已  
著著進行如道路水道電燈瓦斯等之設備亦皆竣功又煤山用之建築物約占地及一  
萬坪「每坪合六尺方地」其餘小學病院社宅共同浴場警察署郵便局等已建設者  
約占地三千四百坪尙有此後須建設者如礦長社宅俱樂部及旅館集會所兼遊戲場  
及寺院等

四水道 水道之經費預算為四十五萬元然實際僅三十萬元已足每一立方間約

供給四十立方尺之淨水此水源地排水地鉄管敷設及其他工事現已終了然今日尙未能引用水源地之水約再歷一月即可由水源地供給用水矣

「五」瓦斯及電氣 瓦斯之計劃凡供給五萬立方尺所需諸機械及大連瓦斯所用之物已在德國工廠定製大約至本年七月中已可開始其事業又電氣自去年十一月以來置有大發電機二臺供工場及點燈用本年四五月間尙須添置大發電機二臺云

#### 歐洲外交界之近狀概略

邇者德法訂定協約兩國士商疑懼頓解民情安堵土奧兩國交涉懸案亦現有端倪土勃兩國之磋商亦將和平了結願土勃之交涉久懸不結去年以來兩國相持不下各在國境調集重兵戰機數見世界列國均爲注重而今如此兵氣已銷玉帛再通爲兩國幸已查此案與澳國最有關係初澳國外相曳連塔爾君將波斯尼亞黑爾滋哥比亞二州宣布併合時勃國亦聲明獨立擬脫土國羈絆勢殆決裂歐洲一隅啓咻有日當是時一面有莫羅哥問題德法衝突紛糾日久人心頗動此間有居常不喜德國者以爲排擠德國令其孤立絕無奧援正在此時割策最力而德國適值吏治困難各種艱鉅事宜榮出



迭見進退維谷德國政治家乃決計關於莫羅哥問題急與法國行成節節退讓以謀緩禍機故說者均云近該問題和平議妥者亦不外德國之讓步也又聞於巴爾幹問題德國亦知四周情形不利自國乃竟隱忍下氣不敢自逞其意似使世界各國此時尙認三國同盟之仍存在耳查德國邇年外交政策專事積極主意毫無顧忌乃爲過於操切動召災禍今遽翻然改軌讓自制務出消極主義可異而此最爲合宜之策也何者歷觀各國如今晏然以鳴得意者獨有德國耳亦謙受益者耶否耶近時關於巴爾幹問題俄與奧土諸國隔膜已通法意之間亦無猜嫌惟英奧之間尙不免稍有嫌隙動欲睽離人多憂之然局微細固不足牽動大局平和無庸意慮過慮也

己酉大政記卷九

譯電八

倫敦電○英國海關報告西二月出口貨較往年減少三百九十二萬五千零六十二磅  
進口貨減少一百九十五萬九千九百二十五磅即棉貨一宗出口較往年少一百九  
十七萬二千六百二十六磅

又電○法國依福洛塔無線電總機關處擬由巴黎至坎拿大通行無線電現正預備一  
切

又電○傳聞葡萄牙國擬將非洲的拉噶海灣讓歸英人管理

又電○奧國爲擴充軍備起見籌辦國債五百萬磅現在收入之款已逾原定之數

倫敦電○美國紐約至池喀溝鐵路於昨日由池喀溝至巴福洛通行無線電此爲美國

鐵路第一次通行無線電并可免火車衝撞之虞

紐約電○南美洲阿真廷民主國擬在英法德美四國籌借國債四千八百六十五萬元  
以五釐行息九九收入二十六年償還聞英國承認九百七十三萬元現已發售股票

其法德美三國亦均同時籌辦云

東京電○日本政府現議定籌撥三百萬元以作一千九百十二年東京萬國大博覽會之經費

路透電○美政府因美洲中央薩洛瓦都國與尼喀拉瓜國宣布戰事擬與墨西哥國聯約干預中美戰事聞薩尼國兩仍預備戰事并憾美國干預現在墨西哥政府聲稱已經出而干預并擬與美國會議辦法美國現已調派兵艦開往哈瓦納「古巴」柏林電○瑞典國大探險家希丹氏現在德京演說探險之事實德皇偕其後親臨并贈以金牌以獎其功

又電○法內閣議撥五十三兆佛郎以充修築雲南邊界鐵路之經費

又電○塞非亞國答覆奧國之書為直接會議事現已送交奧政府并要求奧國將奧塞商約早為議訂「奧國前已駁拒」按塞國之書似不欲直接會議現在奧政府對於此書甚不滿意聞塞曼兩國現仍預備戰事土國亦擬以軍備保護土國利權

犯罪自首

凡犯罪未發而自首者免其罪

其輕罪雖發因首重罪者免其重罪

若其罪雖免猶徵正贖

若入官用強生事逼取詐欺科斂

其輕罪雖發因首重罪者免其重罪

免問罪名免其餘罪

若因問被告之事而別言餘罪者亦如科之

會盜牛又會詐欺人財物止科私事

○其

首遣人代首若於法得相容隱者

為之首及彼此語相告言各聽如罪

人身自首法

若奴婢雇工人為家長首及相告者皆與罪人自首同得免罪

及不盡者

以不實不盡之罪罪之

者聽減一等其知人欲告及逃

而自首者減罪二等

坐之其逃叛者雖不自首能還歸本所者減罪二等

○其損傷於人

而自首者得免所因之罪仍從本

於物不可賠償

若不合有足不可償之物不准首

事發在逃

若本物見在首者聽同首法免罪

若私越度關及姦者並不在自首之

官之先者本無加罪仍得減本罪二等

若私越度關及姦者並不在自首之

律○若強竊盜詐取人財物而於事主處首服及受人枉法不枉法贓悔過回付還主者與經官司自首同皆得免罪若知人欲告而於財主處首還者亦得減罪二等其強竊盜若能捕獲同伴解官者亦得免罪又依常人一體給賞

強竊盜自首免罪後再犯者不准首

按此仍明律 國初及乾隆五年增入小註大致與唐律相同而稍有增刪唐律私習天文者亦在不准首之列現律刪去此句其末後一段唐律謂之盜詐取人財物另列一門現律合爲一篇自首者將己身所犯之罪自作詞狀而首告于官必在事未發覺人未到官之先方見悔過畏法出於本心故律准免罪所以重改過也然情必實贓必盡事必不由人告發方得全免其罪若稍有不實不盡及知人欲告而首均不得全免其罪卽全免其罪者猶必追取其贓以給主還官通篇分爲四節首一節言犯罪准自首所以開人自新之路三節分別不准首所以絕人倖免之心末節推廣自首之法使人知免于罪而獲同伴者既免本身之罪仍賞獲盜之功弭盜微權並寓于是此爲律文最長之篇意思委曲詳盡而文法仍簡老該括其中一句一字均

有精義讀者宜詳味之至於現行條例有足補律未備及與律互相發明者如律云大功以上親首告得免其罪例又補出小功緦麻一項如小功緦麻親首告正犯雖不得全免其罪得減本罪三等無服之親首告減一等其謀反叛逆未行而親屬首告正犯同自首律免罪若已行者正犯不免其餘緣坐人俱免又律云知人欲告而首減罪二等例又補出聞拿投首之犯於本罪上減一等科斷云云誠以聞拿投首與知人欲告而首雖均無悔罪之真心而情節稍有緩急之分故此准減一等彼准減二等也又律云逃叛而首得減二等例又有被擄從賊不忘故土乘間來歸免罪之條蓋以被擄從賊與有心逃叛不同故全免其罪不僅如律得從未減也又如律云越獄在逃者不免本罪備免逃罪例又補出越獄半年投首者仍照原擬罪名如同夥越獄有一人於限內投首供出同夥於半年內盡行拿獲者減原罪一等又監犯因變逸出投歸者除反逆外餘俱減原罪一等拿獲者不減云云蓋因變而逸與自行越獄不同故此得減等而彼仍不免也又誘拐之案已被姦汚者不准自首若未被姦汚分別到案遠近減一等減二等擬罪至於強盜

自首律本從輕悔過還主者免罪知人欲告而於財主處自首還者減二等捕獲同伴者又准給賞現例從嚴立有專條除殺人放火姦人妻女毆事主折傷以上不准首外其未傷人並傷輕平復之強盜以事未發而自首與開拿投首分別量減又夥盜指獲同伴者以五日內外拿獲分別量減近來例外又有夥盜供獲首盜及首盜夥盜供獲夥盜於四個月內拿獲分別減等章程皆較律文加嚴而其中區分亦過於煩瑣遠不如律文之簡易可行惟功令所垂現俱遵照辦理學者須將律與例異同之處並例與章輕重之別苦心分明考其沿革之原察其創制之意臨事方有把握不致無所依據授人指駁之具再自首之法外國亦設此例日本刑法凡犯罪除謀殺外於事未發覺以前首官者減一等犯財產罪自首而還給贓物賠償損害者於自首減等外仍照本刑減二等其償還不及全數而在半數以上者減一等又犯財產罪而向被害人首服者與首於官同此與中律大意相同而辦法略異中律損傷於人者不准首此則除謀殺外均准自首可見鬪殺鬪傷姦罪均准首矣此較中律界限爲寬而中律事未發覺首者全免其罪此則

僅減一等二等又較中律稍嚴再中律必給還贓物方准自首免減若贓未追償卽不准首此則全償贓物者通減三等還半者減二等可見未償還而首者仍准減一等矣此又較中律爲寬總之刑法者因時因地因人而異一國有一國之風俗法制卽因此而立或寬或嚴其中各有作用無論殷監於夏周監於殷秦漢唐明各有損益不能強同現在之例如直奉川陝亦各有專條不能盡合况乎五洲之大地隔數萬里人分數十類風俗嗜好種種殊異而醉心歐化者輒欲吐棄中國一切法律盡換面目以效他人不但削足就履未適於用卽揆諸言稱先職樂操土風之道毋乃非仁人君子之用心乎願我諸學友深表同情共保國粹或者障百川而回狂瀾於世道人心不無小補也夫